

❀ श्री कृष्णःशरणंभम् ❀

दयासागर प्रभू श्री गोवर्द्धननाथजी हम यह ग्यारहवें  
पुष्पाञ्जलि चरणारविन्द में समर्पण करने लाये हैं  
श्री गोवर्द्धन ग्रंथमाला रूपी इस चाटिका में सदैव  
नवीन नवीन पुष्प विकसित होते रहें, हम  
सेवकों की यह ही भावना है

❀ हम हैं आपके दासानुदास ❀

सुरेन्द्र कुमार  
बी. ए. प्रभाकर  
संरक्षक



निरंजनदेव शर्मा  
व्यवस्थापक

❀ श्री गोवर्द्धन ग्रंथ माला समिति ❀

सर्वाधिकार प्रकाशक के आधीन है ।  
याद रक्षिये—समस्त पुष्टि मार्गीय एवं वृजभाषा साहित्य  
तथा धार्मिक पुस्तकें मिलाने का एक मात्र स्थान

पुष्टि मार्गीय पुस्तकों का केन्द्र

श्री बजरंग पुस्तकालय, दाऊजीघाट, मथुरा ।

व्यवस्थापक—निरंजनदेव शर्मा का सादर भगवद् स्मरण ।

श्रीगोवर्द्धनतापीविभवनं -  
 श्रीगोवर्द्धन तपासा श्रीगोविन्द का ग्याहवां पुष्प  
 श्रीआचार्यजी महाशयनी

# ॥ श्रीगोवर्द्धन वरुवार्ता ॥

( सारसङ्ग्रह सहित )

वि० सं० १६६७ की प्रतिप्रति



सम्पादक

श्रीगोवर्द्धन परीश्वर



प्रकाशक

पुस्तकों का केन्द्र-

श्रीबजरंग पुस्तकालय, दाऊजी-घाट,  
 मथुरा ।

प्रथम आवृत्ति  
 ११००

वसन्त पंचमी सं० २०१५

न्यौछावर  
 दो रुपया

## याद रखिये

हमारा मुख्य सिद्धान्त पुष्पिमार्गीय साहित्य का प्रचार करना है १६ वर्षों तक सतत प्रयत्न करके हमने समस्त पुष्पिमार्गीय साहित्यप्रकाशन संस्थानों से सम्पर्क स्थापित कर लिया है। वर्तमान समय में संस्कृत, वृजभाषा, हिन्दी, गुजराती, इंगलिश में जो भी पुष्पिमार्गीय ग्रन्थ प्राप्त हो सके हैं वह समस्त ग्रन्थ पर्याप्त संख्या में हमारे यहां मिलते हैं, और इसके अलावा हमारे यहां भी पुष्पिमार्गीय ग्रन्थ प्रकाशित होते हैं। अन्य पुष्पिमार्गीय प्रकाशक सिर्फ अपने यहां के प्रकाशित ग्रन्थ ही अपने यहां रखते हैं परन्तु हमारे यहां सभी प्रकाशकों के प्रकाशित ग्रन्थ उपरोक्त भाषा में उमी न्यौछावर में मिलते हैं, इसके अतिरिक्त वृजभाषा साहित्य एवं सभी प्रकार की धार्मिक पुस्तकें भी हमारे यहां मिलती हैं, अलग २ स्थानों से पुस्तकें मंगाने के बजाय एक ही स्थान से मंगाने में समय और पैसों की काफी बचत होती है। अतः हमारी समस्त संस्थाओं में जनों से सानुगोध प्रार्थना है कि पुष्पिमार्गीय, वृजभाषा साहित्य एवं धार्मिक पुस्तकें मंगाने समय हमें याद रखते हुए एक बार अपनी तथा अपने सम्बन्ध मंडलों की सेवा करने का सुअवसर अवश्य प्रदान करें। विशेष जानकारी के लिए बड़ा सूचीपत्र मुफ्त मंगावें ६०

2500

विनीत

निरञ्जनदेव शर्मा

व्यवस्थापक:—पुष्पिमार्गीय पुस्तकों का केन्द्र

श्रीवज्रगंग पुस्तकालय, दाऊजीघाट मथुरा

## प्रस्तावना

प्रस्तुत ग्रन्थ वि० सं० १६६७ की प्रतिलिपी है । इसका मिलान कांकरौली की वि० सं० १६६७ की लिखी ८४ वार्ता से किया गया है जिसमें निज वार्ता और श्री गुसाई जी के अष्ट छापी चार सेवकों की वार्ताएँ भी सम्मिलित हैं । अतः इसकी प्राचीनता में कोई सन्देह नहीं किया जा सकता । यह प्रति मुझे अपनी शोध में मिली है ।

बहुत दिन से मेरा विचार था कि इस प्रति को मैं प्रकाशित कर बम्बई आदि से प्रकाशित निजवार्ता घरूवार्ता की प्रति की अप्रामाणिकता को इतिहास-प्रिय जनता के समक्ष स्पष्ट करूँ । किंतु अनेक कार्यावशात् मैं इसे प्रकाशित नहीं करा सका । जब श्रीबजरङ्ग पुस्तकालय के व्यवस्थापक श्री निरञ्जनदेव शर्मा ने जो कि कुछ समय से प्रतिवर्ष छोटी, मोटी दो-तीन सांप्रदायिक पुस्तकें प्रकाशित करते हैं मुझ से कहा कि इस वर्ष आप कोई पुस्तक दीजिये जिसको मैं प्रकाशित करा सकूँ । मुझे उसी समय यह पुस्तक याद आई जो न तो बड़ी ही है न त्रिलकुल छोटी ही । उन्होंने शीघ्र ही इस पुस्तक को छपाना शुरू किया । मैंने इस पुस्तक में चलती लिपि में आये 'भावप्रकाश' को अलग छांट दिया और प्रूफ देखने आदि की सारी जुम्मेवरी श्री शर्मा जी के ऊपर छोड़ दी । क्योंकि मैं जादातर बाहर व्यस्तता रहता हूँ इसलिये प्रूफ आदि देखने का कार्य नियमित रूप से मैं नहीं कर पाता हूँ ।

पुस्तक छपी हुई देख कर मुझे यह सन्तोष हुआ कि इसमें प्रूफ की उतनी गलतियाँ नहीं पायी गईं जितनी 'श्री विठ्ठलेश चरित्रामृत' में पूर्व पाई गई थीं । अस्तु

प्रस्तुत पुस्तक जो 'निज वार्ता घरू वार्ता' के नाम से प्रसिद्ध है इससे आचार्य जी के चरित्र और सामर्थ्य पर काफी प्रकाश पड़ता है । यह कहने की आवश्यकता नहीं है कि 'निजवार्ता—घरूवार्ता' की

रचना ८४ वैष्णव की वार्ता के अनन्तर ही हुई है, क्योंकि इसमें ८४ वार्ता के उल्लेख कई स्थानों पर मिलते हैं। इसमें जो 'भावप्रकाश' है वह भाषा और लेखन शैली की दृष्टि से ८४ वार्ता के 'भावप्रकाश' से बहुत कुछ मिलता है। अतः इसके संकलन और रचना का सारा श्रेय गो० श्रीहरिरायजी को ही दिया जा सकता है।

इससे आचार्य-चरित्र पर इस प्रकार प्रकाश पड़ता है—

### जन्म सम्बन्ध—

१—इसमें महाप्रभू वल्लभाचार्यजी का प्राकट्यकाल वि० सं० १५३५ जिन पंक्तिओं से सिद्ध होता है वे इस प्रकार हैं—

“सो श्रीबलदेवजी श्रीगोपीनाथजी होइके अडेल में सं० १५६७ आश्विन कृष्ण १२ के दिन प्रगट भये । तब श्रीआचार्यजी महाप्रभू आप तीस वर्ष की वय कों अङ्गीकार किये हते ।” श्रीगोपीनाथजी के प्राकट्य का उक्त समय चैत्री सम्बत् है। अतः दक्षिण-गुजरात में प्रचलित कार्तिकी सम्बत् १५६६ होता है। इस समय श्रीआचार्यजी तीस वर्ष को पूर्ण कर चुके थे। इस हिसाब से आचार्यजी के प्राकट्य का सम्बत् १५३५ सिद्ध होता है। जो सम्प्रदाय के श्रीनाथजी प्रभृति सभी घरों में एकमत से स्वीकृत है, और ज्योतिष एवं आचार्यजी के अतरंग सेवक विष्णुदास प्रभृति सेवकों के पदों से भी निश्चित है।

इस प्रसङ्ग का उल्लेख बम्बई से प्रकाशित 'निजवार्ता-घरूवार्ता' में नहीं मिलता है। उसमें जहाँ प्रायः ४० प्रसङ्ग बनाये गये हैं वहाँ बीसन सम्बत्तां की भरमार भी दिखाई गई है, जो किसी भी हस्त-लिखित प्राचीन ग्रन्थ में वे प्रसङ्ग और सम्बत्ते नहीं मिल रही है। उस प्रकाशित प्रति में खास ध्यान देने योग्य तो वह प्रसंग है जिसमें श्रीआचार्यजी के प्राकट्य का सं० १५२६ ज्योतिष चक्र से श्रीगोकुलनाथजी (चतुर्थ पुत्र) के मुख द्वारा कहलवाया है। ऐसे भूठे और

कल्पित प्रसंगों की अप्रामाणिकता इस प्राचीन हस्त प्रति से स्पष्ट हो जाती है। इस प्रति में श्रीगोपीनाथजी और श्रीविठ्ठलनाथजी के प्राकट्य संवतों के सिवाय अन्य कोई घटना के संवतों का उल्लेख ही नहीं है। इससे क्षीर नीर न्याय वाले विवेकी पाठक उन संवतों की कल्पितता को जान सकते हैं। अस्तु

२—श्रीगोपीनाथ जी के प्राकट्य वाले उक्त उल्लेख में श्रीगोपीनाथजी का प्राकट्य समय वि० सं० १५६७ के आश्विन (गुजराती भादों) कृष्ण १२ बताया गया है, जो कि सम्प्रदाय के श्रीनाथजी प्रभृति सभी घरों में उस दिन आज प्रायः ४५० वर्षों से माना जा रहा है। जो लोग भरुची मत के श्रीगोपालदासजी व्यारे वाले के सं० १५७० और भादों वदी १० वाले कथन को पुष्ट करने के लिये यहाँ तक लिखते हैं कि सर्वत्र खोज करने पर भी कृष्ण १२ का प्राचीन उल्लेख कहीं नहीं मिलता है वे सत्य से कितने दूर हैं वह इससे जाना सकता है, कृष्णदास अष्टछाप वाले के पद भी श्रीगोपीनाथजी के उक्त समय की स्पष्ट रूप में पुष्टि करते हैं।

३—श्रीगुसाईंजी का प्राकट्य समय वि० सं० १५७२ के पौष कृष्ण नौमी का उल्लेख गोविन्द स्वामी आदि अनेक समकालीन सेवकों के पदों में बहुलता से मिलता है।

इस प्रकार इस प्रति से तीन प्राकट्य संवत् प्रामाणिक रूप में उपलब्ध होते हैं।

सामर्थ्य—

पुष्टिमार्ग अर्थात् भगवद् अनुग्रह मार्ग के प्रवर्तक श्रीवल्लभाचार्यजी के निजी चरित्र में यदि भगवद् अनुग्रह की सामर्थ्य व्यक्त न हो तो पुष्टिमार्ग की विशेषता कैसे जानी जा सकती है? अनुग्रह का स्वरूप सूर ने सामान्यरूप में इस प्रकार गाया है—

वंदों श्रीहरि पद सुखदाई ।

जाकी कृपा पंगु गिरि लंघे, अंधे कों सब कछु दरसाई ॥

बहिरो सुने गूंग पुनि बोले, रंक चले सिर छत्र धराई ।

‘सूरदास’ स्वामी करुणामय, बार-बार वंदों तिहि पाई ॥

इससे यह स्पष्ट है कि भगवद् अनुग्रह की सामर्थ्य अघटित घटना को भी घटा सकती है । इसके प्रत्यक्ष दृष्टान्त रूप में पंगु किशोरी बाई ( २५२ की वार्ता ) जन्म से अन्धे सूरदास ( ८४ वार्ता ) गूंगे गोपालदास और रंक नरहरिदास ( ८४ वार्ता ) आदि के चरित्र हैं, जिनमें पुष्टिमार्ग के प्रवर्तक श्रीवल्लभाचार्यजी एवं उनके सुपुत्र श्रीविठ्ठलनाथजी के अनुग्रह बल का स्पष्टीकरण हुआ है । जो दूसरों के ऊपर अनुग्रह करके अघटित घटना को घटा सकता है वह क्या सामान्य मनुष्यों की तरह आधि, व्याधि और उपाधियों के बंधन में रह सकता है ? शास्त्रोक्त प्रमाणों से भी जो सम्पूर्ण शास्त्रों का जानकार हो जाता है वह ‘स्वयं प्रकाश’ एवं ‘सर्वज्ञ’ होता है । इस अवस्था में वेद पारंगत, सर्व शास्त्रविद, अनुग्रह मार्ग के प्रकटकर्ता, परंब्रह्म श्रीकृष्ण को इसी जीवन में साक्षात् करने वाले और दूसरों को भी कराने वाले आचार्य चरण के निजी चरित्रों की अलौकिकता में क्या सन्देह रह जाता है ? और वह भी उस समय जब कि इन अलौकिक चरित्रों की पुष्टि स्वयं आचार्य चरण ही अपने ग्रन्थों में इस प्रकार करते हैं—

( १ ) वैश्वानर एवं वाक्पतित्व रूप की उक्ति—

“अथ तस्यविवेचितुं न हि विभु वैश्वानराद् वाक्पते”

—सुबोधिनी

## ( २ ) भगवत्साक्षात्कार की उक्ति—

श्रावणस्यामले पक्षे एकादश्यां महानिशिः ।

साक्षाद्भगवता प्रोक्तं तदक्षरश उच्यते ॥ सिद्धान्त रहस्य

## ( ३ ) भगवदाज्ञा की स्पष्टोक्ति—

आज्ञा पूर्वं तु या जाता गंगासागर संगमे ।

यापि पश्चान्मधुवने न कृतं तद्द्वयं मया ॥

देह देश परित्याग स्तृतीयो लोक गोचरः । अन्तःकरण प्रबोध

शास्त्र और विज्ञान से भी यह सिद्ध है कि जिन्होंने अपने चंचल और पवन से भी अतिवेग वाले अजेय मन को जीत लिया है और उसको कृष्ण में निरुद्ध कर लिया है वह न केवल विश्व को ही किन्तु कृष्ण को भी अपने अधीन कर लेता है। जो ब्रह्म किसी के भी बंधन में नहीं आता है वह इस निरुद्ध गति वाले भक्त के हृदय में बंध जाता है—आचार्यजी ऐसे ही निरुद्ध गति को प्राप्त हुए थे। इस बात को वे स्वयं इस प्रकार कहते हैं—

“अहं निरुद्धोरोधेन निरोध पदवी गतः”—‘निरोध लक्षण’

आपके हृदय में निगम प्रतिपादित ‘रसो वै स’ परब्रह्म कृष्ण अपनी सम्पूर्ण शक्तियों सहित विराजमान हैं इस बात को भी आप इस प्रकार कहते हैं—

‘नमाभि हृदयेशेषे लीला क्षीराब्धिशायिनम् ।

लक्ष्मीसहस्र लीला भीः सेव्यमानं कलानिधिम् ॥

आचार्यजी की उक्त स्पष्टोक्तियां गीता के श्रीकृष्ण की दीखाई हुई ‘अतोऽस्मि लोक वेदे च प्रथितः पुरुषोत्तमः’ इस आर्य-प्रणाली का निर्वाह करती है। जब तक आचार्यजी अपने स्वरूप को लोगों के समक्ष वाणी और चरित्रों से स्पष्ट न करें तब तक वे दूसरों के उद्धार



में समर्थ है या नहीं यह किस प्रकार जाना जा सकता है ? इसी लिये सभी आचार्यों ने भारतीय आर्य-प्रणाली के अनुसार अपने-अपने स्वरूपों का वर्णन किया है और अपने चरित्रों से तदनुरूप सामर्थ्य को भी स्पष्ट की है।

इस आचार्य प्रदत्त प्रामाणिक दृष्टि से ही यदि उनके चरित्रों का अवलोकन किया जाय तभी हम उनके यथार्थ स्वरूप और सामर्थ्य को जानने में सफल हो सकते हैं। केवल आंग्ल विद्या विशारद, पाश्चात्य जड़वादी मानस के ही विद्वान् हो सकते हैं वेदोक्त आध्यात्मिक विज्ञान के वे विद्वान नहीं होते हैं। इसी लिये वे लोग विभिन्न आचार्य एवं भक्तों के चरित्रों की अलौकिक घटनाओं पर विश्वास नहीं करते हैं। किन्तु इससे आध्यात्मिक विज्ञान असत्य नहीं ठहर सकता है। आज भी इस विज्ञान को खोजने वाले व्यक्ति निराश नहीं होते हैं तो उस समय जब कि सर्वत्र भक्ति का साम्राज्य था तब तो उस विज्ञान के दिव्य प्रकाश को ऐसा कौनसा साहित्यिक पुरुष था जो देख न सका हो। क्या पूर्व और क्या पश्चिम सभी देशों के उस समय के साहित्य में भक्ति के चमत्कारों का बोलबाला रहा है। भले उसको आज के भौतिक बुद्धिवादी विद्वान् न माने। अस्तु

इस दृष्टि से हम आचार्यजी के इस निजी और घरू चरित्रों का अध्ययन करेंगे तो हमें यह स्पष्ट प्रतिभासित होगा कि आचार्य चरण साधारण मानव न थे, किन्तु उनमें कृष्ण के मुखारविन्द की आध्यात्मिक वैश्वानर अग्नि, वेद की सर्वज्ञता, आचार्य की दिव्य प्रतिभा और सन्मनुष्य के सभी लक्षण विद्यमान थे। कृष्ण मुख की आध्यात्मिक वैश्वानर अग्नि की हृदय में स्थिति होने के कारण वे जहाँ कृष्ण को साक्षात् बुलवा सकते थे वहाँ अपने स्वरूप का दिव्य और प्रकाशमय रूप भी लोक में प्रकट कर सकते थे। इसी प्रकार वेद में पारंगत होने के नाते वे जहाँ त्रिकालह बन जाते थे वहाँ सर्व मंत्र-तंत्रों को अधीन

भी कर लैते थे, आचार्य की दिव्य प्रतिभा के कारण 'आचार्य मां विज्ञानियात्' आदि भगवद् वाक्यों के अनुसार वे जहाँ भगवत्स्वरूप के दर्शन दे सकते थे वहाँ वेद से विरुद्ध सभी वादों को निरास भी कर सकते थे, ऐसे ही सन्मनुष्याकृति रूप में सदाचार सद् विचार और सद् व्यवहारों को प्रकट कर सात्त्विक जन-समूह के अवलम्बन-आश्रय रूप बनते थे । इस सन्मनुष्याकृति रूप से आपने कृष्ण को विशुद्ध प्रेममयी भक्ति को भूमि में प्रकट कर उसको अपने जीवन में आचार, विचार और व्यवहारों द्वारा व्यक्त किया । यही आपके चतुर्विध स्वरूपों की निजी अरू घरुवार्ताओं के प्रसंग रूप प्रस्तुत चरित्र है ।

इन स्वरूपों का अनुसंधान रखते हुए यदि इस ग्रन्थ का अध्ययन होगा तो अध्ययनकर्ता को लौकिक और अलौकिक उभय प्रकार का वैज्ञानिक ज्ञान प्राप्त होगा इसमें कोई सन्देह नहीं । सर्व-शक्तिधृक् ईश्वर की कृति और सामर्थ्य में ऐसा कोई तथ्य एवं तत्त्व नहीं जिसका अभाव वा असंभाव अनुभूत हो । इस विश्व में ईश्वर ही सर्व रूपों से सर्वविध क्रीडाकर्ता है इस लिये भारतीय विचारश्रेणी में असंभावना और विपरीत भावना को कोई स्थान प्राप्त है ही नहीं । यह दो भावना तो जडवादी मानस में ही प्रतीत होगी । अस्तु

माघ शु० ५  
वसन्त पंचमी  
सं० २०१५ वि०  
मथुरा.

श्रीवल्लभ-वल्लभीय चरणरज  
आकांक्षित  
—द्वारकादास परीख

## \* आमुख \*

श्रीगोवर्द्धन ग्रन्थमाला की स्थापना शुभ सम्बत् २०११ में कार्तिक शुक्ला प्रतिपदा श्रीगोवर्द्धन पूजा के दिवस हुई थी इस ग्रन्थमाला का मुख्य उद्देश्य केवल पुष्टिमार्गिय ग्रन्थ प्रकाशन करना ही है। वर्तमान समय तक इस ग्रन्थमाला ने अपने शैशवकाल के ४ वर्ष समाप्त करके पांचवें वर्ष में प्रदार्पण कर लिया है। इस ग्रन्थमाला की ओर से प्रति वर्ष ३ पुष्प प्रकाशित होते हैं श्रीगोवर्द्धननाथजी की कृपा से चतुर्थ वर्ष का ११ वां पुष्प हम आपके समक्ष प्रस्तुत कर रहे हैं प्रस्तुत ग्रन्थ सम्प्रदाय के स्तम्भ ब्रजभाषा साहित्य एवं वार्ता साहित्य के मर्मज्ञ श्री द्वारकादासजी परीख के सौजन्य से हमें प्राप्त हुआ है हम आपके अत्यन्त आभारी हैं कि आप अपनी पूर्ण कृपा हम पर एवं इस ग्रन्थमाला पर रखते हुए अपने तीन अमूल्य ग्रन्थ अब तक इस ग्रन्थमाला को प्रकाशनार्थ प्रदान कर चुके हैं। प्रथम ग्रन्थ इस ग्रन्थमाला का द्वितीय पुष्प श्रीघिट्टलेश चरितामृत था, द्वितीय ग्रन्थ इसका दसवां पुष्प खट्कृतु वार्ता था, एवं तृतीय ग्रन्थ यह निजवार्ता, घरुवार्ता है हम पूर्ण आशावादी हैं कि भविष्य में भी श्रीपरिखजी हम पर पूर्ण कृपा रखते हुए इसी प्रकार ग्रन्थमाला को अपना पूर्ण सहयोग प्रदान करते रहेंगे। प्रस्तुत ग्रन्थ के प्रकाशन में मैंने प्रफ अबलोकन में यथा संभव पूर्ण सावधानी बरती है, परन्तु फिर भी प्रेस की भूल से यदि कोई त्रुटि रह गई हो तो क्षमा करते हुए सुविज्ञ पाठक उसे कृपा कर सुधार लें।

प्रार्थी:

माघ शुक्ला ५

वसन्त पंचमी सं० २०१५

निरंजनदेव शर्मा

व्यवस्थापक:

श्रीगोवर्द्धन ग्रन्थमाला कार्यालय, दाऊजीघाट

मथुरा.

❀ श्रीकृष्णाय नमः श्रीगोपीजनवल्लभाय नमः ❀

# श्रीआचार्यजी महाप्रभू की निजवार्ता

चिंता संतानहंतारो यत्पादांबुजरेणवः ।

स्वीयानां तान्निजाचार्यान् प्रणमामि मुहुर्मुहुः ॥ १ ॥

श्री आचार्यजी महाप्रभू प्रगट भए । दैवी जीवन के उद्धारार्थ । सो दैवी जीवन को भगवान ते विछुरें बहुत दिन काल भए हैं । सो गद्य श्लोक में श्री आचार्यजी महाप्रभू आप कहे हैं । 'सहस्रपरिवत्सर' सो श्री ठाकुरजी को लीला में दया उपजी । तब श्री आचार्यजी महाप्रभू को आज्ञा दीनी । जो तुम भूतल में पधारो । और दैवी जीवन को उद्धार करो । वे दैवी जीव बहुत काल के भटकत हैं । सो वे सब मार्ग में पेठत हैं । परि कहूँ उनको स्वस्थ नांही ।

भावप्रकाश—काहेतें स्वस्थ नांही जो-जा वस्तु के वे अधिकारी हैं । सो तो कहूँ वे देखत नांही । तातें परिभ्रमण करत हैं । परि कहूँ स्वस्थ होत नांही ।

सो तिन जीवन के लीयें श्री आचार्यजी महाप्रभू आप पधारे । सो साक्षात् पुरुषोत्तम को धाम हैं । सो तेजोमय हैं । सो ताको आधार अग्नि हैं । सो अग्नि कुण्ड में तें श्री आचार्यजी महाप्रभू प्रगट भए । तातें सब कोऊ इनको अग्नि रूप कहत हैं ।

उलटो इनको सेवक करत हैं ? तार्ते जो तोकों अपनों कार्य सिद्ध करनो होइ तो तू इनकी सरनि आइ । एतो साक्षात् मेरो स्वरूप हैं । ए भक्तिमार्ग स्थापन के लिये प्रगट भये हैं । सो महापुरुष वह तत्काल जागि परयो । सो उठिके श्री आचार्यजी महाप्रभूनको आइके साष्टांग दंडवत् कीये । और कह्यो महाराज ! मेरो अपराध क्षमा करो । मैं कालि आपको अनुचित बचन कह्यो । मैं आपुको स्वरूप नहीं जान्यो । आपु तो साक्षात् पुरुषोत्तम हों । मेरे उद्धार के लिये आप पधारें हो । सो मेरो अंगीकार करोगे । तब श्री आचार्यजी महाप्रभू कहे जो-- हां हां तेरो उद्धार करेंगे । कहा भयो जो तैं क्यूँ कह्यो तो तब सबारें श्री आचार्यजी महाप्रभू वा महापुरुष को नाम दियो । वाको अंगीकार किये । पाछे आप श्री आचार्यजी महाप्रभू उहांतें आगें पधारें ।

सो आगें एक बडो नगर आयो । सो वा ठोर बडो नगर-सेठ हतो । सो वाकी देह छूटी । वाके चारि बेटा हुते । और सबतें छोटे दामोदरदास हते । सो उन बड़े भाईन विचार कियो जो होइ तो यह द्रव्य अपुनो अपुनों हम चारों भाई बांटिलेहि । काहेतें जो द्रव्य है सो क्लेश को मूल है । पाछे हमारो आपुस में हित न रहेगो । तब दामोदरदास जी तो छोटे हुते सो इनसों कहे-क्यों बाबा ! तू अपने बांटे को द्रव्य लेहिगो? तब दामोदरदास कहे जो-मैं तो क्यूँ समुझत नाहीं । तुम बड़े हो आछो जानो सो करो । तब इन द्रव्य सगरो घर

मेंते काढि वाके चारि बट किये । सो चारयो चिठी लिखिकें  
 वाके उपर डारी । सो जा जाके नाम की चिठी आई । सो सो  
 बाने लीयो । तब दामोदरदास सों कहे जो तुम्हारो द्रव्य  
 जहां तुम कहो तहां धरें । ता समें दामोदरदास गोख में बैठे  
 हुते । सो गोख के नीचे राज मारग हुतो । सो ता समें श्री  
 आचार्यजी महाप्रभू वा मारग होइके निकसे । सो उपरते  
 दामोदरदास की दृष्टि परी । सो तत्काल उहांते उठि दोरे ।  
 न कछू द्रव्य की सुधि रही न कछू घर की सुधि रही । सो  
 आवत ही श्री आचार्यजी महाप्रभून कों साष्टांग दंडवत  
 कीयो । तब श्री आचार्यजी महाप्रभू श्री मुखते कहे जो ।  
 दमला तू आयो ? तब इन कही जो महाराज मैं कब को मार्ग  
 देखूं हूं । सो श्री आचार्यजी महाप्रभूनके चरणारविंद के संग  
 पाछें पाछें दामोदरदास चले । सो पाछें भाई कहन लागे जो  
 दामोदरदास कहां गये तब काहूने कही जो या मारग में एक  
 लरिका जात हुतो तिनके पाछें पाछें दामोदरदास जात हैं  
 तब ये तीनों भाई उहांते चले । सो आगे वा नगर के वाहर  
 एक स्थल हुतो । तहां श्री महाप्रभुजी के आगे दामोदरदास  
 बैठे हैं । तब इह देखत ही तीनों भाई चक्रित होइ गये ।  
 सो इनकों श्रीआचार्यजी महाप्रभूनको दर्शनसाक्षात् तेजको पुंज  
 भयो । सो इनते कछू बोल्यो न गयो । अपने मनमें विचारे जो  
 कदाचित कछू बोलेंगे तो यह अग्नि हमकों भस्म करि डारेगी ।  
 तब दामोदरदास भाईनों देखिके कहे जो जाऊ । सो उन

भाईननें दामोदरदास को स्वरूप ता समें तेजोमय देखे । सो मय खाइकें पीछे फिरि आए ।

भावप्रकाश—सो दैवी जीव होते तो सरन आवते । श्री आचार्यजी महाप्रभून को नाम है जो ' दैवोद्धार प्रयत्नात्मा ' ।

तब दामोदरदास कों संग लेके श्री आचार्यजी महाप्रभू आगे पधारे । दामोदरदास कछू ब्याहे तो हते नहीं । जो इनकों स्त्री आइके प्रतिबंध करे । बहुत दिना के विछुरे हते सो आइ मिले । तब श्री आचार्यजी महाप्रभून के संग दामोदर दास चले ।

सो आगे विद्या नगर में कृष्णदेव राजा । तहां श्री आचार्यजी महाप्रभूमके मामा को घर हुतो सो तहां श्रीआचार्य जी महाप्रभू पधारे । सो वे देखिके बहुत प्रसन्न भए । बहुत आदर सनमान किये । तब श्री आचार्यजी महाप्रभूनसों कहे जो उठो आप भोजन करो । तब श्रीआचार्यजी महाप्रभू आप श्रीमुखते कहे जो मैं तो कहूँ भोजन करत नाहीं । अपुने हाथ करिके लेत हों । तब यह बात सुनिके मामा कों रिस चढी । बहुत बुरो लाग्यो । तब कुठिके कयो जो हमारे घर भोजन नाहीं करत तो राजासों देखे जो कैसे मिलोये राजाके इहां दानाध्वज तो हम हैं । देनों दिवावनों तो हमारे हाथ है । यह सुनिके श्री आचार्यजी महाप्रभू बोले नाहीं ।

भावप्रकाश—क्यों जो आप तो ईश्वर हैं । आप जो काहूँ के बराबर होइ तो काहूँ सों बोलें ।

सो श्री आचार्यजी महाप्रभू आप उहां रात्रिकों पोढे । इतने में श्री गोवर्द्धननाथजी आप पधारे । तब श्रीआचार्यजी महाप्रभू तो आप निद्रा में हते । तब श्रीगोवर्द्धननाथजी ने श्री आचार्यजी महाप्रभूनके केश दावे । तब श्री आचार्यजी महाप्रभू तत्काल जागि परे । देखें तो श्री गोवर्द्धननाथजी आगें ठाढे हैं । तब श्रीआचार्य जी महाप्रभू आप उठिके श्रीहस्त जोरिके ठाढे भये । तब श्री गोवर्द्धननाथजी कहे जो ऐसो गर्वित बचन याको सुनिके वाके घर में आप क्यों रहे ? मैं तो तिहारे पाछें पाछें लाग्यो डोलतई हों । एक छिनहूँ नहीं छोडत । यह तुमकों राजासों कहा मिलावेगो । एसो तो कोटि राजा तुम्हारे चरणारविंद की अभिलाषा करत हैं । और करेगे । आप उठो वाके घर मति रहो । सो तत्काल में श्री आचार्यजी महाप्रभू आप उहांते उठि चले । सो उहां नगर के बाहर जलासय हुतो । तहां श्रीआचार्यजी महाप्रभू आप स्नान सन्ध्या करिके कृष्णदेव राजाकी सभा कों पधारे ।

सो कृष्णदेव राजा के इहां आये । तहाँ वैष्णव सम्प्रदायको और स्मार्त सम्प्रदाय को आपुसमें भगरो होत हतो । सो वैष्णव सम्प्रदाय के बड़े बड़े आचार्य महन्त । बहुत भेले भये हते सो युक्ति सों स्मार्त जीते । सो वा दिना यह भगरो चुकत हतो । तब श्री आचार्यजी महाप्रभू के मामा ने राजा कृष्णदेव सों कहे जो आज भगरो चुकवे उपर है । सो द्वारपाल सों कहि राखो जो आज कोई नयो ब्राह्मण न आवन पावे ।



तब राजा कृष्णदेव के इहां सब ब्राह्मण आये । सब सभा भेली भई, इतने में श्री आचार्यजी महाप्रभू पधारे । सो द्वारपाल और सब मनुष्य श्री आचार्यजी महाप्रभून को देखत ही चक्रित भये । जो मानों आकास ते सूर्य पधारे ऐसे तेज को पुंज देख्यो तब श्री आचार्यजी महाप्रभू आप तो भीतर पधारे राजा कृष्णदेव की सभा में पधारे । सो श्रीआचार्यजी महाप्रभून को देखत ही राजा कृष्णदेव सब सभा सहित उठि ठाढ़ो भयो ता समें की कहा उपमां दीजिये । जो मानो राजा बलि की सभा में श्री वामनजी पधारे हैं । सो श्रीआचार्यजी महाप्रभून के दर्सन करिकें, राजाकृष्णदेव बहुत प्रसन्न भयो । जो आज मेरो बडो भाग्य है । जो साक्षात् भजुवान मेरे घर पधारे हैं । ऐसो राजा कृष्णदेव को दर्सन भयो । तब श्री आचार्यजी महाप्रभून सो कृष्णदेव राजा नें विज्ञप्ति कीनी जो महाराज बिराजिये । तब श्रीआचार्यजी महाप्रभू विराजे । राजा कृष्णदेव सो श्री आचार्यजी महाप्रभू पूछे जो तुम्हारे इहां ए ब्राह्मणन को कहा भगरो है ? तब राजा कृष्णदेव नें कही जो महाराज यह वैष्णव सम्प्रदाय और स्मार्त इनको आपुस में भगरो है । सो वैष्णवसम्प्रदाय वारे तो निरुत्तर भए हैं । और स्मार्त जीते हैं । तब यह सुनिकें श्रीआचार्यजी महाप्रभू कहे जो एसो कौन है जो वैष्णवसम्प्रदाय को जीतेगो ? वैष्णव सम्प्रदाय तो हमारी है । हमसों चरचा करो । वे कौन हैं ऐसे जीतन हारे ? तब यह सुनिकें वैष्णव सम्प्रदाय के आचार्य

बड़े बड़े महंत बैठे हुते । सो बहुत प्रसन्न भये । तब राजा कृष्णदेव उन मायावादीनसों कहे जो आओ । जो तुम्हारे चरचा करनी होइ सो करो । तब उनमें बड़े बड़े पंडित हुते सो श्री आचार्यजी महाप्रभूनसों चरचा करवे लागे । सो श्री आचार्यजी महाप्रभून तो आप साक्षात् ईश्वर । च्यारो वेद पुराण सास्त्र सब महाप्रभून के जिभ्याग्र ताते उनका कितनीक सामर्थ । सो वे मायावादी तत्काल निरुत्तर भये । तब श्री आचार्यजी महाप्रभून कों साष्टांग दंडवत किये । और कहे जो महाराज कोई मनुष्य होइतो तासों हमारी चले । और आपतो साक्षात् ईश्वर हो । तब श्री आचार्यजी महाप्रभून को महात्म्य देखिके राजाकृष्णदेव बहुत प्रसन्न भयो । सब वैष्णवसंप्रदायके आचार्य महन्त हुते । ते सहस्रावधि एकठोरे भये हुते । सो सबनने यह कही जो हम सब श्री आचार्यजी महाप्रभून कों तिलक करेंगे । जो हमारे ए वैष्णव सम्प्रदायके, ब्राह्मणनके, सबनके राजा भये । और आचार्य पदवी दीनी सो हमारे सबनके सिरोमनि हैं । जिनने हमारी वैष्णवता और वैष्णव मार्ग राख्यो । यह सुनिके राजाकृष्णदेव कहे जो बहुत आछो । तुम सबन एसे विचारे हैं तो मैं श्रीआचार्यजी महाप्रभूनकों । कनकाभिषेक कराउंगो । तब सब वैष्णव सम्प्रदायके आचार्य महन्त प्रसन्न भये । तब राजाकृष्णदेवने आछो महूर्चि देखिके कनकाभिषेक करवायो । ब्राह्मण सब तिलक किये । सब कोउ श्री वल्लभाचार्यजी कहे । एसो नाम प्रसिद्ध भयो । मायामत

को खण्डन किये । भक्तिमार्ग स्थापन किये । तब राजा कृष्णदेवने विनती करी जो महाराज मेरो अंगीकार करिये । तब श्रीआचार्यजी महाप्रभू आप अनुग्रह करिकें राजाकृष्णदेव कों नाम सुनायो । तब राजाकृष्णदेवने द्रव्य को थार भरिकें आगे भेट धरयो । तब श्रीआचार्यजी महाप्रभू वामेंते आप सात मोहोर काढि लिये । तब राजाकृष्णदेवने कही जो महाराज । सब द्रव्य आप अंगीकार करिये । तब श्री आचार्यजी महाप्रभून आप श्रीमुखते कहे जो हमारो इतनों ही है । हमारें अधिक नांही चाहियत । तब राजा कृष्णदेवने विनती करी जो महाराज यह स्नान को सुवर्ण हैं । सो आपको है । तब श्री आचार्यजी महाप्रभू आप श्रीमुखते कही जो यह हमारो कहा काम को है । यह तो उच्छिष्ट जलवत हैं । ताते तुम ब्राह्मणनकों बांढि देऊ । तहांते श्रीआचार्यजी महाप्रभू दक्षिण दिग्विजय करिकें आप आगे पधारे । वार्ता प्रथम ॥ १ ॥

तब श्रीआचार्यजी महाप्रभू मनमें विचारे जो सब देशांतर में दैवी जीव हैं । ताते आपनकों तो सब ठौर जानों । परि होइतो प्रथम ब्रज में चलें । ब्रज है सो हमारो धाम है, श्रीगोकुल, वृन्दावन, श्रीगोवर्द्धन, यमुना, प्रथम तो ऐ देखीए । सो दामो-दरदासकों संग लेकें श्रीआचार्यजी महाप्रभू आप ब्रज में पधारे । सो आवत आवत मार्ग में झारखंड में आए । तब झारखंड में श्रीगोवर्द्धन नाथजी श्रीआचार्यजी महाप्रभूनकों आज्ञा दीने जो आप वेग पधारो । हम श्रीगोवर्द्धन पर्वत में तीनिदमन हैं ।

नागदमन । इन्द्रदमन । देवदमन । सो मध्य में देवदमन । सो हम प्रगट भए हैं सो आप वेगि पधारिकें हमारी सेवा को प्रकार प्रगट करो । सो यह वचन सुनिकें श्रीआचार्यजी महाप्रभू आप दमला सों कहे जो दमला श्रीठाकुरजी हमकों एसी आज्ञा दीनी । तातें आपुन वेगि ब्रज में चलो । सो झारखंडतें श्री आचार्यजी महाप्रभू आप ब्रज कों चले । सो केतेक दिन में आप ब्रज में पाउधारे ।

सो प्रथम श्रीआचार्यजी महाप्रभू आप श्रीगोकुल पधारे । सो ता दिना श्रावण शुदि ११ हुती । तातें श्री आचार्यजी महाप्रभू उपवास किए हुते । सो रात्रि कों गोविन्द घाट उपर एक चौतरा हुतो । ता ठोर श्रीआचार्यजी महाप्रभू आप पोडे । ओर थोड़े से दूरि । दामोदरदास सोये । इतने में श्रीआचार्यजी महाप्रभूनों चिंता बहुत उपजी ।

भावप्रकाश—कहा चिंता जो श्री ठाकुरजी तो आज्ञा दीनी हैं । जो भूतल में दैवी जीवन कों अङ्गीकार करो तो उनकों मेरो सम्बन्ध होइ । और इहां तो जीव सब संसार में पड़े हैं । सो समुद्र में पड़े हैं । अपुनो हूँ स्वरूप भूलि गये हैं । और श्री ठाकुरजी कोहू स्वरूप भूलि गए हैं । और संसार में मग्न है सो दोष बहुत बढ़ि गयो है । और ठाकुरजी तो पूर्ण गुण विग्रह हैं । इनकों प्रभू को सम्बन्ध कौन रीति सों होइ । ऐसी चिंता होत भई ।

तब अर्द्धरात्रि समें । साक्षात कोटिकंदर्पलावण्य । पूर्ण पुरुषोत्तम श्री गोवर्द्धनधर प्रगट भए । तब श्री ठाकुरजी श्रीमुखतें कहे जो तुम चिंता क्यों करत हो । जिनकों तुम नाम

देऊगे। तिनके सकल दोष दूर होइ जाइंगे और मेरी प्राप्ति होयगी और ब्रह्मसंबन्ध की आज्ञा दीनी जो जीवकों ब्रह्मसंबन्ध करवाओ।

भावप्रकाश—ब्रह्मसंबन्ध को कारण कहा जो ब्रह्मसंबन्ध बिना प्रेम लक्षणा न होई। भक्ति न होइ। और प्रेम लक्षणा भक्ति बिना पुष्टिमार्ग में अङ्गीकार न होइ। पुष्टिमार्ग में अङ्गीकार होइ तो भगवत्सेवा को अधिकार होइ। और जीव तो कृतार्थ भगवत् नाम सों होइ जाइ। ताही तें श्री गुसाईंजी आप श्री सर्वोत्तम में कहे हैं। श्री आचार्यजी महाप्रभून को नाम।

“ भक्तिमार्ग सर्वमार्गो वैलक्षणयानुभूतिकृत् ”

भावप्रकाश—तातें भक्तिमार्ग हु प्रथम हुतो औरहु सब भगवान की प्राप्त के मार्ग हुते परि ब्रजभक्तनके सनेह को मार्ग न हुतो। सो श्रीआचार्यजी महाप्रभू प्रगट किये। बिना सनेह पुष्टिमार्ग में अङ्गीकार न होइ और बिना सनेह सेवा है सो सेवा नांही। वे पूजा है। पूजा है सो मन्त्र के आधीन हैं और सेवा है सो भावात्मक हैं। ताईपें सूरदास जी गाए हैं।

• रागकेदारो •

भजि सखी भाव भाविक देव ।

कोटि साधन करो कोउ तउ न मानत सेव ॥ १ ॥

धूमकेत-कुंमार माग्यो कौन मार्ग प्रीत ।

पुरुषते सखी भाव उपज्यो सबै उलटी रीति ॥ २ ॥

बसन भूषन पलटि पहरे भावसों संजोय ।

उलटि मुद्रा दई अङ्कनि बरन सूधे होइ ॥ ३ ॥

वेद विधि को नैम नाहिन प्रीति की पहिचान ।

ब्रज बधू बस किये मँहन 'सूर' चतुर सुजान ॥४॥

ऐसो मार्ग प्रगट करिवे की श्री ठाकुरजी की इच्छा हती । तातें श्री आचार्यजी महाप्रभूनों ब्रह्मसम्बन्ध की आज्ञा दीनी ।

तब श्रीआचार्यजी महाप्रभू पवित्रा उपरना मिश्री सवारे श्रावण सुदि द्वादसी के लिये सिद्ध करि राखे हुते । सो वाही समें श्री ठाकुरजी कों पवित्रा पहराए । उपरना उढाए और मिश्री भोग धरी । ता पाछें श्री आचार्यजी महाप्रभू कहे जो दमला तें कछू सुनो ! तब दामोदरदासजी कहे जो श्री ठाकुरजी के बचन मैं सुने तो सही परि समुभयो नांही । तब श्री आचार्यजी महाप्रभू आप श्रीमुखतें कहे जो मोकों श्री ठाकुरजी नें आज्ञा दीनी है जो जीवन कों ब्रह्मसम्बन्ध करावो । तिनके सकल दोष दूर होइगे और मैं अङ्गीकार करोंगे । तातें ब्रह्मसम्बन्ध अवश्य करना । तब ए जो श्री आचार्यजी महाप्रभू की श्री ठाकुरजी सों जितनी आज्ञा भई ताको एक श्रीआचार्यजी महाप्रभू ग्रन्थ किये । ताको नाम 'सिद्धान्त रहस्य' ।

श्लोक—“श्रावणस्यामले पक्षे एकादश्यां महा निशि”

भावप्रकाश—यह वार्ता एकादशी की अर्द्धरात्र कों भई । ताते अर्द्धरात्रि कों ही मिश्री पवित्रा धराये । तातें श्रीनाथ जी कों और सातों स्वरूपनकों पवित्रा एकादशी के दिन ही धरयो जात है और उत्सव श्रीनाथजी के इहां एकादशी कों मानें हैं और श्री आचार्यजी महाप्रभू के घर सातों स्वरूपन के इहां एकादशी द्वादशी दोउ उत्सव माने हैं ।

तब श्रावण सुदी द्वादसी के दिना श्री आचार्यजी महाप्रभू

प्रथम ब्रह्मसम्बन्ध दामोदरदासको करवाए और । दामोदरदासजी श्री ठाकुरजी के वचन सुने परि समुझे नांही ।

भावप्रकाश—ताको हेतु यह जो समुझे तो स्वामी सेवक भाव न रहे और फेरि श्री आचार्यजी महाप्रभू इनको ब्रह्मसंबन्ध काहे को करावें । कैसें जो गोविन्द दुबे श्री रणछोडजी सों बातें करन लागे । तब श्री आचार्यजी महाप्रभू कथा श्रीश्रुबोधनी जी कहत हुते सो पोथी बांधो । जो तोसों श्री ठाकुरजी बातें करत हैं । तो अब हम तुमसों कथा काहेको कहें । तातें स्वामी सेवक भाव राखिवे के लिए दामोदर दासजी वचन सुनें परि समुझे नहीं । याको कारण आगे श्रीगुसाईजी दामोदरदास सों पूछेंगे जो तुम श्रीआचार्यजी महाप्रभूको कहा करि जानत हो । तब दामोदरदासजी कहे जो श्री ठाकुरजी तें अधिक जानत हों । तब श्री गुसाईजी कहे जो श्री ठाकुरजी तें अधिक काहे को कहत हो । तब दामोदरदासजी कहे जो महाराज दान बड़ो के दाता बड़ो । यामें यह सिद्ध भयो जो श्री ठाकुरजी श्रीआचार्यजी महाप्रभूके बस हैं ।

तब ब्रज में श्री आचार्यजी महाप्रभूको महात्म्य देखिकें बहुत सेवक भए ।

और कृष्णदासमेघन क्षत्री सो सोरम में रहते । सो एक महन्त के सेवक हते सो कृष्णदासमेघन ब्रज में आये । सो श्री आचार्यजी महाप्रभूके दर्शन करिकें यह मन में आई जो मैं श्रीआचार्यजी महाप्रभूको सेवक ही होऊ ।

भावप्रकाश—काहेतें जो इनको श्रीआचार्यजी महाप्रभूके दर्शन साक्षात्पूर्ण पुरुषोत्तम के भए और प्रभूदास जलोटा क्षत्री और

रामदास ये सब सेवक भये । सबनकों श्रीआचार्यजी महाप्रभू ब्रह्मसंदंभ करवाए ।

तब श्री आचार्यजी महाप्रभू सब सेवकन को संग लेके आप श्रीवृन्दावन परासोली होइ आन्यौर में सधू पांडे के घर के आगे एक बड़ो चोतरा हुतो ता ठोर श्री आचार्यजी महाप्रभू आप विराजे । इतने में सब ब्रजवासी देखे और कहन लागे जो ये तो कोऊ बड़े महापुरुष हैं । ऐसो तेज तो काहू मनुष्य के तो मोहडे पे न होइ । कहा जानिये यह कौन स्वरूप हैं । ऐसैं सब कोउ कहें तब सधू पांडे आये । हाथ जोरिकें कहै स्वामी कछू खाउगे ? तब कृष्णदासमेघन बोले जो आप तो सेवक विना काहू कौ लेत नांही हैं ।

और सधू पांडे के एक बेटी हती । बाकौ नाम नरो हुतो सो श्रीगोवर्द्धननाथजी बा पर बहुत कृपा करते । सो वे दोउ बिरियां सांभ सवारें दूध प्याइवे जाती । जब यह घर के काम काज में होइ तब न जाइ सके । तब ऊपरतें श्रीनाथजी याकूं पुकारें । तबउ न जाइ तो श्रीनाथजी याके घर जाइके दूध दही अरोगें मांगिलें । जैसे कोउ घर को बालक होइ तैसें श्रीनाथजी यासों हिले हैं ।

सो जा समें कृष्णदासमेघन सधूपांडे सों नांही करी । ताही समें श्रीगोवर्द्धननाथजी उपरतें पुकारिकें कहे । अरी नरो दूध ल्याउ । तब नरो ने कही जो आजु तो हमारें पाऊने



आए हैं । तब श्रीनाथजी कहे पाऊने आए हैं तो आछी भली भई, परि मोकों तो दूध ल्याउ । तब नरो नें कही जो हां वारी लाल लाई । सो नरो दूध को कटोरा भरि के ऊपर पर्वत पर ले गई । ता समें श्री आचार्यजी महाप्रभू दामोदरदासजी सों कहे जो दमला तू यह शब्द सुन्यो । तब दामोदरदास नें कह्यो जो हाँ महाराज सुन्यो । तब श्रीआचार्यजी महाप्रभू आप श्रीमुखते कहे जो यह शब्द और भारखंड को शब्द एक मिल्यो । ताते यही प्रगट भये हैं । ऐसो जान्यो परत है । ताते सवारें ऊपर चलेंगे । ऐसैं श्रीमुखते श्रीआचार्यजी महाप्रभू आप दामोदरदास सों कहे । इतने ही में नरो श्रीनाथजी कों दूध प्याइ के आई । तब श्रीआचार्यजी महाप्रभू आप श्रीमुखते कहे जो अरी यामें कछू है । तब नरो बोली और कह्यो जो महाराज रंचक है । तब श्रीआचार्यजी महाप्रभू श्रीमुखते कहे जो यह हमकों देहि । तब नरो ने कही जो महाराज और घर में बहुत है । जितनों चहिये तितनो लेऊ । तब श्रीआचार्यजी महाप्रभू कहे जो और तो हमारें नांही चहिये । हमारें तो यही चहिये ।

और सधू पांडे तो परम भगवदी हैं । श्रीगोवर्द्धननाथजी के परम कृपापात्र हैं । साक्षात् इनसों बातें करे हैं । चहिये सो मांगि लेत हैं । ता समें श्रीआचार्यजी महाप्रभू के साक्षात् पुरुषोत्तम के दर्शन भये सधूपांडे कों । तब सधू पांडे नें कही जो महाराज हमकों कृपा करके नाम दीजिये । हम हारे और

आप जीते । तब श्रीआचार्यजी महाप्रभू अनुग्रह करिके अपुने कीये । तब सब कछू उनको अंगीकार किये । तब रात्रिकों सधू पांडे और इनके बड़े भाई माणिकचंद और इनकी बेटी नरो और इनकी बहू भवांनी और ब्रजवासी बहुत बड़े बड़े हुते सो सब रात्रिकों श्रीआचार्यजी महाप्रभू के चोंतरा के पास आइके सब बैठे । तब श्रीआचार्यजी महाप्रभू आप सधू पांडे सों कहे जो कहो पांडे ऊपर देवदमन प्रगट भये हैं सो कौन रीतिसों प्रगट भये हैं ? इनकी सब वार्ता हमसों कहो । तब श्रीआचार्यजी महाप्रभू सों सधूपांडे श्रीगोवर्द्धननाथजी को प्रागट्य जा भांतिसों भयो ता भांतिसों कहति भये ।

जो-महाराज हमारी गाइन को एक ग्वाल हुतो सो वह सगरे गाम की गाइ चराइवे जातो । सो एक ब्राह्मण की गाइ बड़ी हुती । सो वेऊ चरिवे जाती सो चरिकें जब घर आवे तब वे ब्राह्मण दुहिवे बैठे । तब दूध रंचक हू न देइ और सवारे की वेर दुहिवे बैठे तो तब कछू थोरो सो देइ और सब चढाय राखे । सो वे ब्राह्मण बहुत कुटे । जो मेरी ऐसी बड़ी गाइ और दूध काहेतें नांही देत ? तब यह मन में निद्धीर कियो जो गाइ को ग्वाल दुहि लेत हैं । होइ तो ग्वाल सों कहूँ । तब सांभ समें घर आयो ग्वाल । तब वे ब्राह्मण ग्वाल कों जाइके खीज्यो । क्यों रे भैया ! तू मेरी गाइ दुहिकें पी जात है ? सो काहेतें ? तब वानें कही जो भैया हौं तो या बात कों जानतहु नांही । तू वृथा बिन देखें मेरो नाम लेत हैं सो आछो नांही । जो तें

रु कहे ? तो मैं काल्हि ठीक राखूंगो । तब सवारें ज  
 चराइवे कों गयो । तब सगरी गाइ तो वन में छोडि दीन  
 वाके पीछे पीछे डोले । वाकों नजरि में राखे जो याको  
 गेऊ और तो दुहिके न पी जात होइ । तब इतने में वह  
 बाल की दृष्टि बचाइ के पर्वत ऊपर चढी । तब वे  
 हू पर्वत ऊपर चढ्यो सो देखे दूरिते तो वह गाइ  
 न के ऊपर एक बड़ी सिला हुती । वामें एक छेद  
 गो वाके ऊपर ठाढी होइके आपते श्रवे । सो सगरो दूध  
 र डारिके नीचे उतरि आई । सो ग्वाल ने यह सब  
 देख्यो । तब वा ठौर गयो देखे तो एक सिला में छेद  
 रह देखिके ग्वाल हू नीचे उतरि आयो । सगरो दिन  
 बरायो । जब घर आयवे को समें भयो तब वह गाइ दृष्टि  
 के वैसे ही पर्वत ऊपर चढी । वह ग्वाल हू ऊपर चढ्यो  
 वे तो जैसे सवारे आपते श्रवत हुती तैसे हू अबहू  
 हू । फेरि गाइ पर्वत ऊपरते उतरि आई तब वा ग्वाल नै  
 ब्रह्मण के घर जाइके सब समाचार कहे जो भैया ऐसे तेरी  
 गेऊ विरियां पर्वत ऊपर जाइके आपते श्रवत है जो तू  
 ते तो सवारे मेरे संग चलि । हौं तोहि दिखाइ देऊंगो ।  
 । ब्राह्मण कों सुनिके आश्चर्य भयो । सो सवारो भयो  
 व वन कों चलीं तब बोउ गाइ गई । तब वह ब्राह्मण हू  
 पाछे चलयो । सो आगे जाइके पर्वत ऊपर गाइ चढी ।  
 ग्वाल और ब्राह्मण दोऊ पर्वत ऊपर चढे सो दूरिते देखे

तो गाइ दूध आपते ठाढी ठाढी श्रवत है । सो वा ब्राह्मण के मन में जब सांच आयो तब विचारयो जो या वात को अब कहा करनों ? तब वा ब्राह्मणने आइके यह सब बात हमसों कही । सो हमकों हूँ सुनिके आश्चर्य भयो । तब हम सब ब्राह्मण गाम के मुकदम और हू बड़े बड़े भेले भए और विचार कियो जो कहो भैया यह कहा कारण है । तब एक वृद्ध ब्राह्मण हुतो वानें कही जो भैया मैं तो ऐसे सुन्यों हैं जो जहां कछू धन होइ । तहां गाइ श्रवत हैं । तब हम यह निश्चय करिके सब पर्वत ऊपर जाइके देखें तो वा सिला में एक छेद है । तब विचारे जो या सिलाकों उठावें । तब हम सबनने मिलिके । यह बड़ी सिला हुती सो उठाई । तब नीचे तो एक सुन्दर लरिका बरस सात को ठाढो है । और वह सिला को छेद हुतो । सो मुख के उपर हुतो । सो वह दूध पीवत हतो । तब हम सबनने कही जो धन याके नीचे है सो सांचो है । ता पाछे हम दूध दही कों भोग धरे । सो सब अरोगें । आप इहाँ सब लरिकान में खेलें । और हम नाम पूछ्यो । तब अपनी नाम देवदमन बताए । और हम ऐसे जाने जो यह पर्वत को देवता है । ऐसी रीतिसों ये प्रगट भये । सो श्रीआचार्यजी महाप्रभू तो आप ईश्वर हैं । सब जानत हैं । अपनी वात आप पूछत हैं ।

भावप्रकाश—सो काहेते जो सब जगत में अपनी महात्म्य प्रगट न करें । तो भगवदी कहा गुन गान करें, ताहीते गोपलदासजी गाए हैं ।

“आपनी लीला वदन पोतें कही उच्चार आनन्द तें अक्षि दीधो ” ।

तब श्रीआचाजी महाप्रभू सवारे उठि स्नान करिकें स वैष्णवनकों संग ले आप गिरिराज ऊपर पधारे । तब श्री गोवर्द्धननाथजी श्री आचार्यजी महाप्रभूनकों देखिकें आप साम्हें पधारे । मिलवेकों अति हरखित भये । सो गोपालदासजी गाए हैं ।

“हरखेंते सामा आवियां श्री गोवर्द्धनउद्धरण” ।

तब श्रीगोवर्द्धननाथजी श्रीआचार्यजी महाप्रभूनसों मिले । बहुत प्रसन्न भये ।

श्रीगोवर्द्धननाथजी आप श्रीआचार्यजी महाप्रभून के लिये प्रगट भये हैं ।

भावप्रकाश—याको हेतु यह जो श्री आचार्यजी महाप्रभूनके आप आज्ञा दीनी जो तुम भूतल में प्रगट भये हैं । दैवी जीवन कों अङ्गीकार करो । दैवी जीव बहुत दिनन के मोते बिछुरे हैं । तब श्री आचार्यजी महाप्रभू श्रीठाकुरजी की आज्ञा तें भूतल में मनुष्य देह कें अङ्गीकार करिकें पधारे । और दैवी जीवन कों तो साक्षात् पूर्ण पुरुषोत्तम नन्दराय कुमार ऐसे दर्शन देत हैं । सो सबकों ऐसे दर्शन देहि ते सब कृतार्थ होइ जाइ । तातें मनुष्य देहकों नाट्य कीए । श्रीगुसांईज आप श्री वल्लभाष्टक में कहे हैं जो—

“वस्तुतः कृष्णएव”

ऐसो श्रीआचार्यजी महाप्रभून कों स्वरूप है जिनको परम भाग्य होइगो । सो पुष्टिमार्ग में अङ्गीकार होइगो । तिनके हृदय में । श्री आचार्यजी महाप्रभून कों ऐसो स्वरूप आवेगो ।

श्रीठाकुरजी श्रीआचार्यजी महाप्रभूनों आज्ञा दीनी जो तुम भूतल में पधारो । तब श्रीआचार्यजी महाप्रभू भूतल में प्रगट भये । सो श्रीठाकुरजी को श्रीआचार्यजी महाप्रभूनों दबो स्नेह है । ताहीतें श्रीआचार्यजी महाप्रभूनों नाम श्रीवल्लभ हैं । यमुनाष्टक के श्लोक में श्रीआचार्यजी महाप्रभू आपही अपनों स्वरूप प्रगट किये हैं जो—

“वदति वल्लभ श्रीहरे”

तब श्री आचार्यजी महाप्रभूनों विरह श्री ठाकुरजी ते न सह्यो गयो । ताते आपहू तत्काल भूतल में पधारो । ताते भगवत लीला अनन्त हैं । श्रीआचार्यजी महाप्रभू कहें । भगवत्स्वरूपहू अनन्त हैं । और पूतना ते आदि देकें । सब लीला अनन्त हैं ।

श्रीआचार्यजी महाप्रभू श्रीगोवर्द्धनधर प्रगट किये । सो ताको कारण यह जो श्री गोवर्द्धन परम कृपाल हैं । ईन्द्रने इतनों इतनों आइके अपकार कीयो । और वापर अनुग्रह किये ईन्द्रने गाइनको ब्रज भक्तन को ब्रज हो श्री गोवर्द्धनको सब भगवदीनको दोह कीयो परि श्रीगोवर्द्धननाथजी कछू मनमें न ल्याये । वाके ऊपर अनुग्रह करिकें फेरि वाकों अपने लोक पठाये । और वानें अपराध कीनों । सो आप सेवा करि माने जो ब्रजवासी तो सब सामग्री मोकों भोग धरे । और ईन्द्रने जल की सेवा करी यह जानिकें अनुग्रह किये । याहीतें श्रीगोवर्द्धननाथजी परम दयाल हैं । जीव तो अपराध भयो है । सो प्रभू परम कृपाल हैं । ऐसी दया बिना जीवको अङ्गीकार न होइ ।

तब श्रीगोवर्द्धननाथजी श्रीआचार्यजी महाप्रभूनों आज्ञा दीनी मेरी सेवा को प्रकार करो । मोकों पाट बैठावो । सेवा बिना दैवी जीवनकों पुष्टिमार्ग विषे अङ्गीकार न होइ याहीतें मैं प्रगट भयो हूँ । तब श्रीआचार्यजी महाप्रभू श्रीगोवर्द्धननाथजी को तत्काल एक छोटी सो मन्दिर सिद्ध करवायो । वामें श्री

गोवर्द्धननाथजी कों पधराए । और अपछरा कुण्ड के ऊपर एक गुफा है । सो वामें रामदासजी भगवदी रहते । सो सदां भजन करते । सो श्रीआचार्यजी महाप्रभूनों पधारे सुनिकें । आन्यौर में आये । श्रीआचार्यजी महाप्रभून के दर्सन कीये । और कहे महाराज मेरो अंगीकार करो । मैं आपके लिए बहुत दिना को श्रीगोवर्द्धन की कंदरा में तप करत हुतो । सो मेरो तप आजु सुफल भयो । तव श्री आचार्यजी महाप्रभू रामदास कों अंगीकार कीयो । और श्री आचार्यजी महाप्रभू आप रामदास कों आज्ञा दीनी जो श्रीगोवर्द्धन पर्वत में श्री गोवर्द्धननाथजी प्रगट भये हैं । सो तुम इनकी सेवा करो । तव रामदासजी कहे जो महाराज मैं तो कभूँ कछू सेवा कीनी नांही । सो मैं कैसे करूँ । तव श्रीआचार्यजी महाप्रभू आप श्रीमुखते कहे जो तोकों सब सेवा श्री गोवर्द्धननाथजी आप सिखावेंगे । तव श्रीआचार्यजी महाप्रभू मोरक्री चन्द्रकान कों मुकट सिद्धि करवायो । और पीतांबर काछनी सिद्ध करवाए । और सिद्ध करवाइके श्रीआचार्यजी महाप्रभू आप श्रीगोवर्द्धन नाथजी कों सिंगार किए । सो श्रीठाकुरजी बहुत सुन्दर दर्सन दिए । और श्रीआचार्यजी महाप्रभू रामदास सों कहे जो नित्य सवारें तुम गोविन्द कुण्ड में स्नान करिकें एक जल को पात्र भरिलाइयो और श्रीठाकुरजी कों स्नान कराइयो । पाछें अंग वस्त्र करिकें यह सिंगार जो हमनें कियो है सो धरियो । ऐसे नित्य करियो । और जो कछू भगवद इछातें तो कों प्राप्त होइ

सो नित्य भोग धरियो । तातें तू निर्वाह करियो । और दूध दही माखन तो सब ब्रजवासी भोग धरत ही हैं । और श्री आचार्यजी महाप्रभू सधूपांडे मांनिकचंद पांडे और आन्यौर में जो सब सेवक भए हते तिन सबन सों कही जो हमारो यह सर्वस्व हैं । इनकी तुम सब नीकी भांतिसों सेवा करनी । चौकी पहरा कोऊ उपद्रव होइ तो सब भांतिसों सावधान रहनों । ऐसैं आज्ञा देकें श्रीआचार्यजी महाप्रभू आप ब्रजयात्रा कों पधारे । सो संकेत बट के नीचें श्रीआचार्यजी महाप्रभून की बैठक है । सो प्रसिद्ध है । सब कोऊ वैष्णव भोग धरत हैं ।

सो एक दिन श्रीआचार्यजी महाप्रभू मनमें विचारे जो या समें दही होइ तो श्रीठाकुरजी कों समर्प्ये । सो श्रीआचार्यजी महाप्रभूनके मनकी । प्रभूदास जलोटा क्षत्री ने जानी । सो तत्काल उठे । सो गाम में गये । उहांतें दही लेकें वाकों मुक्ति दीनी । सो वार्ता में प्रसिद्ध हैं ।

भावप्रकाश—सो मुक्ति दीनी ताको कारण यह जो श्रीआचार्यजी महाप्रभूनके मनमें इह इच्छा भई जो मेरे सेवकन को महात्म्य जगत में प्रगट करूं । यामें यह सिद्ध भयो जो श्रीआचार्यजी महाप्रभू के सेवक में यह सामर्थ्य हैं । जो मुक्ति देत हैं । जो ब्रह्मादिकनसों न दीनी जाइ । और आगें भगवदीनकी सामर्थ्य प्रगट करेगे जो भगवदी भक्तिहू देत हैं । सो गदाधरदासजी नें माधवदास कों दीनी । ऐसो श्रीआचार्यजी महाप्रभू अपने सेवकन को महात्म प्रगट कियो ।

एक समें श्रीआचार्यजी महाप्रभू श्रीगोवर्द्धन की तरहटी



में गोवर्द्धन पूजा की ठौर उहां एक छोंकर को बृत्त है तहां श्री आचार्यजी महाप्रभू की बैठक है तहाँ एक समें श्री आचार्यजी महाप्रभू आप पोढे हुते । तहां और दामोदरदासजी बैठे हुते । तिनकी गोद में श्रीमस्तक हुतो । इतने में श्री गोवर्द्धननाथजी आप पर्वत ऊपरतें पधारे । तब दामोदरदासजी दूरितें हाथसों वरजे । तब श्री गोवर्द्धननाथजी उहांई ठाढे हो रहे । तब श्रीआचार्यजी महाप्रभू जागि परे । और उठिकें कही जो आप पधारो । तब श्रीगोवर्द्धननाथजी कहे जो तुम्हारो सेवक वरजे हैं जो आगें मति आओ । तब श्री आचार्यजी महाप्रभू कहे दमला क्यों वरजत है ? तब दामोदरदासजी कहे जो महाराज आप जागि परो ? ताके लिए मैं वरज्यो तब श्रीआचार्यजी महाप्रभू दामोदरदास सों खीजे । तब श्री गोवर्द्धननाथजी प्रसन्न होइकें कहे जो इनसों कछू मति कहो । इनकों ऐसैं ही चाहिए । सेवक को धर्म ऐसैं ही हैं । तब श्री आचार्यजी महाप्रभू प्रसन्न भए । दामोदरदासजी ऐसे भगवदी कृपा पात्र हुतो ।

तब श्री आचार्यजी महाप्रभू सों श्रीगोवर्द्धननाथजी कहे जो मोकों नूपुर बनवाइ देऊ । तब श्रीआचार्यजी महाप्रभू वेग सुवर्ण देकें एक वैष्णव कों मथुरा पठायो । जो याके वेगि नूपुर बनवाइ कें लेआव । तब वह वैष्णव नूपुर बनवाइ कें सिद्ध कराइकें ले आए । सो नूपुर श्रीआचार्यजी महाप्रभू लेकें श्रीगोवर्द्धननाथजी कों समर्प्ये । सो वे नूपुर बहुत सुन्दर बार्जे

श्रीगोवर्द्धननाथजी बहुत प्रसन्न भए । तेसो तो मुकट काछिनी को सिंगार । और तैसोई नूपुर को सब्द । जो दर्सन करे ताको मन हरिलें । और ब्रजवासीन के लरिकान सों खेलें । जैसे वे लरिका खेलें । तैसें उनके संग अनेक क्रीडा श्री गोवर्द्धननाथजी हू करें ।

सो सधूपांडे के पास एक ब्रजवासी हुतो । वाके घर में समृद्धि बहुत हुती । भेंस बहुत गाइ बहुत । वाके कुटुम्ब बोहोत बेटा नाती बहुये । सो सब श्रीआचार्यजी महाप्रभून की सरनि आये । सो वे श्रीआचार्यजी महाप्रभून के अनुग्रह तें कैसे भगवदी भए ? जिनके घर श्रीगोवर्द्धननाथजी पधारे ।

सो वाके घर में एक डोकरी हुती । सो बहुत वृद्ध हुती । सो सवारें वाकी बहू सब बिलौना करें । सो सगरो माखन भेलो करिकें वा डोकरी के आगें लाइ धरें । तब डोकरी जितने वाके घर में लरिका बहू हे तिन सवनकों वो डोकरी सवारें कलेउ देहि । रोटी ऊपर माखन धरिकें और दही और वा डोकरी कों दृष्टि बल थोरो हुतो । सो जो लरिका आवे ताको नाम पूछि पूछि कें देहि तब उन लरिकान में श्री गोवर्द्धननाथजी हू जांइ । सो कहें अरी मोहू कों देरी तब वह डोकरी माखन रोटी दही देहि । और पूछे जो अरे तेरो नाम कहा है ? तब श्री गोवर्द्धननाथजी कहें जो मेरो नाम देवदमन है । वो डोकरी तब कहे जो अरे तू पर्वत ऊपर रहत हैं । सोई है ? तब श्री गोवर्द्धननाथजी कहें हां ! तब वो डोकरी कहे जो देवदमन तू

मेरे घर नित्य आइकें कलेउ करि जैयो । वो डोकरी श्री-  
आचार्यजी महाप्रभूकी कृपातें । ऐसी भाग्यशील भई । जिन पे  
श्रीगोवर्द्धननाथजी ऐसो अनुग्रह करें ।

भावप्रकाश—अनुग्रह काहेतें करे जो बे सूधी बहुत । कछु  
प्रपंच में समझें नहीं । और भक्तिमार्ग की तो यह रीति है जो  
प्रपंच की विस्मृति होइ तो श्री ठाकुरजी अनुग्रह करें । और उनके तो  
प्रपंच स्वप्न ही में नहीं । तातें वे परम उत्तमाधिकारी हैं । तातें  
श्रीगोवर्द्धननाथजी उनसों साक्षात् बातें करें ।

तब श्रीआचार्यजी महाप्रभू श्रीगोवर्द्धननाथजी सों आज्ञा  
मांगिकें आप श्री गोकुल पधारे । सब वैष्णव संग है । आपके  
परम कृपा पात्र सेवक दामोदरदासजी प्रभृति सो श्रीआचार्यजी  
महाप्रभू आप मन में विचारें जो पृथ्वी पावन कों चलें  
तो आछो ।

भावप्रकाश—क्यों जो दैवी जीव तो इकठौर हैं नांही । सर्वत्र  
देशान्तरन में हैं ।

ऐसे श्रीआचार्यजी महाप्रभू दामोदरदासजी सों कहे ।  
वार्ता द्वितिया ॥ २ ॥

तब श्री आचार्यजी महाप्रभू । एक समें श्री गोकुल में  
गोविन्द घाट के ऊपर एक चोंतरा है । ताके ऊपर छोंकर को  
बृक्ष है । ताके नीचें श्री आचार्यजी महाप्रभू आप विराजे हैं ।  
सब सेवक राम ठाढ़े हैं । इतने में एक वैरागी आयो । सो  
आइकें वानें छोंकर की डारसों अपने सालिग्राम को बडुवा हुतो

सो लटकाइ दीयो । और कपड़ा उतारिके श्रीजमुनाजी के तीरपे धरयो । और आप स्नान करिवे पेठ्यो इतने में स्नान करिके जब आयो तब देखें तो उहां सालिंग्राम को बडुवा नांही । तब वा वैरागी नें श्री आचार्यजी महाप्रभूनसों कही जो महाराज मेरो इहां बडुवा हुतो सो इहां नांही । काहू आपके सेवक नें लीयो होइ तो मेरो ले दीजिये । तब श्री आचार्यजी महाप्रभू कहे जो हमारे सेवक तेरो बडुवा काहे को लेइंगे । तू जहां धरयो होइ तहांई देखि । सो इतने में देखे तो सगरो छोंकर बडुवानसों भरयो है । तब वा वैरागी नें । श्रीआचार्यजी महाप्रभूनसों कहे जो महाराज यह तो सगरो छोंकर बडुवानसों ही भरयो है । तब श्रीआचार्यजी महाप्रभू आप कहे जो तेरो एक उतारिले । सो इनमें तें उतारिवे लग्यो । तब देखे तो एक ही है । सो वानें उतारि लीयो । वा वैरागी कों श्रीआचार्यजी महाप्रभू ऐसो महात्म्य दिखाए परि वह दैवी जीव तो हतो नहीं जो सरन आवे । जो दैवी जीव होतो तो सरन आवतो । इतनों श्रीआचार्यजी महाप्रभू अपनों महात्म्य अपने सेवकन कों दिखाए । और छोंकर को स्वरूप प्रगट किये जो इह छोंकर ऐसो है ।

और जहां श्रीआचार्यजी महाप्रभून की बैठक है । तहां छोंकर कौ रूख हैं । और श्री गोकुल की बैठक ऊपर जो छोंकर है । ताको नाम ब्रह्म छोंकर है । या छोंकर के पात-पात भगवदरूप हैं । तहां तब श्रीआचार्यजी महाप्रभू यह

विचारे जो होइ तो प्रथम कासी चलें । कासी में मायावादी बहुत हैं । और सिवकी पुरी है । सो सब जीव भगवान तें बहिर्मुख हैं । तातें कासी चलिक्के मायावादीन कों जीतें और मायावाद को खंडन करें । तब सब वैष्णव संग लेके श्री-आचार्यजी महाप्रभू आप कासी पधारे । सो मणिकर्णिका ऊपर श्रीगङ्गाजी के तीर आप स्नान करिके तीर पे विगजे । ता समें उहां बड़े बड़े पण्डित स्नान करिवे कों आएँ हुते । सो श्रीआचार्यजी महाप्रभूनके दर्सन उनकों भये सो वे जानें जो ए बड़े पण्डित हैं । तब वे चरचा करन लागे सो चरचा में सबनकों निरुत्तर किये मायामत को खंडन किये । भक्ति-मार्ग स्थापन कीये ।

ता समें पुरुषोत्तमदास सेठ क्षत्री हुते सो उहां के नगर सेठ हुते सो ये मणिकर्णिका पे स्नान करन आए । तब उहां इनकों श्रीआचार्यजी महाप्रभून के दर्सन भये । सो साक्षात् पूर्ण पुरुषोत्तम के दर्सन भये । तब श्रीआचार्यजी महाप्रभून कों माष्टांग दंडवत कीये । ओर विनती करी जो महाराज मो पर अनुग्रह करिके मोकों अपनो करिये ! तब श्रीआचार्यजी महाप्रभू इनकों नाम ब्रह्मसम्बन्ध करवायो । तब सेठ पुरुषोत्तम दास विनती कीनी जो महाराज मेरे घर पधारिये । मेरो गृह पावन करिये । तब श्रीआचार्यजी महाप्रभू आप अनुग्रह करिके सब भगवदी संग लेके सेठ पुरुषोत्तमदास के घर पधारे । तब पुरुषोत्तमदास सेठ के घर के सब सेवक भये । सबनकों आप

अंगीकार किये और श्री मदनमोहनजी ठाकुर सेठ पुरुषोत्तम दास के माथे पधराए । और वही समें सेठ पुरुषोत्तमदास कों सेवा की सब रीति सिखाई । सेठ पुरुषोत्तमदास सपन्न बहुत हुते । सब पात्र सामग्री सब सिद्ध करिकें श्रीआचार्यजी महाप्रभू आप पाक करिकें श्री ठाकुरजी कों भोग समर्प्ये । पाछें आप भोजन करिकें सेठ पुरुषोत्तमदास के घर विराजे उहां ही आप रहे । सो पुरुषोत्तमदास सेठ के घर में श्रीआचार्यजी महाप्रभू की बैठक है गई । सो सब पण्डित उहां ही चरचा करिवे कों आवें । सो बड़े बड़े स्मार्त । मायावादी । उहां बहुत सो नित्य आइके भ्रमरो करे सो श्रीआचार्यजी महाप्रभू सबनकों निरुत्तर करिदेहि । तब एक दिन श्री आचार्यजी महाप्रभू विचारे जो यह नित्य उठिकें मायावादी आइके दुःख देत हैं सो ऐतो बहुत, कौन कौन सों माथो पचाइये । तब एक पत्राबलंबन । श्रीआचार्यजी महाप्रभू आप ग्रन्थ किये । सो ग्रन्थ एक पत्रा पर लिखिकें एक वैष्णव कों दिये । जो यह पत्र जाइके विश्वेस्वर महादेव के मन्दिर की भीत सों लगाइयो । सो श्री-आचार्यजी महाप्रभू आप वा पत्र के नीचे लिखे जो या पत्रकों बांचिके ता पीछे कोऊ हमसों वाद करिवे आईयो । सो विश्वेस्वर के दर्शन कों तो यहां सब मायावादी आवें । सो पत्र देखें जो जो उनके मन में चिंता सन्देह होइ । तो ताही को वामें उत्तर मिले सो गोपालदासजी गाए हैं बल्लभारूपानमें ।

“पत्राबलंबे पण्डित जीत्या मायिक मत मांतग” ।

सो वे पत्रा बांचिकें पाछें कोउ मायावादी श्रीआचार्यजी महा-  
 प्रभूनके पास जांइ ही नहीं । कैसे जैसे श्रीआचार्यजी महाप्रभून  
 के सेवक विष्णुदास । सो विष्णुदास यह विचारे जो सब माया-  
 वादी आइके श्रीगुसांईजी कों श्रम करिवावें हैं । सो विष्णु-  
 दास कों आछो न लाग्यो । सो जो मायावादी आवे कैसोई  
 पण्डित होइ । तासों पूछे जो तू क्यों आयो है । तब वे कहे  
 मैं श्रीगुसांईजी सों चरिचा करिवे कों आयो हूँ । ये बड़े पंडित  
 सुने हैं । तब विष्णुदासजी कहे । तुम कहां पढ़े हो । जो वे  
 बतावे ताही कों श्रीआचार्यजी महाप्रभून की कृपा बल सों  
 दूसन देहि । तब वे पण्डित निरुत्तर होइके जात रहैं । ऐसो  
 पत्रावलंबन ग्रन्थ श्रीआचार्यजी महाप्रभू कीये । जो जासों  
 वहिरमुखन सों संभाषण ही करनों न पड़े ।

तब श्रीआचार्यजी महाप्रभू सेठ पुरुषोत्तमदास के घर में ।  
 अपनी बैठक में विराजे । सो सेठ पुरुषोत्तमदास के बहुत  
 समृद्धि सो श्रीआचार्यजी महाप्रभून की सेवा भली भांति सों  
 करी । जैसे श्रीमदनमोहनजी की सेवा करें । तैसैं श्रीआचार्यजी  
 महाप्रभूजी की करें । तैसी ही रीति सों जे श्रीआचार्यजी  
 महाप्रभून के संग भगवदी हैं दामोदरदासजी कृष्णदासजी  
 मेघन प्रभृति । बहुत भगवदी सङ्ग हुते । तिनहूँ की सेवा आछी  
 भांति सों करें । सेठ पुरुषोत्तमदास के ऊपर श्रीआचार्यजी  
 महाप्रभून को बहुत अनुग्रह । जो तीन वस्तु चाहियें सो तीनों  
 वस्तु श्रीआचार्यजी महाप्रभून कों दीनी भगवत्सेवा, गुरुसेवा

और भगवदीन की सेवा । सो कासी में जे दैवी जीव हुते ते सब श्रीआचार्यजी महाप्रभू की सरनि आए ।

सो कासी में श्रीआचार्यजी महाप्रभू आप कितनेक दिन विराजे । ऐसे में जन्माष्टमी को उत्सव आयो । तब श्री आचार्यजी महाप्रभू मन में विचारे जो अवतार तो श्रीठाकुरजी के सभी हैं । परि कृष्णावतार सब अवतारन को मूल है । सब अवतार इनसों भये हैं । श्रीभागवत् में कहे हैं ।

“एतेचांशकलापुंशः कृष्णस्तु भगवान्स्वयं”

सो कृष्णावतार हमारो सर्वस्व हैं । और हमारे सेव्य हैं । और पुष्टिमार्ग इहां ही तें प्रगट भयो है । सो पुष्टिमार्ग कहा जो । ब्रजभक्तन को स्नेह सो सब स्नेह को मूल है । सो नन्द-महोत्सव है । श्रीआचार्यजी महाप्रभू आप प्रगट करिवे की इच्छा कीनी ।

भावप्रकाश—काहेतें जो नन्द महोत्सव आप प्रगट करें तो दैवी जीव जाने जो नन्दरायजी के घर ऐसो उत्सव प्रगट भयो । सो शुकदेवजी तो राजा परीक्षितसों कहिके बताये और श्रीआचार्यजी महाप्रभू तो अपुने दैवी जीवन कों साक्षात् नन्द महोत्सव के दर्शन करावाये । कैसें ? श्री ठाकुरजी तो आप पालनें भूलें । श्री रानीजी भुलावे ब्रजभक्त श्रीनन्दरायजी तथा गोप सब नृत्य करें । सो ऐसो उत्सव सेठ पुरुषोत्तमदास के घर श्री आचार्यजी महाप्रभू आप प्रथम ही प्रागट्य करनों विचारे । काहेतें जो बहुत समृद्धि बिना । यह उत्सव बनि न आवे । सो सेठ पुरुषोत्तमदास के घर जो वस्तु चाहियें । सो सब सिद्ध हैं ।

सो श्री मदनमोहनजी के आगें नन्द महोत्सव प्रथम ही



भयो । सो यह उत्सव श्रीआचार्यजी महाप्रभू सेठ पुरुषोत्तमदास के घर प्रगट किये । सेठ पुरुषोत्तमदास के ऊपर श्रीआचार्यजी महाप्रभू को ऐसो अनुग्रह है । सो श्रीआचार्यजी महाप्रभू सेठ पुरुषोत्तमदास कों नाम देवे की आज्ञा दीनी जो हम तो फेरि जब भगवत इच्छा होइगी तब इहां आवेंगे । और दैवी जीव तो बहुत तिन सबन को अंगीकार करनों । तातें सेठ पुरुषोत्तमदास कों नाम देवे की आज्ञा दीनी आज्ञा देकें श्री-आचार्यजी महाप्रभू आप श्री जगन्नाथजी पधारे । वार्ता तृतीय ॥ ३ ॥

तब श्रीआचार्यजी महाप्रभू दैवी जीवन को उद्धार करनों । और पृथ्वी कों पावन करनी । तीर्थन कों सनाथ करनों । मायामत को खंडन करनों । ताके लिये आप श्रीजगन्नाथरायजी पधारे सो श्रीजगन्नाथरायजी बड़ी पुरी है । पुरुषोत्तम क्षेत्र है सब पृथ्वी में प्रसिद्ध है और पूजा को बड़ो प्रकार है । ये मायावादीन सों सब देश आछादित हुतो । सो आप श्री-आचार्यजी महाप्रभू पुरुषोत्तम क्षेत्र पधारे । ता दिना एकादशी को दिन हुतो । सो आप जब पुरी में पधारे मन्दिर के निकट । तब एक कोउ महाप्रसाद ले आयो । सो उहां महा-प्रसाद को महात्म अधिक है । श्रीठाकुरजी के दर्शन तो पाछें और महाप्रसाद प्रथम । श्रीआचार्यजी महाप्रभू की तो यह प्रतिज्ञा है जो एकादसी के दिन तो जलहू न लेनों । और वानें तो आइकें महाप्रसाद दियो । सो श्रीआचार्यजी महाप्रभू आपु

श्रीहस्त में लिए सो आप तो साक्षात् ईश्वर । वेद में पुराण में जहां जहां महाप्रसाद को महात्म्य हुतो । सो वा समें श्री आचार्यजी महाप्रभू आप महात्म्य के श्लोक श्रीमुखते कहिवे लागे । सो कहते कहते एकादसी को दिन और रात्रि सब व्यतीत होइ गई । जब सवारो भयो । तब स्नान सन्ध्या की कछू मन में बाधा न राखी । और महाप्रसाद लिए । ता पाछें श्री जगन्नाथरायजी के दर्सन कीये । जो पुरुषोत्तमपुरी में श्री आचार्यजी महाप्रभून को ऐसो महात्म्य देखिकें सब कोउ कहे जो एतो साक्षात् ईश्वर हैं । मनुष्य, में तो यह विद्या न कहूँ देखी न सुनी । च्यारो वेद पुरान सब सास्त्र जिनके जिब्हाग्र । ऐसैं सब कोउ कहे । सो यह समाचार उहां के राजानें सुनें । सो सुनिकें राजा श्रीआचार्यजी महाप्रभून के दर्सन कों आयो । सो श्रीआचार्यजी महाप्रभून के दर्सन करिकें राजा बहुत प्रसन्न भयो । और कह्यो जो मेरो बडो भाग्य है जो में यह दर्सन पायो । और श्रीआचार्यजी महाप्रभून की विद्या और इनको सौन्दर्य तेज प्रताप देखिकें राजानें श्री आचार्यजी महाप्रभून सों विनती कीनी जो महाराज इहां हमारे देश में ब्राह्मणन को सदा आपस में क्लेश चलयो जात है । सो ये मायावादी तो अपुनी खेंच करे हैं । सो ये नित्य लरे हैं । सो आप साक्षात् ईश्वर हो । यह ब्रह्म क्लेश आप मिटाय देऊ । आप बिना ऐसी काहू की सामर्थ नाहीं । जो और काहू सों यह भ्रमरो निबडे । तब श्रीआचार्यजी महाप्रभू कहे जो हां । जैसे तुम्हारे मनोर्थ है

सो श्रीआचार्यजी सब सिद्ध करेंगे । प्रभू सर्व सामर्थ्य सहित हैं ।  
 और भक्त मनोरथ पूरक हैं । तब यह बात सुनिके राजा बहुत  
 प्रमत्त भयो । तब श्रीआचार्यजी महाप्रभू कहे जो जितने हैं  
 तुम्हारे इहां ब्राह्मण तिन सबनको एकत्र करो । और उनमें जो  
 बड़े बड़े पण्डित होइ सो आइके हम सों चरचा करें । तब  
 राजा सब ब्राह्मणन को बुलवायो । सो सब आइके श्रीजगन्नाथ-  
 रायजी के मन्दिर में भेले भये । वैष्णव स्मार्त और बड़े बड़े  
 मायावादी । सो राजाहू आइके बैठ्यो । तब श्री आचार्यजी  
 महाप्रभू आप मन्दिर में पधारे । सो सबन को ऐसे दर्सन भये  
 जो साक्षात् सूर्य के अग्नि हैं । ऐसे तेजोमय दर्सन भयो । उन  
 ब्राह्मणन में जे बड़े बड़े पण्डित हुते ते श्रीआचार्यजी महाप्रभू  
 सों वाद करन लागे । सो जो जो बे युक्ति लावें । सो श्री  
 आचार्यजी महाप्रभू उनकी सब युक्ति को खंडन करें । सो वे  
 सब निस्तर होइ जाइ । सो वे ब्राह्मण बहुत हुते । सो सवारे बे  
 बैठे । सो तीनि पहर ताई श्रीआचार्यजी महाप्रभू आप विराजे ।  
 और राजाहू बैठ्यो रह्यो । परि भगरो चुके नाहीं । तब श्री  
 आचार्यजी महाप्रभू ब्राह्मणन सों कहे जो तुम्हारे जो वाद है ।  
 ताको जो श्रीजगन्नाथरायजी कहे । सो प्रमाण । तब राजा  
 और ब्राह्मण कहे जो महाराज श्रीजगन्नाथरायजी कैसे कहेंगे ।  
 तब श्रीआचार्यजी महाप्रभू आप श्रीमुखते कहे । जो श्रीजगन्नाथ  
 रायजी आरोगत कैसे हैं तुम तो भोग धरत हो । तैसे ही  
 श्री जगन्नाथरायजी के आगे कागद कोरो और लेखन द्वा

घरो । जो मार्ग सांचो होइगो सो श्री जगन्नाथरायजी लिखि-  
 देइंगे । सो यह बात सुनिकें बड़ो आश्चर्य भयो । और कागद  
 लेखनि द्वात मंगवाए । तब श्रीआचार्यजी महाप्रभू आप राजासों  
 कहे जो मन्दिर में जे श्रीठाकुरजी के सेवक हैं । पंढ्या जे होइ  
 तिन सबन कों वाहिर काढो । और यह कागद लेखन द्वात  
 तुम जाइके श्री ठाकुरजी के आगें धरि आओ । और किवार  
 दे देऊ । और तुम उहां किवार के आगें बैठो । जब हम कहें  
 तब किवार खोलियो । सो जा भांति श्री आचार्यजी महाप्रभू  
 कहे ताही भांति सों राजा ने कीयो । और राजा आप किवार  
 के आगें बैठ्यो । जब श्रीजगन्नाथरायजी लिखि चुके तब श्री  
 आचार्यजी महाप्रभू राजा सों कहे जो अब किवार खोलो । तब  
 राजा किवार खोलिकें देखे तो श्री जगन्नाथरायजी के आगें  
 कागद लिख्यो धरयो है । तब श्रीआचार्यजी महाप्रभू राजा  
 सों कहे जो कागद ले आवो । तब राजा कागद ले आयो ।  
 तब श्रीआचार्यजी महाप्रभू कहे जो सब ब्राह्मणन कों दिखावो ।  
 तब सब ब्राह्मण कागद बांचे । सो श्री जगन्नाथरायजी के  
 हस्ताक्षर देखिकें सब प्रसन्न भये । सब कहे जो श्रीजगन्नाथ  
 रायजी लिखे सो सांच । सो वचन हमारे माथे पर । तब श्री  
 आचार्यजी महाप्रभून की सब कोउ स्तुति करन लागे । और  
 कहे जो धन्य ये जिनकी आज्ञा में श्रीठाकुरजी ऐसैं हैं । जो  
 ये कहें सो करें । वैष्णव मारग सत्य भयो । और मायामत को  
 खंडन भयो । और कह्यो जो महाराज आप साक्षात् ईश्वर हो ।

यह ब्रह्म क्लेश आप बिना और काहू सों न मिटतो ।

तब इतने में एक ब्राह्मण बड़ो मायावादी हुतो । सों बोल्यो जो हमकों तो यह लिख्यो प्रमान नांही । हम तो जो परंपरा करत हैं सो करेंगे । तब श्री आचार्यजी महाप्रभू राजा सों कहे जो सास्त्र की मर्यादा ऐसे हैं जो जाकों भगवद् वाक्य पे विस्वास न होइ ताकों म्लेच्छ जानिए । सो ताकों तुम राजा हो निश्चें करो । याकी माता सों पूछो जो यह कौन को वीर्य है । ब्रह्मवीर्य तो यह न होइ । तब राजा कों हूँ बुरो बहुत लाग्यो । सो वाकी माता कों बुलायो । और एकांत में पूछे जो सांच कहु । यह तेरो बेटा कौनतें उत्पन्न भयो है । नांतर तेरे प्राण जाइंगे । ऐसो वाकों भय दिखायो । तब जो हुतो सो वानें वृतांत कइयो । तब राजा और सब ब्राह्मण एही कहे जो साक्षात् ईश्वर हैं । और श्रीजगन्नाथरायजी आप लिखे सो श्लोक—

“एकं शास्त्रं देवकी पुत्रगीतमेंकोदेवोदेवकी पुत्रएव । मंत्रो-  
प्येकंतस्यनांमानियानिकर्मोप्येकस्तस्यदेवस्य सेवा” ॥ १ ॥

यह श्लोक श्रीजगन्नाथरायजी आप श्रीहस्त सों लिखे । सो याको अर्थ श्रीठाकुरजी कें श्रीमुख के वचन जो भगवद्गीता है सो प्रमाण । सब देवन में जो मुख्य श्री कृष्ण । सब देवतान के अनेक मंत्र हैं । परि जीव तो कृतार्थ । एक भगवन्नाम तें ही होय । और जीव तो अनेक देवतान की पूजा करे हैं । परि आवागमन काहू कौ न मिटे । सब संसार में ही भटके । और जीव कों भगवत्प्राप्ति तो एक भगवत्सेवा ही तें होइ । ऐसं

वैष्णव मारग श्रीजगन्नाथरायजी स्थापन किये । जो श्रीकृष्ण के भजन ही सों यह जीव कृतार्थ होइ । और काहू भांति सों न होइ । सो श्रीआचार्यजी महाप्रभू भक्ति मार्ग स्थापन किये । मायामत को खंडन किये । सो एसो श्रीआचार्यजी महाप्रभून को महात्म्य देखिकें जे दैवी जीव हुते ते शरण आये । जिनके लिए श्रीआचार्यजी महाप्रभू आप पधारे हैं । सो कछुक दिन उहां रहिकें पाछें श्रीआचार्यजी महाप्रभू आप पुरुषोत्तम क्षेत्र तें आगे । पृथ्वी पावन करिवे को पधारे । वार्ता चतुर्थ ॥ ४ ॥

अब श्रीआचार्यजी महाप्रभू दक्षिण देश को पधारे । सो सब भगवदीय दामोदरदासजी, कृष्णदासजी मेघन, प्रभृति और सब वैष्णव संग हे । सो श्रीआचार्यजी महाप्रभू आप पधारे हैं । सो एक दिवस में मार्ग में जात देखे तो एक बड़ो अजगर मरयो परयो है । और वाकें लक्षावधि चेंटा लगे हैं । श्री आचार्यजी महाप्रभू सो देखे । सो देखिकें आप कछू बोले नांही । सो और दिना तो श्रीआचार्यजी महाप्रभू आप मार्ग में पधारते कथा वार्ता करत चलते । सो वा दिना श्रीआचार्यजी महाप्रभू कछू बोले नांही । जहां उतारो हुतो तहां आप पधारे । सो तहां स्नान करिकें पाक सिद्ध किये । श्री ठाकुरजी को भोग समर्प्ये । पाछें श्री आचार्यजी महाप्रभू आप भोजन किये । परि काहू सों श्रीआचार्यजी महाप्रभू बोले नांही । तब दामोदरदासजी बिनती करी जो महाराज आपके चरणारविंद सों ऐ सब सेवक लगे हैं । ऐ सब अपुनों घर वार कुटुम्ब छोडिकें महाराज के

साथ आये हैं। सो ए अब आपके बचनामृतनसों सीचे बिना कैसें जीवेंगे। तब श्रीआचार्यजी महाप्रभू कहे जो दमला ते सवारे वह अजगर देख्यो ? तब दामोदरदास कहे जो हां महाराज में देख्यो, मरयो हुतो। और बाकों चेंटा लगे हुते। तब श्री-आचार्यजी महाप्रभू आप श्रीमुखते कहे जो यह अजगर पिछले जन्म में महन्त हुतो। और याने सेवक बहुत ही किये हे सो उदरार्थ जो मेरी जीवका चले। और उनके कृतार्थ करिबे की तो सामर्थ्य न भई। काहेते जो भगवत्सेवा। भगवन्नाम परायण होइ। तो जीव कृतार्थ होइ। सो यह तो उदर भरिबे के लिए महन्त भयो सो मरे पाछे आप तो अजगर भयो। और वे सब चेंटा भये हैं। सो याकों खात हैं। और कहत हैं जो अरे पापी। तोमें उद्धार करिबे की सामर्थ्य नाही हुती तो हमकों सेवक काहेकों कीयो ? हमारो जनमारो वृथा काहेकों खायो ? सो बाकों देखिके मोकों मनमें बहुत ग्लानि आई। तब दामोदरदासजी विनती कीये जो महाराज ऐसे आप कहा बिचारत हो। आप तो साक्षात् पूर्ण पुरुषोत्तम हो। आपके नाम को जो जीव एक बेरहू स्मरण करेगो ताको सब पाप भस्म होइ जाइगो। आप ती साक्षात् अग्निरूप हो। अग्निके संबन्ध ते कछू दोष रहत है ? तब श्रीआचार्यजी महाप्रभू प्रसन्न भये। और श्रीआचार्यजी महाप्रभू यह वार्ता ताहेके लिये प्रगट करी जो जीव सरण जाइ। सेवक होइ सो बेचारके होइ। ताते गुरु एक बल्लभाधीशजी हैं।

श्रीगुसाईजी सर्वोत्तम में श्रीआचार्यजी महाप्रभू का नाम  
कहे हैं जो ।

“श्रीकृष्ण ज्ञान दो गुरु”

सो ऐसो सिद्धान्त प्रगट करिकें ? श्रीआचार्यजी महाप्रभू  
आप आगें पधारे ।

सो श्रीद्वारिका श्रीरणछोडजी के दर्शन का पधारे । सो  
मार्ग में गुजरात पधारे । सो वैष्णव को समाज साथ बहुत  
हतो । सो श्रीआचार्यजी महाप्रभू अपना महात्म्य प्रगट करिवे  
के लिए, अपना ऐश्वर्य दिखाइवे के लिए, श्रीआचार्यजी महा-  
प्रभू आप चकडोल में विराजे । सो गुजरात के देसाधिपति के  
गोख नीचे व्हेकें आप पधारे । सो वह गुजरात को देसाधिपति  
महादुष्ट हुतो । धर्म को द्वेषी हुतो । सो वा देसाधिपति के  
आगें असवारी बैठिकें निकस न सके । सो ऊपरते खोजा की  
दृष्टि परी । तब वाने कही जो देखिये साहिव ! देखिये तो कैसी  
असवारी जाइ है ? तब वा देसाधिपतिने कह्यो जो अरे मूरिख !  
तू मोहि आगि ते लरावत है ? तेरे मौसों कछू वैर है कहा ?  
यह तो अग्नि है । मोकों भस्म करि डारे । तोकों दीसत नाही ?  
ता समें देसाधिपति का श्रीआचार्यजी महाप्रभू के दर्शन  
साक्षात् अग्नि को पुंज । तेजोमय से भये । सो देखिकें  
डरप्यो ।

पाछें श्रीआचार्यजी महाप्रभू उहां ते द्वारिका का पधारे ।  
सो मारग में गोविंददुबे सेवक भये । सो वे गोविंददुबे बहुत



पण्डित हुते । सो श्रीआचार्यजी महाप्रभू आप श्रीमुखते कथ  
 कहे । तब गोविंददुबे श्रोता होइ बैठे । और नवरत्न ग्रन्थ श्री  
 आचार्यजी महाप्रभू इनही के लिये किये । काहेते जो गोविंददुबे  
 एक समे विज्ञप्ति कीनी जो । महाराज मेरो मन सेवा में नाहं  
 लगे हैं । तब श्रीआचार्यजी महाप्रभू सेवा में मन लगिवे व  
 लिये । नवरत्न ग्रन्थ लिखिके दिये । और आप श्रीमुखते कहे  
 जो यह ग्रन्थ को पाठ करो । तुम्हारो मन सेवा में लगेगो ।  
 गोविंददुबे को जो श्रीआचार्यजी महाप्रभू आप अंगीकार किये  
 हैं । सो श्रीरखछोडजी साक्षात् गोविंददुबे सों बातें करे हैं ।  
 सो गोविंददुबे तो सब वैष्णवन के ऊपर अनुग्रह करिवे के  
 लिये । श्रीआचार्यजी महाप्रभू सों विनती कीनी जो । वैष्णव  
 नवरत्न को पाठ करेगो ? ताकी सर्व चिंता निवर्त होइगी ।  
 चिंता है सो महा दोष है । चिंता सो भगवन्नामको, भगवत्  
 सेवाको, वा जीव को अधिकार ही नहीं । ताते श्रीआचार्यजी  
 महाप्रभू अपने सेवकन की चिंता दूरि करिवे के लिये नवरत्न  
 ग्रन्थ प्रगट किये । गोविंददुबे के ऊपर श्रीआचार्यजी महाप्रभू  
 को ऐसो अनुग्रह । ता पाछे श्रीआचार्यजी महाप्रभू उहांते  
 द्वारिका पधारे । तब गोविंददुबेहू श्रीआचार्यजी महाप्रभू के  
 साथ द्वारिका आए । सो एक दिवस श्रीआचार्यजी महाप्रभू  
 द्वारिका में आप कथा कहत हुते । सो सब सेवक पास बैठे हुते ।  
 दामोदरदासजी हरसानी कृष्णदासजी मेघन । गोविंददुबे ।  
 राणाव्यास । रामदासजी । औरहू बहुत भगवदी हुते । और

श्रीरणछोडजी के सेवक बहुत । सो ता समें कथा में सब रसा-  
विष्ट भये । जैसे चन्द्रमा कों चकोर देखे । तैसें सब कोई श्री-  
आचार्यजी महाप्रभून कों श्रीमुख देखों । ऐसो श्रीआचार्यजी  
महाप्रभून को नाम है जो ।

“श्रीभागवत्पीयूष समुद्रमथनक्षमः”

सो श्रीभागवत्रूपी अमृतके समुद्र में सब भगवदीन कों  
श्रीआचार्यजी महाप्रभू मग्न करि दिये । काहूकों कळू देहा-  
ध्यास न रह्यो । ऐसी रीतिसों श्रीआचार्यजी महाप्रभू आप कथा  
कहत हुते । सो ऐसे में एक घटा उठी सो सब आकास घटा  
सों छाड़ गयो । सो जब बूंद आइवे लगी, तब श्रीआचार्यजी  
महाप्रभू श्रीहस्त सों वरजे । ता समें श्रीआचार्यजी महाप्रभू  
विराजे हुते । और जहां लों सब वैष्णव बैठे हुते तिनकी  
दूरि दूरि च्यारो आडी मेह वरसे । और बीच में एक चक्र सो  
रहि गयो । तहां एक बूंदहू न परी । ऐसें वर्षा बहुत भई । सो  
गोविंददुबे श्रीआचार्यजी महाप्रभून सों विनती कीनी जो ?  
महाराज हमतो आपको साक्षात पूर्णपुरुषोत्तम जानें हैं ।  
आपकी माया ऐसी है । जो एक छिन में अनेक ब्रह्मड को  
रचे हैं । और नाश करे हैं । सो आप हमकों ऐसो काहे कों  
दिखावत हो । हम तो आपको स्वरूप आछें जानत हैं ! काहेतें  
जो आप अनुग्रह करिकें दिखाए हो । तातें नांही तो आपको  
स्वरूप तों ऐसो है जो वेदहू नेति नेति कहे हैं । तातें जीव  
कहा जो जानें ? तब श्रीआचार्यजी महाप्रभू आप कहे जो

मैं कछू वर्षा याके लियें तो नांही बरज राखी जो तुम मेरो महात्म्य जानों । कथा कहत में उठनों परतो । ताके लिये ऐसे किये । उठे पाछें फेरि एसो रसावेश होइ के न होइ । तब भगवदी सब बहुत प्रसन्न भये । सो द्वारिका में श्रीआचार्यजी महाप्रभून के सेवक बहुत बहुत भये । पृथ्वी में औरहू बड़े बड़े भगवद्दाम हैं । श्रीजगन्नाथरायजी, श्रीरङ्गनाथजी, श्रीलक्ष्मणजी, श्रीबद्रीनाथजी, परि तामें श्रीद्वारिकाजी में श्रीआचार्यजी महाप्रभू अपुनी सत्ता राखी । तबतें श्रीआचार्यजी महाप्रभून के ही सेवक श्रीरणछोडजी की सेवा करे हैं । और श्रीआचार्यजी महाप्रभून की सत्ता जानिकें श्रीगुसांईजी छै बेर श्रीद्वारिका पधारे ।

ता पाछें श्रीआचार्यजी महाप्रभू द्वारिका तें नारायणसर पधारे । सो मारग में मोरवी में दोइ भाई पुष्करणां ब्राह्मण रहते । सो जब श्रीआचार्यजी महाप्रभू मोरवी पधारे । तब वे दोउ भाई श्रीआचार्यजी महाप्रभून के सरण आये सो वे दोउ भाई दैवी जीव हुते । तिनके लियें श्रीआचार्यजी महाप्रभू आप पधारे हुते । सो एक को नाम तो बाला हुतो । और दूसरे को बादा हुतो । सो बाला को नाम तो श्रीआचार्यजी महाप्रभू बालकृष्ण धरे । और बादा को नाम बादरायण धरे । ता पाछें उन दोउ भाई नें श्रीआचार्यजी महाप्रभून सों विनती कीनी जो महाराज अब हमारो निर्वाह कैसें करे ? तब श्रीआचार्यजी महाप्रभू आप श्रीमुखतें कहे । जो तुम भगवत्सेवा करो । तब उननें कहे जो

महाराज सेवा हमको पधराइ दीजे । तब श्रीआचार्यजी महाप्रभू आप कहे जो तुम एक वस्त्र लेआवो । तब वे वस्त्र ले आये । तब श्रीआचार्यजी महाप्रभू आप चरणारविंद सों कुंकुम लगाइके । वा वस्त्र ऊपर दोऊ चरणारविंद धरे । सो उनको अनुग्रह करिके अपने चरणारविंद की सेवा दीने । सो वे दोउ भाई श्रीआचार्यजी महाप्रभू की कृपाते बड़े भगवदी भये । पाछे उहांते श्रीआचार्यजी महाप्रभू सब वैष्णवन को संग लेके फेरि आप ब्रजको पधारे । वार्ता षष्टम् ॥ ६ ॥

एक समे श्रीआचार्यजी महाप्रभू ब्रजको चले । ता समे श्रीगोवर्द्धननाथजी विचारे जो मन्दिर तो छोटी । और समृद्धि तो बहुत भई । बड़े मन्दिर बिना सेवा को मंडान कैसे होइ । तब एक पूरणमल्ल क्षत्री जवल अंवालय में रहते । सो पूरणमल्ल की गांठि में द्रव्य बहुत हुतो । सो वह पूरणमल्ल दैवी जीव हुतो । उनको द्रव्यहू दैवी हुतो । सो श्रीगोवर्द्धननाथजी वाके घर पधारे । सो वासों श्रीगोवर्द्धननाथजी स्वप्न में कहे जो हम श्रीगोवर्द्धन पर्वत में ते प्रगट भये हैं । देवदमन हमारो नाम हैं । सो तू आइके हमारो मन्दिर श्रीगोवर्द्धन पर्वत ऊपर बनवाइ । सो स्वप्न में पूरणमल्ल को साक्षात् दर्शन भये । सो कोटिकंदर्पलावण्य सौंदर्य वाको दर्शन भये । सो सवारें भये पूरणमल्ल को चटपटी लगी । सो सब काम काज छोडिके पूरणमल्ल श्रीगोवर्द्धन आये । तब उहां आइके पूछे जो इहां देवदमन ठाकुर सुने हैं सो कहाँ हैं ? तब कोउ ब्रजवासी हुतो ।

तानें बताए जो पर्वत ऊपर हैं । तब पूर्णमल्ल पर्वत ऊपर आइके दर्सन किये । दर्सन करत ही पूर्णमल्ल बहुत प्रसन्न भयो । और मन में कहे जो अनुग्रह करिके मेरे घर पधारे मोकों दर्सन दिये । सो ऐही हैं । श्रीगोवर्द्धननाथजी को दंडवत करि पूर्णमल्ल रामदासजी चौहान सेवा करत हुते । तिनसों पूछे जो इहां सेवा तुम ही करत हो । के कोउ और ही सेवक है ? तब रामदासजी कहे जो इनके सेवक तो बहुत हैं । ऐ नीचे आन्यौर गाम है । इहां जो जो रहत हैं ते सब सेवक ही हैं । सब सेवा करत हैं । दूध दही माखन जो चाहिये सो ऐ सब कछू लावत हैं । इनको श्रीआचार्यजी महाप्रभू की आज्ञा है । इनको सौंपिके श्रीआचार्यजी महाप्रभू पधारे हैं । तब पूर्णमल्ल ने पूछी जो वे कौन हैं । तब रामदासजी कही । जो जिनके ऐ देवदमन ठाकुर हैं । जिनके लिये ऐ प्रगट भये हैं । सो श्रीआचार्यजी महाप्रभू पृथ्वी परिक्रमा को पधारे हैं । तब पूर्णमल्ल ने रामदास सों कही जो मोकों इनने आज्ञा दिये हैं जो तू मेरो मन्दिर बनवाइ । सो में इनको मन्दिर बनवाइवे के लिये आयोहूँ । ताते तुम मन्दिर बनवाइवे को उद्यम करो । तब रामदासजी कहे जो या गाम के मुकदम सधूपांडे हैं । तुम उनसों कहो । तब पूर्णमल्ल सब समाचार सधूपांडे सों कहे । तब सधूपांडे ने उत्तर दियो । अरे भैया ! यह मन्दिर तो मेरो और तेरो बनवायो बने नाहीं । जिनके ऐ ठाकुर हैं । सो पृथ्वी परिक्रमा को गए हैं सो अब वे आवेंगे तब जो वे आज्ञा देंगे

तो मन्दिर बनेगो । तब यह बात सुनिके पूर्णमल्ल विचारयो जो श्रीठाकुरजी आप मोकों बुलवायो हैं ताते घर तो न जानों । यह निर्द्धार करिके पूर्णमल्ल आन्यौर में रहे । श्रीआचार्यजी महाप्रभून को मार्ग देखे । सो श्रीआचार्यजी महाप्रभून को स्वभाव हैं जो । भक्त विरह कांतर करुणामय डोलत पाछें लागें । और श्रीगोवर्द्धननाथजी की इच्छा भई मन्दिर बनवाइबे की । ताते श्रीआचार्यजी महाप्रभू वेगि ब्रजमें पाउघारे । सो आइके श्रीगोवर्द्धननाथजी को दर्सन कीये । और सब वैष्णव श्रीआचार्यजी महाप्रभून के दर्सन करिके बहुत प्रसन्न भये । पूर्णमल्लहू श्रीआचार्यजी महाप्रभून के दर्सन करिके बहुत प्रसन्न भये । यों जाने जो एतो साक्षात ईश्वर हैं इनमें और श्रीठाकुरजी में कछू भेद नांही । तब पूर्णमल्ल ने श्रीआचार्यजी महाप्रभून सों विनती कीनी जो महाराज । मोकों नाम दीजिये । मोकों अपुनों करिये । तब श्रीआचार्यजी महाप्रभू अनुग्रह करिके अंगीकार किये । तब पूर्णमल्ल ने श्रीआचार्यजी महाप्रभून सों विनती कीनी और सब वृतांत क्यो । तब श्रीआचार्यजी महाप्रभू कहे हां हम पूछें । तब श्रीआचार्यजी महाप्रभू आप पूछे । तब आज्ञा भई जो मन्दिर सिद्ध करो । तब श्रीआचार्यजी महाप्रभू पूरणमल्ल को आज्ञा दीनी जो मन्दिर सिद्ध कराओ । तब पूरणमल्ल आगरे ते कारीगर बुलवाए । जां भांति सों मन्दिर सिद्ध भयो । सो पूर्णमल्ल की वार्ता में प्रसिद्ध है ।

सो मन्दिर सिद्ध भयो । मन्दिर बहुत बड़ो भयो श्रीगोव-  
 र्द्धननाथजी मन्दिर में विराजे । मन्दिर के ऊपर ध्वजा  
 फहराए । अक्षयतृतिया के दिन श्रीआचार्यजी महाप्रभू श्रीगोव-  
 र्द्धननाथजी को पाट बैठाए । सो दर्शन करिके पूरणमल्ल बहुत  
 प्रसन्न भए और कह्यो धन्य यह दिन जो श्रीठाकुरजी जैसे  
 मोको अनुग्रह करिके आज्ञा दीनी जैसे मेरो मनोर्थ सिद्ध भयो ।  
 तब श्रीआचार्यजी महाप्रभू पूरणमल्ल ऊपर बहुत प्रसन्न भये ।  
 और श्रीमुखते कहे जो पूरणमल्ल कछु मांगि । जो मांगे सोई  
 देऊं । तब पूरणमल्ल ने कही जो महाराज ! मेरो मनोर्थ यह  
 है । जो श्रीगोवर्द्धननाथजी को अरगजा में समर्पू । तब  
 श्रीआचार्यजी महाप्रभू अनुग्रह करिके कहे । जो हां समर्पि ।  
 जो तुम्हारो मनोर्थ होइ सो पूर्ण करो । तब पूरणमल्ल श्री-  
 गोवर्द्धननाथजी को अरगजा समर्प्ये । सो अरगजा समर्पिके  
 पूरणमल्ल बहुत प्रसन्न भये । तब श्रीआचार्यजी महाप्रभू पूरण-  
 मल्ल ऊपर बहुत प्रसन्न होइके अपनों ओढ्यो उपरना प्रसादी  
 पूरणमल्ल को दीए । तब पूरणमल्ल श्रीआचार्यजी महाप्रभू  
 को साष्टांग दंडवत करि आज्ञा मांगिके अपने घर अंवालय  
 को गये ।

पार्श्वे रामदासजी की देह छुटी तब श्रीआचार्यजी महाप्रभू  
 सधूपांडे को बुलवाये । और श्रीआचार्यजी महाप्रभू सधूपांडे को  
 आज्ञा दीनी जो श्रीगोवर्द्धननाथजी को मन्दिर तो बड़ो सिद्ध  
 भयो । सो ऐसे बड़े मन्दिर में सेवक हू बहुत चाहिएं । ताते तुम

ब्राह्मण हो । और यह मर्यादा है जो भगवत्सेवा ब्राह्मण करें तो आछो । तब सधूपण्डे नें कहे जो महाराज हमारी जातिके तो कछू आचार विचार जानत नांही तातें महाराज सेवा में तो कोई समझत होइ । ताकों राखिए । तब श्री-आचार्यजी महाप्रभू विचारे जो श्रीकुण्ड ( राधाकुण्ड ) में ब्राह्मण हैं । सो वैष्णव हैं । कृष्णचैतन्य के सेवक हैं । इनकों राखिये । तब श्रीआचार्यजी महाप्रभू उन बंगाली ब्राह्मणन कों बुलाये सेवा की आज्ञा दीनी । सेवा की रीति भांति बताई सिखाई सब और श्रीगोवर्द्धननाथजी को नित्य को नेग बांध्यो । इतनी सामग्री श्रीठाकुरजी नित्य अरोगें और श्रीआचार्यजी महाप्रभू बंगालीन सों कहे जो इतनों नेग तो तुमकों नित्य सधूपण्डे पहुँचाइ देहिंगे । और अधिक आवे तो अधिक उठाईयों और या नेग में ते तो मति घटाइयो और या महा-प्रसाद सों तुम निर्वाह करियो । और ऐसैं श्रीआचार्यजी महा-प्रभू सेवा की आज्ञा दीनी और कहे । जो इनको समें तुम कबहू मति चूकियो । भोग जो भगवद इच्छातें आइ प्राप्ति होइ सो धरियो । परि ठाकुरजी कों अवार न होइ ।

एक समें श्रीगोवर्द्धननाथजी श्रीआचार्यजी महाप्रभून सों कहे जो मोकों गाइ ल्याइ देऊ । तब श्रीआचार्यजी महाप्रभू कहे हां सिद्ध हैं । तब सधूपण्डे कों बुलाइके श्रीआचार्यजी महाप्रभू आप कहे जो श्रीगोवर्द्धननाथजी ऐसैं आज्ञा दिए हैं जो मोकों गाइ लाइ देऊ । सो यह सुवर्ण को वेढा है । सो



याकी गाइ आवे । सो आनि देखे । तब सधूपांडे नें कही जो महाराज घर में इतनों गौधन हैं । सो कौन को है ये गाइ भेस सब आपकी हैं हम तो तन मन धन सब आपको सौंप्यो है । हमारो रह्यो कहा है तातें जितनी गाइ आप आज्ञा करो । तितनी गाइ में ले आऊं । तब श्रीआचार्यजी महाप्रभू सधूपांडे सो कहे जो तुम ल्यावो ताकी तो हम नाही नांही करत । तुम्हारी इच्छा परि मोकों श्रीगोवर्द्धननाथजी नें आज्ञा दीनी जो है । ताके लिए तुम प्रथम तो हमारे या सुवर्ण की तो गाइ ले आवो । तब सधूपांडे प्रथम श्रीआचार्यजी महाप्रभून के या सुवर्ण की गाइ ले आये ।

सो गाइ श्रीआचार्यजी महाप्रभू श्रीगोवर्द्धननाथजी के आगें लाइ ठाढी कीनी तब सधूपांडे तथा और सब ब्रजवासी अपने अपने घरतें कोउ एक कोऊ द्वे गाइ लाइके श्रीगोवर्द्धननाथजी को भेट कीये । औरहूँ गाइ वैष्णवन के यहां ते बहुत आई तब श्रीआचार्यजी महाप्रभू श्रीगोवर्द्धननाथजी को नाम गोपाल धरे । और श्रीगुसाईजी गोपाल नाम सों गोपालपुर बसाये । और भगवदी गाए हैं ।

\* रागपूरवी \*

आगें गाइ पाछें गाइ इत गाइ उत गाइ गोविंदा को गाइन में बसिवोई भावे । गायन के संग धावे गाइन में सुचिपावे गायन की खुररेंनु हियें लगावे ॥ १ ॥

गाइन सों ब्रज छायो वैकुण्ठ विसरायो गाइन के हेत

गिर कर ले उठावे । छीतस्वामी गिरिधारी विठ्ठलेश वपुधारी ग्वालन को भेष किये गाइन में आवे ॥ २ ॥

सो गाइन की बहुत समृद्ध बठी । ग्वाल बहुत राखे । सो वे ग्वाल गाइ चरावन को जांइ । तब श्रीगोवर्द्धननाथजीहू गाइ चरावन को जांइ । वन में सो उहां ही छाक आवे । सो श्रीबलदेवजी सब ग्वालन को बांटे । सो श्रीगोवर्द्धननाथजी सब ग्वालन की मंडली में बैठिके । आपहू छाक खांइ । श्रीगुसांईजी छाक वनमें ले पधारे । सो वार्ता में प्रसिद्ध है । गाइन को दूध बहुत होइ । सो श्रीगोवर्द्धननाथजी दूध दही माखन बहुत अरोगे । ऐसी रीतिसों सो श्रीगोवर्द्धननाथजी की सेवा होइ ।

तब श्रीआचार्यजी महाप्रभू । एक दिवस श्रीगोकुल पधारे । सो गोविंदघाट ऊपर स्नान करिके अपुनी बैठक में विराजे । सब भगवदी आगे ठाढे हैं ता समें उहां एक ब्राह्मण आयो । सो वह ब्राह्मण पूजा मारगीय हुतो । सो वह ब्राह्मणउ उहां न्हायो । न्हाइके अपनी पूजा वानें खोली सो पूजा को साज सब मांग्यो । सो वाके पास एक बंटी हुती तामें एक ठाकुर को स्वरूप हुतो । और एक सालिग्राम हुते सो वह ब्राह्मण पूजा करिवे को बैख्यो । धूप दीप नैवेद्य करिके पाछे वानें फेरि बंटी में ठाकुरजी को पोढाए । और तिनकी छाती ऊपर सालिग्राम धरे । और बंटी को ढकना दियो ता समें श्रीआचार्यजी महाप्रभून की दृष्टि परी तब श्रीआचार्यजी महाप्रभू दामोदरदास सों कही जो या ब्राह्मण सों कहो जो तेरे सालिग्राम न्यारे धरि ।

ठाकुर के उदर पर मति बैठावे । तब दामोदरदासजी वा ब्राह्मण सों कही तब वानें कही जो महाराज अब तो कञ्छु ए ठाकुर हैं नहीं ठाकुर तो में बिसर्जन करि दीयो । तब श्रीआचार्यजी महाप्रभू कहे जो अरे भगवत्स्वरूप तो है । परि वा ब्राह्मण नें मानी नहीं तब वो अपनो पूजा को साज बांधिकें उठि चल्यो । तब फेरि दूसरे दिन आयो । स्नान करिकें जैसे पूजा करत हुते । तैसें फेरि करिवे लग्यो ।

ता समें श्रीआचार्यजी महाप्रभू सन्ध्या वंदन करत हुते । सब भगवदी पास ठाढे हुते तब ब्राह्मणनें वंटी खोल्या । देखे तो ठाकुर तो पोढे हैं । और सालिग्राम के टूक टूक व्हैगये । सो देखिकें ब्राह्मणनें बहुत दुःख पायो ? और श्रीआचार्यजी महाप्रभून सों कहे जो महाराज में काल्हि आपकी आज्ञा न मान्यो । सो मेरे सालिग्राम के टूक टूक व्हैगये बहुत भीकवे लग्यो । तब श्रीआचार्यजी महाप्रभू कहे जो । तू जो फेरि ऐसें न करे तो सालिग्राम आछे होइ जाइ । तब वानें कही जो महाराज । अब में फेरि ऐसें कभूं न करुंगो ।

तब श्रीआचार्यजी महाप्रभू कहे जो तू इनके सब टूक टूक जोरि । तब श्रीआचार्यजी महाप्रभू कहे जो तू इनके ऊपर जमुना जल डारि । सो वानें जमुना जल उनके ऊपर डारयो । सो वे सालिग्राम जैसे हुते तैसेई होइ गये । ऐसे श्रीआचार्यजी महाप्रभू अपने सेवकन के ऊपर अनुग्रह करिकें अपनो महात्म्य अनेक रीतिसों दिखाए । वार्तासप्तम ॥ ७ ॥

एक समें श्रीआचार्यजी महाप्रभू आप विचारे जो । हमकों श्रीठाकुरजी आज्ञा दीनी हैं जो । तुम भूतल में प्रगट होइ कें दैवी जीवन को उद्धार करो ।

भावप्रकाश—सो दैवी जीवन को उद्धार तो दोइ वस्तु सों ही होइ एक तो भगवद् रूप सों । एक तो भगवन्नाम सों तामें भगवद् रूप तो श्रीगोवर्द्धननाथजी प्रगट भए । अब भगवन्नाम प्रगट करयो चाहिये । नाम सों कहा । श्रीमद्भागवत् की टीका श्रीसुवोधनी में श्रीआचार्यजी महाप्रभू आप लिखे हैं जो जैसे व्यासजी कों श्रीठाकुरजी नें आज्ञा दीनी है जो तुम श्रीभागवत् प्रगट करो । तैसें श्रीठाकुरजी नें हमकों आज्ञा दीनी हैं । जो तुम श्रीभागवत की टीका करो ।

तब श्रीआचार्यजी महाप्रभू विचारे जो । कोउ लिखनवारो होइ तो टीका होइ । आप ऐसें विचारे । ऐसे में एक काश्मीर में बडो पंडित हुतो । केशवभट्ट वाको नाम । सो वानें अपने देस में सुनी जो श्रीआचार्यजी महाप्रभू प्रगट भए हैं । सो वे बहुत पंडित हैं सगरी दिग्विजे कीनी हैं । सगरी पृथ्वी के पंडित जीते हैं । चलो होइ तो उनसों मिलिए सो वे केशवभट्ट काहेकों आए जो श्रीआचार्यजी महाप्रभू तो सरस्वती उलंघन न करें । तानें श्रीआचार्यजी महाप्रभू के पास केशवभट्ट आयो । केशवभट्ट के संग सिष्य बहुत हुते तिनमें एक माधवभट्ट हुते । ते दैवी जीव हुते तिनके लिये केशवभट्ट आयो । सो आइके श्रीआचार्यजी महाप्रभू सों विनती करी जो । महाराज आप दिग्विजे किये हो सब पंडित जीते हो । भक्त मार्ग स्थापन किये हो । और आपको श्रीआचार्य पदवी है । और

श्रीभागवत् एकादस्कंध में श्रीठाकुरजी उद्धव सों कहे हैं जो आचार्य मेरो स्वरूप है । आचार्य कों कोई मनुष्य मति जानियो तार्ते आप साक्षात् भगवत्स्वरूप हो । मोकों अनुग्रह करिकें आप कछू पढाओ तब श्रीआचार्यजी महाप्रभू वा केशवभट्ट के आगें कथा कहें तब सब भगवदी सुनें । और माधवभट्ट केशवभट्ट के संग हुतो । सो उनहू सुनी । सो माधवभट्ट कों तो । श्रीआचार्य-जी महाप्रभून के श्रीमुखतें कथा सुनेते भक्ति उत्पन्न भई । काहेतें जो दैवी जीव हुते और केशवभट्ट तो श्रीआचार्यजी महाप्रभून की विद्या देखन कों आयो हुतो । सो वाकें कछू बोध न भयो ता पाछें केशवभट्ट अपने स्थल में जाइकें अपने सेवकन सों कथा कहे । सो माधवभट्ट उहां न जाइ । और माधवभट्ट केशवभट्ट सों उदास भयो रहे और माधवभट्ट अपने मन में यह विचारे जो मेरे तो श्रीआचार्यजी महाप्रभून के चरण-रविंद छोडिकें कहूँ न जानों तब एक दिन केशवभट्ट नें माधव-भट्ट सों कहे जो तू हमारी कथा छोडिकें उहां श्रीआचार्यजी महाप्रभून के सेवकन में बैठ्यो बैठ्यो बातें हाँसी करत है । तब माधवभट्ट नें कही जो तुम्हारी कथा सों मोकों उनकी हाँसी आछी लगे है । तब केशवभट्ट मनमें बहुत कुढ्यो जो । यह मेरे काम ते गयो । और माधवभट्ट ऐसो वचन काहेते कह्यो जो काहू भाँतिसों मेरो यह गोहन छोडे तब केशवभट्ट कितनेक दिन श्रीआचार्यजी महाप्रभून पास रह्यो । ता पाछें सीख मांगी और कहे जो महाराज में आपके श्रीमुखतें कथा सुनी परि

मोकों कछू बोध न भयो सो थाको कारण कहा । तब श्री-  
आचार्यजी महाप्रभू कहे जो तू निराभिमानी होइके कथा नही  
सुन्यो ताते तोकों बोध न भयो । और या बात को उत्तर हुतो  
सो श्रीआचार्यजी महाप्रभू गोप्य राखे । उत्तर कहा हुतो जो  
तू दैवी जीव होतो तो तोकूँ बोध होतो । सो यह बात कहिबे  
की न हुती ताते और उत्तर दे दिये । तब श्रीआचार्यजी महा-  
प्रभून सों केशवभट्ट ने कही जो महाराज यह माधवभट्ट मेरो  
सेवक है । सो मैं आपकी भेट करत हूँ । तब श्रीआचार्यजी  
महाप्रभू कहे जो बहुत अच्छो । यह तो हमारे चहिये सो  
माधवभट्ट बड़े भगवदी भये प्रथम तो बड़े पंडित तो हते ही ।

तब श्रीआचार्यजी महाप्रभू माधवभट्ट सों कहे जो हमारे ।  
श्रीभागवत की टीका करनी है । सो तुम लिखो सो श्रीआचा-  
र्यजी महाप्रभू आप श्रीमुखते कहत जाइ सो माधवभट्ट लिखत  
जाइ । जहां माधवभट्ट न समुझे तहां लिखनों छोडि देहि । तब  
श्रीआचार्यजी महाप्रभू समुझाइ के कहें । तब माधवभट्ट फेरि  
लिखे । ऐसे माधवभट्ट कृपापात्र भये ।

भावप्रकाश—श्रीसुबोधनीजी प्रगट भई । दोउ वस्तु सिद्ध भई ।  
श्रीगौवर्द्धननाथजी । श्रीगोवर्द्धन में ते प्रगट भये । और श्रीसुबोधनी ।  
श्रीआचार्यजी महाप्रभू प्रगट किये । और माधवभट्ट लिखे । सो दैवी  
जीवन के भागिसों भगवद्रूपहूँ प्रगट भयो । और भगवन्नामहूँ प्रगट  
भयो । सो निबन्ध में श्रीआचार्यजी माहाप्रभू प्रथम ही आप लिखे जो—

“रूपनामविभेदेन जगत् क्रीडतियोयत्:”

वार्ताअष्टम ॥ ८ ॥

एक समें श्रीआचार्यजी महाप्रभू ओरछा देश हैं तहां पधारे सो श्रीआचार्यजी महाप्रभू आप तो अन्तर्यामी ईस्वर । सो उहां आगे मायावादीन सों और वैष्णवन सों भगडा होत हुतो । सो वे मायावादी केसे हुते । जो साक्षात् देवी सरस्वती उननें पूजा करिकें बस में करि राखी-हुती । सो वो मायावादी जा देश में जांइ तहां एक घट धरें ताके ऊपर एक बस्त्र उढायें । और सबन सों भगडा करें और कहें जो यह साक्षात् सरस्वती हैं । जाकों ऐ सांचे करें सो सांचो । सो वो मायावादी जहां जांइ तहां जीतें । उनसों कोउ चरचा न करि सके सो उहां ओरछा के राजा । रामभद्र नारायण के इहां ब्राह्मणन की सभा इकठौरी भई । सो वो मायावादी सबन कों जीते । सो यह समाचार उहां श्रीआचार्यजी महाप्रभून नें सुनें सो सुनिकें श्री-आचार्यजी महाप्रभू । राजा की सभा में पधारे ।

सो श्रीआचार्यजी महाप्रभून के दर्सन राजा करिकें बहुत प्रसन्न भयो । तब श्रीआचार्यजी महाप्रभू राजा सों पूछी जो । तुम्हारे इहां ब्राह्मणन को कहा भगरो है । तब राजा नें कही जो महाराज वैष्णव तो सब हारे हैं । और ऐ साकत जीते हैं । तब श्रीआचार्यजी महाप्रभू पूछे जो मायावादी कैसें जीते हैं । तब राजानें कही जो महाराज साक्षात् देवी इनसों बोलत हैं । और इनको मार्ग कों सत्य कहत हैं तासों ए जीते हैं तब श्री-आचार्यजी महाप्रभू कहे जो हम देखें देवी कैसें बोलत है । तब राजा उन मायावादीन सों कहे जो बाबा अब तुम इनसों चरचा

करो, तब श्रीआचार्यजी महाप्रभून सों चरचा करन लागे । तब उनन कही जो महाराज साक्षात् सरस्वती हैं जो ये कहें सो सांच है । तब श्रीआचार्यजी महाप्रभू कहे जो हां कहो सो वह कछू बोले नांही बहुतेरो ब्राह्मण बुलावे परि वह घट में तें सब्द निकसैं नहीं ? तब श्रीआचार्यजी महाप्रभू राजा सों कहे जो ये सब पाखंडी हैं । वैष्णव मार्ग तो साक्षात् श्रीकृष्ण श्री-भागवत् एकादस्कंध में उद्धवजी सों कहे हैं जो वैष्णव है । सो मेरो अंग है मेरो ही स्वरूप वैष्णव को जानियो । वैष्णव विषे ज्ञाति बुद्धि राखे सो महा अपराधी है ठौर ठौर वैष्णव को महात्म्य वेद में पुराण में सास्त्र में कहे हैं । सो ये मायावादी वैष्णव मार्ग ते कैसें जीतेंगे । तब वो मायावादी निरुत्तर होइके देवी के ऊपर मरिवे को बैसे जो । तें हमारो सभा में मान भंग क्यों कीयो । तुम बोली क्यों नहीं तब देवी ने कही जो अरे अपराधी वो तो साक्षात् मेरे पति हैं, मैं उनके आगे लज्जा छोडिके कैसें बोलूं । मो सारखी तो इनके कोटिक दासी हैं । कोई मनुष्य होइ ताके आगे में बोलूं एतो साक्षात् पुरुषोत्तम हैं । सो यह सब समाचार । राजा ने सुने तब राजा मन में विचारे जो धन्य मेरो भाग्य जो । मेरे घर में साक्षात् ठाकुर पधारे हैं तब राजाहू श्रीआचार्यजी महाप्रभून को सेवक भयो । और बहुत देवी जीव सरण आये । और वैष्णव मारगी जो ब्राह्मण हुते । तब सब प्रसन्न भये जो हमारो धर्म श्रीआचार्यजी महाप्रभू राखे ।



तब वह राजा श्रीआचार्यजी महाप्रभून को कनकाभिषेक करायो । मायामति को खंडन भयो । भक्तिमार्ग को स्थापन कियो । पाछें श्रीआचार्यजी महाप्रभू आगे पृथ्वी पावन को पधारे ।

सो एक सभें कृष्णचैतन्य । श्रीआचार्यजी महाप्रभून के दर्शन करिकें कृष्णचैतन्य बहुत प्रसन्न भये । और कहे जो महाराज मेरो बडो भाग्य है जो मैं महाराज के दर्शन पायो । तब कृष्णचैतन्य श्रीआचार्यजी महाप्रभून के आगे भगवन्नाम को महात्म्य कहे जो ये श्रीठाकुरजी के चरणारविंद में जो मन लगावे तो । यह जीव कृतार्थ होइ जाइ ।

तब श्रीआचार्यजी महाप्रभू कहे जो हमारो मार्ग तो ऐसो नाहीं हमारो मार्ग में तो क्षण एकहू जो श्रीठाकुरजी के चरणारविंद में ते । मन काटे तो आसुरवेश होइ । ताही तें श्रीआचार्यजी महाप्रभू आप नवरत्न में कहे हैं जो ।

“तस्मात्सर्वात्मनानित्यं श्रीकृष्णःशरणंमम”

ऐसे जीव को अहर्निश कहनों पुष्टिमार्ग को ऐसो स्वरूप है यह वार्ता सब भगवदी श्रीआचार्यजी महाप्रभून के श्रीमुख सों सुने इनको सन्देह भयो जो । तब कृष्णदास मेघन मन में विचारे जो ऐसेहू भगवदी कोउ होइगें जो अहर्निश भगवन्नाम लेत हैं तब कृष्णदास मेघन को सन्देह आयो तब श्रीआचार्यजी महाप्रभून ने कृष्णदास मेघन के मन की जानी जो इनको सन्देह भयो है जो । कृष्णदास मेघन कछू पूछे होते तो

श्रीआचार्यजी महाप्रभूजी उत्तर देते श्रीआचार्यजी महाप्रभू तो आप मारग में पधारत हुते । सो मारग में एक सरोवर सुन्दर देखें । सो वा सरोवर के ऊपर वृक्ष बहुत हैं तब श्रीआचार्यजी महाप्रभू दामोदरदास सों कहे जो आज तो हम इहांही पाक करेंगे यह स्थल बहुत सुन्दर है ।

सो श्रीआचार्यजी महाप्रभू आप उहांही उतरे । सो आप ज्ञान करिकें पाक सिद्ध कीये । कृष्णदास मेघन पतोवा लेन गये । तब देखे तो सरोवर के तीर पर एक बडो जानवर वैठ्यो है । सो कृष्णदास मेघन अकस्मात वा जानवर के पास ही जाइ ठाढे भये । परि देखत भय लग्यो । तब विचारे जो भगवत् इच्छा है सो होइगी तब तातें भगवन्नाम लीजिये । तब कृष्णदास मेघन वा जनावर सों श्रीकृष्ण सुमिरण कीये । तब वा जनावरनें जल में डुबकी मारिकें जल पीयो । तब दूसरी बेर फेरि श्रीकृष्ण सुमिरण कीये तब फेरि वा जनावरनें जल पीयो, तब तीसरी बेर फेरि श्रीकृष्ण सुमिरण कीये । तब फेरि वा जनावरनें । डुबकी मारिकें जल पीयो । तब कृष्णदास उहांते प्रागें जाइकें पतोवा लीने । परि मनमें विस्मे बहुत । जो कछू समुझ परी नहीं जो यह कहा में तीन बेर श्रीकृष्ण सुमिरन लीयो । और बानें तीनों बेर जल पीयो । कछू याको आसय जान्यो नहीं । तब पतोवा लैकें कृष्णदास मेघन श्रीआचार्यजी महाप्रभू के निकट आये । तब श्रीआचार्यजी महाप्रभू आप कृष्णदास सों पूछे जो क्यों कृष्णदास तेरो सन्देह गयो । तब

कृष्णदाम मेघन कहे जो महाराज सन्देह तो आप जब अनुग्रह करिकें दूर करोगे तब दूर होइगो जीव तो सन्देह भरयो ही है । जीव की बुद्धि तो अलिप । तब श्रीआचार्यजी महाप्रभू कहे जो वो जो तें जीव देख्यो सो बहुत दिना को प्यासो हुतो । और जल के तीर ऊपर बैठ्यो हुतो और जल न पीये । जो जल पीऊँगो तो मेरो भगवन्नाम छूटि जाइगो । ऐसी भगवन्नाम पे आसक्ति है सो तुमनें भगवन्नाम वाकों सुनायो, सो वानें तीन वेर जल पीयो । जीव कों ऐसी भगवद नाम पे आसक्ति चाहिये । तब कृष्णदास मेघन सुनिकें बहुत प्रसन्न भए । मनको सन्देह गयो । वार्ता नवम् ॥ ६ ॥

एक समें श्रीआचार्यजी महाप्रभू पाडुरंग विठ्ठलनाथ पधारे । जो उहां जाइके बिराजे उहां श्रीआचार्यजी महाप्रभून की बैठक है । फेरि श्रीविठ्ठलनाथजी श्रीआचार्यजी महाप्रभून सों मिले, और कहे आप श्रीमुखतें जो आप विवाह करो । सो पाडुरंग विठ्ठलनाथजी काहे कों कहे जो तुम विवाह करो ।

भावप्रकाश—ताको कारण यह जो श्रीआचार्यजी महाप्रभून के मार्ग की तो बहुत दिन ताई स्थित हैं दैवी जीवन को अङ्गीकार बहुत दिना ताई करना हैं । और जो श्रीआचार्यजी महाप्रभू आप विवाह न करें तो । सिष्य द्वारा हू दैवी जीवन कों अङ्गीकार होइ जैसे सेठ पुरुषोत्तमदास नाम देते । गोपालदास नाम देते । चाचा हरिवंशहू नाम देते । ऐसे औरहू सेवकन कों नाम देवे की आज्ञा श्रीआचार्यजी महाप्रभून की हुती । सो श्रीठाकुरजी विचारे जो । ये जो भगवदी इनकी आज्ञा तें

नाम देत हैं । सो तो ये श्रीआचार्यजी महाप्रभू के कृपापात्र हैं । और अंग है ताते इनकों जीव कृतार्थ करिबे की सामर्थ्य है । जैसे गदाधरदास भक्ति दीनी । प्रभूदास मुक्ति दीनी । परि आगे तो काहू की ऐसी सामर्थ्य होइगी नांही । जैसे और वैष्णव सम्प्रदाय हैं । सो उनसों वेद मार्ग छूटि गयो है । जहां वेद मार्ग छूट्यो । तहां जीव कृतार्थ कहाते होइ । ताते श्रीआचार्यजी महाप्रभू विवाह न करें । तो यहू मार्ग वेद रहित होइ जातो । और वेद रहित मार्ग में जीव कृतार्थ न होतो । ताते श्रीपांडुरंग विठ्ठलनाथजी आज्ञा दीनी जो । तुम विवाह करो मैं तिहारे घर जन्म लेऊँगो ।

वहां कोऊ सन्देह करे जो श्रीविठ्ठलनाथजी आज्ञा दीनी । तो श्रीगोवर्द्धननाथजी आज्ञा क्यों न दीनी । ताको कारन यह जो भगवत्स्वरूप को श्रीआचार्यजी महाप्रभू स्पर्श करें । सो साक्षात् पूर्ण गुरुषोत्तम होइ जाइ ताते यह जानिये जो यह श्रीगोवर्द्धननाथजी ही आज्ञा दीनी । और छीतस्वामी पद जो गाए हैं । तामें हू ऐसे ही गाए हैं । जो छीत स्वामी गिरधरन श्रीविठ्ठल । ताते श्रीगुसांईजी साक्षात् श्रीगोवर्द्धनधर हैं । आगरे में एक वैष्णव श्रीगुसांईजी को पंखा करत हुतो । तिनकों सन्देह भयो । सो उनकों श्रीगुसांईजी साक्षात् श्रीगोवर्द्धनधर होइकें दर्सन दिए । ऐसे दर्सन श्रीगुसांईजी सबन को क्यों न देंहि जो ऐसे दर्सन सबन को देंहि । तो सब जगत कृतार्थ होइ जाइ । और श्रीआचार्यजी महाप्रभू । और श्रीगुसांईजी को प्रगट्य तो दैवी जीवन के उद्धार्य है । और आप सेवा मार्ग प्रगट कियो । सो आप सेवा करें तो । सेवा मार्ग प्रगट होइ । सो गोपालदासजी गाए हैं ।

आप सेवा करी सीखवे श्रीहरी भक्ति पक्ष वैभव सुट्ट कीयो ।

ताते आप साक्षात् ईश्वर हैं । परि सेवक भाव करिबे के लिए ।

मनुष्य देह को अनुकरण किये हैं ।

तब श्रीविठ्ठलनाथजी सों श्रीआचार्यजी महाप्रभू कहे जो हम विवाह कैसें करें । हमकों कन्या कौन देइगो । हमारो ते कहूँ एकठौर वास नहीं । और ब्रह्मचर्य आश्रम कों हम अंगीकार कियो है और पृथ्वी परिक्रमा करत हैं । सो हम कौनसों कहें जो हमकों कन्या देऊ । तब पांडुरंग विठ्ठलनाथजी कहे जो, में सब सिद्ध करि राख्यो हूँ । आप कासी पधारो उहां एक ब्राह्मण तुम्हारो मार्ग देखे है तब श्रीआचार्यजी महाप्रभू सब भगवदी संग लैके आप कासी कों पधारे । सो वह ब्राह्मण कैसें हुतो । वाके घर प्रजा न होत हुती और बृद्ध भयो, तब वानें श्रोठाकुरजी सों विनती करि प्रार्थना करी जो महाराज मेरे घर में प्रजा होइ तो मैं परमार्थ करूँ जो बेटा होइ तो काहू महापुरुष की भेट करि देऊँ और जो कन्या होय तो । ज्ञात में कोऊ अपूर्व निष्कंचन ब्राह्मण होइ ताकों कन्या देऊँ । सो भगवत् इच्छा ते वा ब्राह्मण के घर कन्या भई । सो कैसें कन्या भई । जिनको नाम श्रीमहालक्ष्मी धरे ।

भावप्रकाश—महालक्ष्मी काहेते जो जिनके पतिहू पुरुषोत्तम और पुत्रहू पुरुषोत्तम ।

सो वा ब्राह्मण के जब कन्या को विवाह काल आइ प्राप्ति भयो । तब वो नित्य कासी के द्वार पर जाइ ठाडो होइ । सो जो नगर में अपूर्व मनुष्य प्रवेश करे । वासों वो ज्ञात नाम पूछें सो नित्य ऐसें ही करें । सो ऐसें पूछत पूछत कितनेक दिन भये तब एक दिन श्रीआचार्यजी महाप्रभू कासी पधारे । सो

सब भगवदी आपके संग हैं सो श्रीआचार्यजी महाप्रभू आप कासी के द्वार विषे प्रवेश करत हुते । सो इतने में वह ब्राह्मण आइ ठाडो भयो । और श्रीआचार्यजी महाप्रभून सों पूछे जो आप कौन ज्ञाति हो तब श्रीआचार्यजी महाप्रभू आप श्रीमुखते कहे जो हम तैलंग ब्राह्मण हैं पृथ्वी परिक्रमा करत हैं और हम ब्रह्मचर्याश्रम में हैं । तब वा ब्राह्मणनें प्रसन्न होइके कही जो हमहूँ तैलंग ब्राह्मण हैं । और मेरे घर कन्या है सो में आपको दीनी । तब श्रीआचार्यजी महाप्रभू आप तो ईश्वर सब जानत हैं । और तापर पांडुरंग श्रीविठ्ठलनाथजी की आज्ञा भई हैं । ताते श्रीआचार्यजी महाप्रभू आप कहे जो बहुत अच्छो । तब वा ब्राह्मण नें आछो महूर्त देखिके पूछिके श्रीआचार्यजी महाप्रभून को विवाह कियो ।

भावप्रकाश—सो जैसे श्रीआचार्यजी महाप्रभू आप पूर्णपुरुषोत्तम । तैसें वो साक्षात् महालक्ष्मी जी ।

सो वा ब्राह्मण के और तो प्रजा कछू हती नांही । एक श्रीमहालक्ष्मीजी बेटी भई सो श्रीआचार्यजी महाप्रभून को विवाह करि दीयो । और घर में जो कछू हुतो सो सब श्रीआचार्यजी महाप्रभून को समर्प्यो श्रीआचार्यजी महाप्रभू आप तो विवाह करिके पृथ्वी पावन को पधारे । तीसरी परिक्रमा श्रीआचार्यजी महाप्रभू विवाह भये पाछे कीनी सो श्रीआचार्यजी महाप्रभू ब्रज में पधारे ।

सो श्रीगोवर्द्धननाथजी के दर्शन कीये । श्रीआचार्यजी

महाप्रभू को विवाह भयो । तासों श्रीगोवर्द्धननाथजी बहुत प्रसन्न भये । और श्रीआचार्यजी महाप्रभू को आज्ञा दीनो जो । काहू स्थल सिद्ध करिकें आप बिराजो, आप गृहस्थाश्रम को अङ्गीकार कियो हैं । तातें उहांतें श्रीगोवर्द्धननाथजी की आज्ञा लैके श्रीआचार्यजी महाप्रभू आप परासोली पधारे । तिनको नाम आदि बृन्दावन हैं सो उहां जाइके श्रीआचार्यजी महाप्रभू देखे । सो गोपालदासजी गाए हैं ।

त्यांथी श्रीबृन्दावन पाँउधारीया जहां मधुप करे भंकार ।  
 कुसुम द्रुम नवमल्लिका, मकरन्दनो नहिं पार ॥ १ ॥  
 तरु तमाल अति शोभिता, हेमयूथिका संजोड़ ।  
 ललना ते सुभगा लटकतां, हिंडे ते मोड़ामोड़ ॥ २ ॥  
 तान धुनि मुनि मयूर रूपे, सांभले धरि ध्यान ।  
 नित्य लीला गान श्रवणे करते मधु पान ॥ ३ ॥  
 कुंज सदन सोहामणुं शोभा तणो नहीं पार ।  
 विविधि रास मंडल रचना रची, खेले श्रीनंदकुमार ॥४॥

ऐसे परासोली में श्रीआचार्यजी महाप्रभू आप रासलीला के दर्शन कीये । ताही तें श्रीगुसाईंजी आप सर्वोत्तम में श्रीआचार्यजी महाप्रभू को नाम कहे हैं जो ।

“ रासलीलैकतात्पर्य ”

भावप्रकाश—रासलीला जो हैं । सो जितनी श्रीठाकुरजी की लीला हैं । तिन सबन में फलरूप लीला है । याही तें श्रीआचार्यजी महाप्रभू सुवोधनी में रासलीला को नाम फलप्रकर्ण धरचो है ।

ऐसे दर्शन श्रीआचार्यजी महाप्रभू करिकें आप श्रीगोकुल पधारे ।

भावप्रकाश—सो जैसे आदि वृन्दावन में आप साक्षात् रासलीला के दर्शन कीये । तैसे ही श्रीगोकुल में साक्षात् बाललीला के दर्शन किये । श्री आचार्यजी महाप्रभू आप तो साक्षात् ईश्वर हैं । रासलीलाहू आपकी हैं । और बाललीलाहू आपकी है । और आप ही सब करत हैं । परि इतनों जो भगवदी न्यारो करिकें गाये हैं सो जो न्यारो करिकें न गावें तो श्रीआचार्यजी महाप्रभू मानुष्य देह को अङ्गीकार किये हैं । और श्रीआचार्यजी ठाकुरजी सेव्य रूप भये । श्री आचार्यजी महाप्रभू आप सेवा के भाव को अङ्गीकार कियो है याही तें भगवदी गाये हैं ।

\* रागसारंग \*

भक्ति श्रीगोकुलतें प्रगट भई ।

पहिले करि श्रीवल्लभनन्दन फिर औरन सिखई ॥ १ ॥

चारघो बरन सरन अपुने करि विधिसों बांटी दई ।

श्रीविठ्ठलनाथ प्रताप तेजतें तीनों ताप गई ॥ २ ॥

प्रगट हुते द्वै प्रेति अदिक्षित तिनहूँ मांगि लई ।

अब उदरे कहत अपुने मुख पत्री लिखि पठई ॥ ३ ॥

श्रीवल्लभ विठ्ठल श्रीगिरिधर तीनो एक सही ।

नव प्रकार आधार नारायण घोक लोक निवही ॥ ४ ॥

तातें श्रीआचार्यजी महाप्रभू । श्रीगुसांईजी । और श्रीगोबर्द्धन-नाथजी एक स्वरूप हैं । और श्रीआचार्यजी महाप्रभू और श्रीगुसांईजी सेवा जो करे हैं सो जीवन के सिद्धार्थ सो भगवदी गाये हैं ।

॥ रागदेवगंधार ॥

आपुनपे अपुनी सेवा करत ।

आपुन प्रभू आपुन सेवक व्हे अपुनों रूप उर धरत ॥ १ ॥

आपुन धर्म करत सब जानत मरजादा अनुसरत ।

छीतस्वामि गिरिधरन श्रीविठ्ठल भक्त बछल बपु धरत ॥ २ ॥



अब श्रीआचार्यजी महाप्रभू श्रीगोकुल पधारे सो गोकुल में श्रीबलदेवजी के संग क्रीडा करत श्रीठाकुरजी के दर्शन भये तब श्रीआचार्यजी महाप्रभू मनमें कहे जो । श्रीठाकुरजी की इच्छा ऐसी दीसे है जो हम दोउ तुम्हारे घर प्रगट होइंगे । श्रीठाकुरजी की ऐसी इच्छा जानिकें श्रीआचार्यजी महाप्रभून के मन में बहुत आनन्द भयो ।

भावप्रकाश—बलदेवजी हैं तिनको नाम श्रीगोपीनाथजी धरेंगे । और श्रीनन्दराइ कुमार हैं तिनको नाम श्रीविठ्ठल धरेंगे और बलदेवजी साक्षात् वेद को स्वरूप हैं । सो वेद मार्ग को विस्तार करेंगे । और श्रीविठ्ठलनाथजी हैं । सो नन्दराय कुमार हैं । सो अपने जो दैवी जीव भगवदी हैं । तिनकों परमानन्द को दान करेंगे । याको भाव गोपाल-दासजी कहें हैं ।

रंगे ते रमतां दीठडां बलदेव श्रीगोविंद ।

पुत्र भावे प्रगटशे, मन ऊपज्यो आनन्द ॥ १ ॥

बलदेव श्रीगोपीनाथ कहिये श्रीविठ्ठल नंदा नन्द ।

ए वेद पंथ बिस्तारसे. जन आपशे आनन्द ॥ २ ॥

तब श्रीआचार्यजी महाप्रभू कासी कों पधारे । सो श्री-गोवर्द्धननाथजी आज्ञा दीनी है जो एकठौर आप बिराजो । सो श्रीआचार्यजी महाप्रभू यह श्रीगोवर्द्धननाथजी की आज्ञा मन में निद्वीर करिकें आप यह बिचारे जो कहूँ स्वतंतर वास करनों । जामें काहू की सत्ता न होइ तब श्रीआचार्यजी महाप्रभू कासी तें श्रीमहालक्ष्मीजी कों लैकें आप अडेल कों पधारे सो उहां स्थल करिकें आप बिराजे । सब भगवदी आज्ञा कारी

वेक आपके संग हैं । सो सब सेवा करत ही हैं और श्री-  
 प्राचार्यजी महाप्रभू आप भगवत्सेवा करें । सो श्रीमदनमोहनजी  
 तो अपने बडेन के ठाकुर हैं । श्रीआचार्यजी महाप्रभून के माता  
 श्रीइलम्मगारुजी दक्षिण तें पधराय ल्याई हैं सो और श्रीगोकु-  
 लनाथजी, श्रीआचार्यजी महाप्रभून के सासुरें ते पधारे । सो  
 श्रीआचार्यजी महाप्रभून के सुसर पंच पूजा करत हुते ।  
 तनमें श्रीगोकुलनाथजी बिराजत हुते सो जब श्रीआचार्यजी  
 हाप्रभू श्रीमहालक्ष्मीजी कों लैकें पधारे । तब श्रीआचार्यजी  
 हाप्रभून के सुसरनें पंच पूजा हती सो संग दीनी जो मेरे तो  
 लखू और प्रजा तो नाही जो इनकी पूजा करे । तार्ते आप ले  
 धारो तब श्रीआचार्यजी महाप्रभू सबनकों लेकें श्रीगंगाजी के  
 तीर विषें पधराये सो च्यारकों तो श्रीगङ्गाजी में पधराये ।  
 महादेव, भवानी, सूरज, गणेश, और जुगल श्रीस्वामिनीजी  
 सहित श्रीगोकुलनाथजी कों श्रीआचार्यजी महाप्रभू आप सेवा  
 तें राखे । सो जब चारोंन कों श्रीगङ्गाजी में पधराये । तब  
 तो चारों बोले जो आप ही हमकों न मानोंगे तो जगत में  
 हमकों कौन मानेगो, और हमारी पूजा कौन करेगो, तब श्री-  
 प्राचार्यजी महाप्रभू कहे जो हम तुमकों प्रस्ताव में बुलावेंगे ।  
 अब तुम्हारो समाधान करेंगे । तब वो प्रसन्न भये ।

भावप्रकाश—सो श्रीगोकुलनाथजी तिनको नाम श्रीआचार्यजी  
 हाप्रभू और श्रीमहालक्ष्मी ने गोवर्द्धननाथजी राखे काहेतें जो श्रीगोव-  
 र्द्धन इनके श्रीहस्त में हैं और एक श्रीहस्त में संख है, सो संख काहेतें  
 वे हैं जो जल को आदिदेव है और दोइ श्रीहस्त सों बेनुनाद करत हैं ।

सो बेनुनाद करिकें ब्रज भक्तन कों आनन्द देत हैं । या भांति कें श्रीगोकुलनाथजी को स्वरूप है ।

ऐसी रीति सों श्रीआचार्यजी महाप्रभू अडेल में बास करिकें सेवा करत हैं । अपने जे सेवक भगवदी हैं तिनकों सुख देत हैं । वार्तादशम ॥ १० ॥

अब जो श्रीआचार्यजी महाप्रभू ने ब्रज में श्रीबलदेवजी के और श्रीठाकुरजी के दर्सन कीए सो कैसे दर्सन कीए जो रमण करत हैं । सो श्रीबलदेवजी प्रथम प्रगट भये ।

भावप्रकाश—सो काहेतें बलदेवजी हैं सो श्रीठाकुरजी को धाम हैं ? अक्षर ब्रह्म हैं और साक्षात् शेष महा नाग हैं प्रथम सिंघासन शैव्या सिद्ध होइ तब श्रीठाकुरजी सहित पधारे सो श्रीबलदेवजी श्रीठाकुरजी की सब भांतिसों सेवा करत हैं ।

सो श्रीबलदेवजी श्रीगोपीनाथजी होइकें अडेल में सम्बत् १५६७ आश्विन कृष्ण १२ के दिन प्रगट भये । तब श्रीआचार्यजी महाप्रभू आप तीस वर्ष की बय को अंगीकार कीए हते और श्रीआचार्यजी महाप्रभू को नाम तो नित्य लीला बिनोदकृत है । सदा नित्य लीला अखंड विराजमान हैं सो श्रीगोपीनाथजी को प्रागख्य भयो ता पाछें श्रीआचार्यजी महाप्रभू आप कितनेक दिन लों अडेल ही में विराजे । फिर एक समें श्रीआचार्यजी महाप्रभू आप श्रीमहालक्ष्मीजी सहित चरणाद्रि पधारे । सो श्रीगङ्गाजी के तीरे हैं । सो उहां साक्षात् भगवान के चरणारविंद को चिन्ह हैं

सो उहां श्रीआचार्यजी महाप्रभू आप स्थल करिकें विराजे सो संवत् १५७२ के पौष कृष्ण ६ शुक्रवार के दिवस साक्षात् पूर्ण पुरुषोत्तम श्रीगोबर्द्धननाथजी । श्रीमन्नन्दराय कुमार श्रीयशोदोत्संगलालित । श्रीब्रजभक्तनके प्राण आधार आप प्रगट भये । कस्तूरी के तिलक सहित । जा समें श्रीगुसांईजी प्रगट भये । ताही समें एक कोउ ब्राह्मण श्रीविठ्ठलेशरायजी कों पधराइ कें ले आयो । सो बाही समें श्रीआचार्यजी महाप्रभू कों दीयो । सो श्रीआचार्यजी महाप्रभू के घर दोइ रीतिसों श्रीठाकुरजी प्रगट भये । सेव्य सेवक भावसों सो सेव्य सेवक भाव श्रीठाकुरजी आप अंगीकार किये ।

भावप्रकाश—काहेतें जो आप श्रीठाकुरजी की सेवा न करें । तो दैवी जीव सेवा को स्वरूप कहा जानते ताहीतें श्रीआचार्यजी महाप्रभू दैवी जीवन कों सेवा करिकेंहू बताई । और कहिकेंहू बताई ।

सो जा समें श्रीगुसांईजी को प्रागट्य भयो । ता समें अलौकिक रीत को बडो उत्सव भयो । सो वा उत्सव को अनुभव दामोदरदासजी हरसानी । कृष्णदासजी मेघन प्रभृति भगवदीन कों और गोपासदासजी गाए हैं जो ।

भावप्रकाश—सेरडिये वहेरे सुगन्ध । और फेरि गाए जो कोईक भागवंत ते समें । दास नों दास जाइ वारनें । बारनें रह्योरे उत्सव जुए ।

“फेरि मानिकचंदजी गाए हैं जो” ।

॥ रागदेवगंधार ॥

सुनि सुत को जसु लक्ष्मणनन्दन ढाडी निकट बुलायो ।

कंचन थार भरे मुक्ता फल भले बसन पहरायो ॥ १ ॥  
मन बाँछित फल सबहिन दीनों कीयो अजाचक ढाढी ।  
मानिकचन्द बलि बलि उदारता प्रीति निरंतर वाढी ॥ २ ॥

“और मानिकचन्दजी गाए हैं जो” ।

॥ रागदेवगंधार ॥

बहुरि कृष्ण श्रीगोकुल प्रगटे श्रीविठ्ठलनाथ हमारे ।  
द्वार वसुधा भार हरयो हरि कलियुग जीव उद्धार ॥१॥  
तब वसुदेव ग्रह प्रगट होइकेँ कंसादिक रिपु मारे ।  
अब श्रीवल्लभ ग्रह प्रगट होयकेँ मायावाद निवारे ॥२॥  
ऐसों को कवि है जुग महियां वरनें गुनजु तिहारे ।  
मानिकचन्द प्रभू कोँ सिव खोजत गावत वेद पुकारे ॥३॥

॥ रागदेवगंधार ॥

पौष कृष्ण नौमी को सुभ दिन पूत अक्काजी जायो हो ।  
निज जन सुनि सुनि सब आनन्दे हरखित करति वधायो ॥१॥  
नारदादि ब्रह्मादिक हरखित सुक सुनि अति सचुपायो हो ।  
श्रीभागवत विवेचन करिकेँ गूढ अर्थ प्रगटायो हो ॥२॥  
कलिके जीव उद्धारन कारन द्विज वपु धरि भुव आयो हो ।  
अति उदार श्रीलक्ष्मणनंदन देत दान मन भायो हो ॥३॥  
करत वेद धुनि विप्र महामुनि जात करम करवायो हो ।  
मानिकचंद श्रीविठ्ठल प्रभूकोँ विमलि विमलि जसु गायो हो ॥४॥

“और विष्णुदासजी गाए हैं” ।

॥ रागदेवगंधार ॥

भयो श्रीगोकुल में जै जैकार ।  
भक्त सुधा प्रगटे श्रीविठ्ठल कलियुग जीव निस्तार ॥ १ ॥

महा अघोर कटे या कलिके प्रगट कृष्ण अवतार ।  
विष्णुदास प्रभू पर न्यौछावरि तन मन धन बलिहार ॥ २ ॥

“और कृष्णदासजी गाए हैं” ।

॥ रागदेवगंधार ॥

गोकुल में आनन्द भयो है घर घर बजति वधाई ।  
श्रीवल्लभ प्रह प्रगट भये हैं श्रीविठ्ठल सुखदाई ॥ १ ॥  
सब मिलि संग चलो मेरे तुम जो भावे सो लीजे ।  
भये मनोरथ मन के भाये अपुनो चीत्यो कीजे ॥ २ ॥  
उदय भयो गोकुल को चन्द्रमा पूजी मन की आस ।  
भक्तन मन आनन्द भयो है दुःख द्वंद भयो नास ॥ ३ ॥  
देश देश के भिच्छुक गुनीजन रहसि बधावो गावें ।  
एक नाचे एक करे कुलाहल जो माँगे सो पावें ॥ ४ ॥  
काहे बिलंब करत भैयाहो वेगि चलो उठि धाई ।  
श्रीवल्लभ सुतको दर्शन देखे जनम जनम दुःख जाई ॥ ५ ॥  
अष्टसिद्ध नवनिध लक्ष्मी ठाढी रहति है द्वारे ।  
ताकी ओर दृष्टि करि भरिकें कोउ नाहि निहारे ॥ ६ ॥  
श्रीवल्लभ करुणामय सागर वांह पकरि गहि लीनों ।  
कृष्णदास अपुने ढाढी कों अभय पदारथ दीनों ॥ ७ ॥

“और छीतस्वामी गाए हैं” ।

॥ रागसारंग ॥

जे वसुदेव किये पूरन तप तेई फल फलित श्रीवल्लभ देह ।  
जे गोपाल हुते गोकुल में तेई अव आइ बसे करि गेह ॥ १ ॥  
जे सब गोप बधू ही ब्रज में तेई अब बेदरुचाभई येह ।  
छीतस्वामी गिरधरन श्रीविठ्ठल तेई येई येई तेई कछून संदेह ॥ २ ॥

“और नन्ददासजी गाए हैं” ।

॥ रागदेवगंधार ॥

प्रगटित सकलसृष्टि आधार । श्रीमद्बल्लभ राजकुमार ॥ १ ॥  
 ध्येय सदां पद अबुंज-सार । अगनित गुण महिमाजु अपार ॥२॥  
 धर्मादिक द्वारे प्रतिहार । षुष्टि भक्ति कों अंगीकार ॥ ३ ॥  
 श्रीविठ्ठल गिरधर अवतार । नंददास कीनों वलिहार ॥ ४ ॥

श्रीआचार्यजी महाप्रभून के सेवक भगवदी । श्रीगुसाईंजी  
 के जन्म उत्सव को दर्शन करिकें । अनेक प्रकार को जस  
 वर्णन किये ।

भावप्रकाश—कोउ ऐसो सन्देह करे जो ऐ भगवदी तो सब  
 गीछें आये हैं । और श्रीगुसाईंजी को प्रागट्य तो पहलें हैं । तातें ये  
 कैसे गाए । तहाँ कहत हैं जो ऐसो सन्देह न करनों । काहेतें जो, जो  
 भगवत लीला । भगवज्जस और भगवदी नित्य हैं । काहेतें जो सूर-  
 दारुजी नन्दरायजी सों कहे हैं । और गाए हैं ।

॥ राममारु ॥

नन्दजू मेरे मन आनन्द भयो सुनि गोवर्द्धन ते आयो ।  
 तुम्हारे पुत्र भयो हो सुनिकें हों अति आतुर उठि धायो ॥ १ ॥  
 वंदीजन और भिक्षुक सुनि सुनि देश देशते आये ।  
 एक पहिलेई आसा लागी बहुत दिनन के छाये ॥ २ ॥  
 तुम दीने कंचन मनिमुक्ता नाना बसन अनूप ।  
 मोहि मिले मारग में मानों जात कहूँ के भूप ॥ ३ ॥  
 दीजे मोह कृपा करि सोई जो हों आयो मांगन ।  
 जसुमति सुत अपने पाइन चलि खेलन आवें आंगन ॥ ४ ॥  
 कोटि देहु तो परचो रहूँगो बिनु देखे नहीं जैहों ।  
 नन्दराइ सुनि बिनती मेरी तब ही विदा भले लेहों ॥ ५ ॥

तुम तो परम उदार नन्दजू जो माग्यो सो दीनों ।  
 ऐसो और कौन त्रिभुवन में तुम सरसाखो कीनों ॥ ६ ॥  
 मदनमोहन मैया कहि टेरे यह सुनिकें घर जाऊं ।  
 होंतो तिहारे घर को ढाढी सूरदास मेरो नाऊं ॥ ७ ॥

भावप्रकाश—सो सूरदासजी तो जब श्रीआचार्यजी महाप्रभू को प्रागट्य भयो है । तब इनको जन्म हैं । और श्रीनन्दराइजी तो द्वापुर के अन्त में हुते । तब श्रीठाकुरजी प्रगटे पे ऐसैं जानिये जो । भगवदी नित्य हैं । जब जब भगवान अवतार लेत हैं । तब तब भगवदी हू । आवत हैं जश गाइवे कों । ताहीतें भगवदी गाये हैं जो—

“नित्य लीला नित्य नौतन श्रुति न पावें पार” ।

श्रीगुसाईजी के जश को वर्णन कोऊ कहां ताई करे ।

“सो छीतस्वामी गाये हैं” ।

॥ रागभैरव ॥

जै जै जै श्रीवल्लभ नन्द । कोटि कला श्रीवृन्दावन चन्द ॥ १ ॥  
 निगम विचारे न लहैं पार । सो ठाकुर श्रीअक्काजी के द्वार ॥ २ ॥  
 लीला करि गिर धरचो हाथ । छीतस्वामी श्रीविट्ठल नाथ ॥ ३ ॥

या भांतिसों श्रीगुसाईजी को प्रागट्य भयो । फेरि श्री-  
 आचार्यजी महाप्रभू सब कुडुम्ब लैकें आप अडेल बिराजे । अब  
 सेव्य स्वरूप तीनि भये । श्रीगोकुलनाथजी, श्रीमदनमोहनजी,  
 श्रीविट्ठलनाथजी अब एक समें । श्रीआचार्यजी महाप्रभू ब्रजमें  
 पाउं धारे । सो श्रीगोकुल में बिराजत हते । और श्रीनवनीत-  
 प्रियाजी गज्जन धावन कें घर आगरेमें बिराजत हुते । सो श्री-  
 नवनीतप्रियाजी श्रीआचार्यजी महाप्रभू के मन की जानी,



कहा जानी जो श्रीआचार्यजी महाप्रभून ने यह विचारे जो ।  
 सब स्वरूपन के अधिनाइक तो श्रीनवनीतप्रियाजी हैं । सो श्री-  
 नवनीतप्रियाजी पधारें तो आछो । हमही नें श्रीनवनीतप्रियाजी  
 गज्जन धावन कों पधराइ दीये हैं । और उनसों श्रीनवनीत-  
 प्रियाजी लेहि सो वो कछू नांही । तो वो नांही तो कछू  
 करत नांही । वो तो दे देहिगो । पर उनकों श्रीनवनीतप्रियाजी  
 ऊपर आशक्ति बहुत हैं । श्रीनवनीतप्रियाजी बिना छिनहूँ उनसों  
 न रह्यो जात । तातें जब भगवदइच्छा होइगी तब पधारेंगे ।  
 सो यह श्रीआचार्य महाप्रभून के मन की जानिकें श्रीनवनीत-  
 प्रियाजी गज्जन धावन कों कहे जो मोकों तू श्रीगोकुल ले चलि  
 श्रीआचार्यजी महाप्रभून के पास । मोकों पधराउ । सो वाही  
 समें गज्जन धावन श्रीनवनीतप्रियाजी कों पधराइकेँ श्रीगोकुल  
 आए । सो आइकेँ गज्जन धामन श्रीआचार्यजी महाप्रभून सों  
 कहे जो महाराज श्रीनवनीतप्रियाजी पधारे हैं । तब श्रीआचार्य-  
 जी महाप्रभू कहे जो कछू शैज्या सिंघासन सिद्ध नांही  
 अकस्मात् कैसें पधराये हैं । तब गज्जन धामन नें कह्यो जो  
 महाराज सो तो श्रीनवनीतप्रियाजी जानें, मोकों तो श्रीनवनीत-  
 प्रियाजी जैसें आज्ञा कीनी तैसें में कीयो । सेवक कों तो आज्ञा  
 ही मुख्य है । और आप मोकों प्रथम ऐसें ही आज्ञा दिये जो  
 जैसें श्रीनवनीतप्रियाजी प्रसन्न होहि तैसें ही करियो । मोपे तो  
 आपके अनुग्रह तें श्रीनवनीतप्रियाजी आज्ञा करत हैं, बोलत हैं ।  
 तब श्रीआचार्यजी महाप्रभू बहुत प्रसन्न भये । गज्जन धावन

की जैसी आसक्ति श्रीनवनीतप्रियाजी ऊपर हैं तैसी श्रीनवनीत-प्रियाजी की आसक्ति गज्जन धावन पे हैं । सो श्रीठाकुरजी गीता में कहे हैं जो—

श्लोक—“येयथामां प्रपद्यंतेस्तांतथैवभजाम्यहं” ।

जैसी रीतियों कोउ मेरो भजन करे तैसी रीतियों । में वाको भजन करत हूँ । तातें ऐसी ही आशक्ति गज्जनधावन की श्रीनवनीतप्रियाजी के ऊपर देखिकें श्रीआचार्यजी महाप्रभू गज्जनधावन को अपुने चरणारविंद के निकट ही राखे । जैसे दामोदरदासजी हरसानी कृष्णदास मेघन । आपके चरणारविंद के संग ही सदैव रहत हैं । तैसें गज्जन धावन को हूँ अपुने चरणारविंद के समीप राखें । तब श्रीआचार्यजी महाप्रभू श्रीनवनीतप्रियाजी को पधराइ के आप अडेल को पधारे ।

तब श्रीनवनीतप्रियाजी सिंघासन ऊपर विराजे और श्रीआचार्यजी महाप्रभू गज्जन धावन को आज्ञा दीनी जो तुम मन्दिर के आगे सदां बैठे रहो । काहेते जो श्रीनवनीतप्रियाजी इनसों हिले हैं । गज्जन धावन बिना श्रीनवनीतप्रियाजी छिनहूँ नांही रहत श्रीनवनीतप्रियाजी अनेक भांतियों क्रीडा गज्जनधावन सों करत हैं । कबहुँक हाथी करत हैं, कबहुँक घोरा करत हैं, कबहुँक गाइ करत हैं, कबहुँक बत्स करत हैं । सो काहेतें जब हाथी करत हैं, तब तो आप ग्रीवा ऊपर विराजत हैं । जब घोड़ा करत हैं तब पीठ ऊपर विराजत हैं जब गाइ करत हैं तब अपने पीतांबर सों गाइ को श्रीमुख पोछें । और


बछरा करें । तब इनकों पकरि राखें । चलन न देंहि । ऐसैं करत करत गज्जन धावन कों ऐसो सुख दियो । अब श्री-आचार्यजी महाप्रभून के घर चारि स्वरूप विराजें श्रीनवनीत-प्रियाजी, श्रीविठ्ठलनाथजी, श्रीगोकुलनाथजी, श्रीमदनमोहनजी, और दामोदरदास कन्नौज में रहते । सो श्रीद्वारिकानाथजी की सेवा करते । सो श्रीआचार्यजी महाप्रभून के अनुग्रह तें दामोदरदास संभरवालेने भली भांति सेवा कीनी । जैसे राजान के घर सेवा होइ तैसैं करें । और श्रीआचार्यजी महाप्रभू आप श्रीमुखतें कहे जो जानें राजा अंवरीष न देख्यो होइ । सो दामोदरदास कों देखे । परि वो मर्यादा मारगी हते । और ये पुष्टिमरगीय हैं । इतनों इनमें अधिक हैं । या भांति सों श्री-आचार्यजी महाप्रभू अपुने श्रीमुखतें दामोदरदासजी संभर वाले की सराहना करते, सो जब दामोदरदास संभर वाले श्रीठाकुरजी के चरणारविंद कों प्राप्ति भए । तब श्रीद्वारिकानाथजी नाव में विराजिकें, अडेल में श्रीआचार्यजी महाप्रभून के घर पधारे । अब सिंघासन पर स्वरूप पांच विराजत हैं । श्रीनवनीतप्रियाजी, श्रीविठ्ठलनाथजी, श्रीद्वारिकानाथजी, श्रीगोकुलनाथजी, श्री-मदनमोहनजी, ये पांचो स्वरूप सिंघासन पर विराजत हैं । भगवदी सब दर्सन करत हैं श्रीआचार्यजी महाप्रभून के । श्री-गोपीनाथजी के । श्रीगुसाईंजी के । या भांतिसों श्रीआचार्यजी महाप्रभू विराजत हैं । आप अडेल में विराजत हैं । इति ।

इति श्रीआचार्यजी महाप्रभूजी की निजवार्ता भावप्रकाश सहित समाप्तम्

❀ अथ ❀

# श्रीआचार्यजी महाप्रभू के-

❀ घर की वार्ता लिख्यते ❀



उत्थानिका—श्रीआचार्यजी महाप्रभू के परम कृपापात्र चौरासी, सेवक परम भगवदी तिनकी वार्ता लिखी । और सेवक तो श्री-आचार्यजी महाप्रभू के सहश्रावधि हैं काहेते जो श्रीआचार्यजी महाप्रभू आप तीनि बेर पृथ्वी पावन करी । और श्रीगुसांईजी जब भगवानदास श्रीगोबर्द्धननाथजी के बालभोगिया तिनसों सामिघी दाभी । तब त्याग किए । तब श्रीआचार्यजी महाप्रभू के सेवक अच्युतदास श्री-गुसांईजी सों कहे जो श्रीठाकुरजी ने दैवी जीवन के उद्धार के लिए । श्रीआचार्यजी महाप्रभू कों आज्ञा दीनी । तासों श्रीआचार्यजी महाप्रभू भूतल में अवतार लिये । और दैवी जीवन कों अङ्गीकर किए । और दैवी जीव तो बहुत सब सवालाख जीव कों अङ्गीकार करनों । श्री-आचार्यजी महाप्रभू ने तो तुमकों सोंपे और आप तो जीवको अपराध बिचारो हो । और जीव तो दोष भरचो है यह बात श्रीगुसांईजी आप अच्युतदास के मुखते सुनिकें श्रीगुसांईजी आप संकल्प किए जो आजु पीछे काहू सों खीजनो नहीं और भगवानदास कों हाथ पकरिकें श्री-गुसांईजी आप ले आये और श्रीमुखते कहे जो । सेवा सावधानतासों करियो । सो श्रीआचार्यजी महाप्रभू के सेवक तो बहुत हैं, और श्रीगोकुलनाथजी महाराज आप श्रीमुखते चौरासी सेवकन की वार्ता कही ताको हेत यह जो ए चौरासी सेवक हैं ते मुख्य हैं । जिनकों श्री आचार्यजी महाप्रभू आप प्रेमलक्षणाभक्ति को दान किए हैं सो कैसें जानिए जो ।

“गोविंद स्वामी गाए हैं” ।

“भक्ति मुक्ति देत सबहिनकों निज जनपर कृपा प्रेम वरखत अधिकाई” ।

सो कृपा प्रेम को कहा स्वरूप है जो । जिनसों श्रीठाकुरजी साक्षात् याही देहसों बोलत हैं बात करत हैं चहिए सो मांगि लेत हैं और श्रीगोकुलनाथजी सर्वोत्तम की टीका में पद्मनाभदासजी को स्वरूप लिखे हैं । तातें ये चौरासी भगवदी कैसे हैं जैसे भगवान के गुन गायेतें कृतार्थ होत हैं तैसें भगवदीन को जसु गायेतें जीब कृतार्थ होत हैं । याहीते श्रीशुकदेवजी नवम स्कंध में सब राजान की कथा कही है । सो वो सब राजा भगवदीय हते । ताहीतें प्रथम भगवदी की कथा कहिये तो भगवत्कथा को अधिकार होइ । ताहीतें श्रीशुकदेवजी नवमस्कंध में भगवदीन को चरित्र कहिकें, पाछें दशमस्कंध में भगवत नाम को चरित्र कहे हैं, ताहीतें श्रीगोकुलनाथजी चौरासी वैष्णव भगवदीन की वार्ता प्रगट कीनी । और श्रीगोकुलनाथजी नित्य कथा कहते । सो एक दिन श्रीगोकुलनाथजी आप दामोदरदास संभरवाले की वार्ता कहत हते । तब एक वैष्णव नें पूछी जो महाराज आज कथा न कहोगे । तब श्रीगोकुलनाथजी आप श्रीमुखते कहे जो । आजु तो कथा को फल कहत हैं । तातें भगवदीन कों अवश्य चौरासी वार्ता कहनी सुननी । जातें भगवद भक्ति होइ । और श्रीठाकुरजी के चरणारविंद पर स्नेह होइ, श्रीजी सदांर प्रसन्न हैं ।

अब श्रीआचार्यजी महाप्रभू एक समें अजुध्या कों पधारे । श्रीरामजी के मन्दिर में सो श्रीरामजी, श्रीलक्ष्मणजी श्रीसीताजी और हनूमानजी ए च्यारो हुते ता समें श्रीआचार्यजी महाप्रभू आप श्रीमुखते कहे जो मर्यादा पुरुषोत्तमायनमः तब श्रीरामचन्द्रजी, श्रीआचार्यजी महाप्रभू कों अति सनमान भली भांति सों कीये सो श्रीआचार्यजी महाप्रभू जाने और कोउ

नहीं समुभयो । ताहीतें हनूमानजी कों बुरो लाग्यो जो श्री-  
आचार्यजी महाप्रभू श्रीरामचन्द्रजी को मर्यादा पुरुषोत्तमायनमः  
ऐसें क्यों कहे डंडोत नहीं प्रणाम नहीं ।

भावप्रकाश—सो हनूमानजी के मन में ऐसें काहे कों आई जो  
श्रीआचार्यजी महाप्रभून के स्वरूप को हनूमानजी को ज्ञान नाहीं हैं ।  
तहां कोउ ऐसें कहे जो हनूमानजी तो श्रीरामचन्द्रजी के अत्यन्त कृपापात्र  
हैं । इनकों श्रीआचार्यजी महाप्रभून के स्वरूप को ज्ञान नांही सो कैसे  
संभवे ताको हेत यह है जो, श्रीगुसांईजी के सर्वोत्तम में । श्रीआचार्यजी  
महाप्रभून को नाम कहे हैं जो ।

श्लोक—“सर्वाज्ञात लीलोऽति मोहन” ।

तातें श्रीआचार्यजी महाप्रभून की लीला अति गोप्य है । जाकों  
आप कृपा करिकें जनावें सोई जानें ।

“ ताहीतें भगवदी गाए हैं ” ।

\* रागकान्हरो \*

जोलों हरि आपन पोन जनावे ।

तोलों सकल सिद्धान्त सुमृति बल पढे गुनें नहीं आवे ॥ १ ॥

सुनि बिरंचि नारायण मुखतें नारद को सिख दीनी ।

नारद कही वेदव्यास सों आपुन सो धन कीनी ॥ २ ॥

वेदव्यास ओखध की नाई पठि तन ताप मिटावे ।

तातें पढे मुनि श्रीशुकदेव परीक्षत कों जु सुनावे ॥ ३ ॥

जदपि नृपति सुनि ब्रजकी लीला दसम कही सु शुकदेवा ।

पे सरवातमभाव न उपज्यो तातें करी न सेवा ॥ ४ ॥

श्रीभागवत अमृत दधि मथिकें श्रीवल्लभ सर्वोत्तम ।

करि आवरन दूर निजजन के हाथ दिऐ पुरुषोत्तम ॥५॥

साज सिंगार भोजन नानाविध सेवा रस प्रगटाए ।  
वृन्दावन निज लीला जनि हरि जीवन स्वाद चखाये ॥ ६ ॥

“और गोपालदासजी गाए हैं जो” ।

नित्य लीला नित्य नौतन श्रुति न पामें पार ।  
और कहे जो गाय श्रुति गुणरूप अहर्निशधरे ध्यान विचार ॥  
आनन्दरूप अनूप सुन्दर पामें नहीं को पार ।

वेद की श्रुति ऐसैं कहत हैं जो श्रीआचार्यजी महाप्रभून के स्वरूप को पार कोऊ नहीं पावे । तो हनूमानजी कहा जाने ।

तार्ते हनूमानजी कों ईर्षा आई ताही समें श्रीरामचन्द्रजी ।  
हनूमानजी के अन्तःकरण की जानी जो हनूमानजी के मन में दोष आयो है । और यह तो मेरो सेवक है, तार्ते हनूमानजी को दोष दूर करिवे के लिये श्रीरामचन्द्रजी उपाय कीयो कहा उपाय कीनो जो हनूमानजी सों यह कहे जो तुम श्री-आचार्यजी महाप्रभून पास जाउ देखो तो कहां विराजे हैं । सो देखि आओ ता समें श्रीआचार्यजी महाप्रभू सरयू गंगा में स्नान करिकें तट पे विराजे हैं । और सन्ध्या वन्दन करत हैं और सब भगवदी पास बैठे हैं । रसोई को सामिग्री सिद्ध करत हैं । ता समें हनूमानजी आये । सो श्रीआचार्यजी महाप्रभून के दर्सन हनूमानजी कों कैसे भये जो । साक्षात् श्रीरामचन्द्रजी को स्वरूप धरिकें बैठे हैं तब हनूमानजी कों सन्देह भयो जो श्रीआचार्यजी महाप्रभून नें श्रीरामचन्द्रजी को स्वरूप कैसे धरयो । और हनूमानजी दंडौत करिकें अपने श्रीरामचन्द्रजी

के मन्दिर में आये । तब श्रीरामचन्द्रजी ने हनुमानजी से पूछे जो तू श्रीआचार्यजी महाप्रभू के दर्शन करि आयो तब हनुमानजी ने कही जो महाराज दर्शन करि आयो । परि श्रीआचार्यजी महाप्रभू तो आपको स्वरूप धरि बैठे हैं । तब श्रीरामचन्द्रजी हनुमानजी से कहे जो । उनमें इतनी सामर्थ्य है, जो मेरो स्वरूप धरि लेंड । और हममें इतनी सामर्थ्य नांही । जो उनको स्वरूप धरें ।

भावप्रकाश—सो याको कारण कहा जो श्रीरामचन्द्रजी से श्रीआचार्यजी महाप्रभू को स्वरूप न धरयो जाय याको हेत यह है । जो द्वितीय स्कंध श्रीभागवत की श्रीसुबोधनी में जहां चौबीस अवतार को श्रीआचार्यजी महाप्रभू निरणय कीये हैं । तहां सब अवतारन के स्वरूप लिखे हैं ? कोउ अंस हैं, कोउ कला हैं, कोउ आभरण हैं, कोउ वस्त्र हैं, और श्रीरामचन्द्रजी पूर्ण पुरुषोत्तम हैं । हास्य को स्वरूप हैं । और श्रीआचार्यजी महाप्रभू को स्वरूप तो, श्रीगुसाईंजी आप श्री-सर्वोत्तम में कहे जो । “ श्रीकृष्णस्य ” सो साक्षात् श्रीपूर्णपुरुषोत्तम श्रीकृष्ण तिनके मुखारविंद रूप श्रीआचार्यजी महाप्रभू को स्वरूप है । सो श्रीकृष्ण के मुखारविंद में तें हास्य प्रगट होत है । और हास्य में ते तो मुखारविंद नांही प्रगट होत । ताते श्रीआचार्यजी महाप्रभू श्रीरामचन्द्रजी को स्वरूप धरिलें । और श्रीरामचन्द्रजी तें श्रीआचार्यजी महाप्रभू को स्वरूप न धरयो जाइ । याही तें श्रीआचार्यजी महाप्रभू सबते अधेक हैं । और सबके मूल रूप हैं, सबनको प्रागट्य श्रीआचार्यजी महाप्रभूनते हैं । और सब रस के भोक्ता हैं और वाकधीस हैं, वाणीहूँ श्रीमुख में रहत है और सब पदार्थ को भोगहूँ श्रीमुखते हैं ।



“ताहीतें भगवदी विष्णुदासजी गाए हैं” ।

वागीशज्ञ रशज्ञ वरुणपुनि अनुभव उभय एक गुणसं ।

अखिल धरापद परसि पूतकृत ब्रज यमुना वहरत रुचिरासं ॥१॥

तातें श्रीआचार्यजी महाप्रभून को स्वरूप अगाध है सो श्रीराम-चन्द्रजी ही जानत हैं और परम कृपापात्र देवी जीव तिनकों श्रीआचार्य-जी महाप्रभू अपुनों स्वरूप जनावत हैं सर्व लीला सहित साक्षात् श्रीगोव-द्धनधर के दर्शन करत हैं ।

\* वार्ता प्रथम समाप्त \*

अब श्रीआचार्यजी महाप्रभू ब्रज में पधारे । सो ब्रज श्रीआचार्यजी महाप्रभून को सर्वस्व है । आपको धाम है । आप सब लीला ब्रज में करी हैं तातें ब्रज बहुत प्रिय है । सो श्रीगुसाईजी सर्वोत्तम में श्रीआचार्यजी महाप्रभून को नाम कहे हैं जो “ ब्रजप्रियः ” और दूसरो नाम कहे हैं जो “ प्रिय-ब्रजस्थितिः ” ब्रज ही जिनकों प्रिय हैं । सो एक दिवस श्री-गोवद्धननाथजी को सिंगार करिकें राजभोग की आरती करि अनौसर करिकें आपको स्थल हैं । श्रीगोवद्धन पूजा के साम्हें छोकर है तहां श्रीआचार्यजी महाप्रभू आप विराजे । उहां ही आपकी बैठक है सो ता समें एक वाई वैष्णव हुती सो आन्यौर मं रहती सो श्रीआचार्यजी महाप्रभून के पास आई सो वा वाई कों श्रीगोवद्धननाथजी ऊपर बहुत आसक्त हुती सो वा वाई नें श्रीआचार्यजी महाप्रभून सों विनती करी जो महाराज मोकों कोई भगवत् स्वरूप पधराइ देऊ । विना सेवा मेरो दिन नांही कटेगो आपके अनुग्रह तें श्रीगोवद्धननाथजी दर्शन देत हैं ।

सो हूँ करतिहू पे, आप मोकों श्रीठाकुरजी पधराइ देऊ तो हों सेवा करूँ । तब श्रीआचार्यजी महाप्रभू एक स्वरूप श्रीठाकुरजी श्रीबालकृष्णजी कों पधराइ दीये । और वाई सों श्रीआचार्यजी महाप्रभू आप श्रीमुखते कहे जो ये बालक हूँ इनकों तू सदां जतन राखियो । कभूँ अकेले छिनहूँ मति छोडियो जो अकेले छोडेगी तो ऐ डरपेंगे श्रीआचार्यजी महाप्रभू वा वाई सो ऐसैं कही । जो वा वाई को मन अहर्निश श्रीठाकुरजी में लग्यो रहे । काहेते जो मन को निरोध मुख है सो वा वाई को मन श्रीठाकुरजी के चरणारविंद में श्रीआचार्यजी महाप्रभू आप धरयो । सो वा वाई को मन एक छिनहूँ श्रीठाकुरजी में ते न निकसे ऐसी वा वाई कों श्रीठाकुरजी में आशक्ति भई, जो एक छिनहूँ वह वाई दूरि जाइ तो श्रीठाकुरजी वाकों पुकारें । जो वह वाई न होइ तो जैसेँ लौकिक बालक अपनी माता बिनु दुख पावे । ऐसैं श्रीठाकुरजी करें । सो वा वाई के स्नेह बढाइवे के लिये । और जो वह वाई घर को काम काज करे तो मन्दिर के आगें बैठकें करे । रंचहू दूरि न जाइ, ऐसो श्रीआचार्यजी महाप्रभू वा वाई कों स्नेह दान किये ।

भावप्रकाश—काहेते जो कृष्णदास मेघन श्रीआचार्यजी महाप्रभू सों प्रथम पूछो है जो महाराज श्रीठाकुरजी कों प्रियवस्तु कहा है, और अप्रियवस्तु कहा है । तब श्रीआचार्यजी महाप्रभू कृष्णदास सों कहे । सो थोडे में बहुत अर्थ कहे सो । जे भगवदीय होइगे ते सब समुझेंगे । सो प्रथम श्रीआचार्यजी महाप्रभू आप श्रीमुखतें कहे जो श्रीठाकुरजी कों वो भगवदीन कों स्नेह अति प्रिय हैं । और गोरस अति प्रिय है, सो

गोरस में दूध दही माखन घृत सब आयो प्रथम तो श्रीमुखतें स्नेह कए ता पाछें गोरस कहे सो याकां यह हेत है जो स्नेह बिना सब कछु श्रीठाकुर जी कों समर्प्यो । पे कछू अङ्गीकार न होइ श्रीआचार्यजी के मारग में स्नेह ही मुख्य है । स्नेह सो रंचकहू बहुत करिकें माने हैं । सो सूरदासजी कहे हैं जो—“ गोपी प्रेम की ध्वजा ” तातें स्नेह सब तें अधिक है और श्रीठाकुरजी कों अप्रिय कहा है । सो आप श्रीमुखतें कहे जो क्लेश श्रीठाकुरजी कों बहुत अप्रिय है काहेतें जो जहां क्लेश रहे । तहां श्रीठाकुरजी कभूँ न पधारे । काहेते जो आप अनन्दरूप हैं । ताते आनन्द को और क्लेश को परस्पर विरोध है । जहां क्लेश होइ तहां आनन्द न रहे । जहां आनन्द होइ तहां क्लेश न रहे तातें भगवदी अहर्निश भगवद् जश को यर्णन करे हैं । और भगवान के गुन को गान करत हैं भगवान को गुन है सो मंगलरूप है सो सदा भगवदी गावे हैं सो क्लेश हमारे निकट न आवे । यह क्लेश ऐसो है जो श्रीठाकुरजी ते वहिमुख करत है । जहां क्लेश होइ ताके हृदय में श्रीठाकुरजी कभूँ न आवे और श्रीआचार्यजी महाप्रभू आप कहे हैं जो श्रीठाकुरजी को धूआं अप्रिय है धूआं बालक कें बहुत असह्य है । तातें वैष्णव कों जहां धूआं होइ तहां श्रीठाकुरजी को न पधरावे । और श्रीआचार्यजी महाप्रभू आप श्रीमुखतें कहे हैं जो श्रीठाकुरजी कों भगवदान को द्रोही अत्यन्त अप्रिय है । श्रीठाकुरजी की प्रतिज्ञा है जो मेरो द्रोह करेगो ताकी तो क्षमा करूंगो और मेरे भगवदीन को द्रोह करेगो ताकी तो क्षमा मोसों न होइ । सो आप दुर्वासा के प्रसंग में कहे हैं जो—“अहंभक्त पराधीन” मैं तो भगवदीन के आधीन हूँ । तातें भगवदीन को द्रोही श्रीठाकुरजी कों अत्यन्त अप्रिय है ।

सो या बाई कों आप दान कीऐ सो वो बाई भला भांति सों श्रीठाकुरजी की सेवा करे । रात्रिकों सोवे तो श्रीठाकुरजी के निकट ही सोवे और छिनमें कहे जो महाराज में बैठीहूँ आप

डरपो मति, और जो रंचकहूँ वा बाई की आंखि लगे । तब श्रीठाकुरजी कहे जो अरी में डरपतहूँ ऐसो श्रीठाकुरजी वा बाई पे अनुग्रह कीनो जो वाको निरोध सिद्ध भयो । अब एक दिवस रात्रिकों श्रीगोवर्द्धननाथजी वा बाई के घर कों पधारे । और वासों कहे जो अरी बाई किवार खोलि तब वानें कही जो में तो उठूं नहीं । में उठूं तो मेरो लरिका डरपे । तब कही जो में देबदमन हूँ । मोकूँ किवार खोलि । तब वा बाईनें कहे जो । महाराज आप सवारें पधारियो । में उठूं तो मेरो लरिका डरपे । तब श्रीगोवर्द्धननाथजी आप ही भीतर पधारे । तब बाईनें उठिकें दंडवत कीनी और कह्यो जो महाराज आप इतनो श्रम काहे कों कीयो । में सवारें आपके दर्शनकूँ आउं हूँ तब श्रीगोवर्द्धननाथजी प्रसन्न होइकें कहे जो हों तोपरि प्रसन्न हूँ । तू कछू मांगि जो मांगे सो देऊं । तब वा बाईनें कह्यो महाराज आप श्रीआचार्यजी महाप्रभून के अनुग्रह सों, सब कछू दीयो हूँ । और आप जो मोपे प्रसन्न भए हो तो में एक वस्तु मांगू हूँ, इहां श्रीगोवर्द्धन पे ल्यारी बहुत हैं सो यह लरिकान पकरि ले जात हैं । सो मेरो लरिका निपट बालक है सो यह मांगत हूँ जो याकों कभूँ ले न जाइ सो यह बात सुनिकें श्रीगोवर्द्धननाथजी कों रोमांच भयो जो धन्य ए हैं । जिन पर ऐसो श्रीआचार्यजी महाप्रभून को अनुग्रह हैं जो मो पर इनकों ऐसो स्नेह है इनकों में कहा देउं ए मेरी ऐसी सेवा करे हैं ।

जो इनसों उरिण कभूं न होऊं । वह बाई श्रीआचार्यजी महा-  
प्रभून की सेवक ऐसी भगवदी हती ।

\* वार्ता द्वितीय समाप्त \*

अब श्रीआचार्यजी महाप्रभू एक समें थानेश्वर पधारे ।  
सो थानेश्वर के निकट सरस्वतीजी हैं । सो उहां ताई श्री-  
आचार्यजी महाप्रभू अनुग्रह करिकें पधारते, श्रीआचार्यजी  
महाप्रभू सरस्वती के पार न उतरते सिंहनन्द के वैष्णव सब  
श्रीआचार्यजी महाप्रभून के दर्शन कों थानेश्वर आवते, जाको  
सेवक होनों होतो, सो थानेश्वर में आइके होतो । जाकों  
ब्रह्मसंबन्ध लेनो होइ, सो ब्रह्मसंबन्ध लेय । सो सासु बहू की  
वार्ता में प्रसिद्ध लिख्यो है सो सासु बहू पर ऐसी कृपा हुती  
जो श्रीआचार्यजी महाप्रभू आप श्रीमुखते कहते जो कहा करूं ।  
सरस्वती उलंघनी नांही । नाही तो उनको घर जाइके दर्शन  
देतो । ऐसी कृपा उन पर करते । जो एक समें श्रीआचार्यजी  
महाप्रभू सरस्वती के तीर ऊपर बिराजे हते । वा ठौर मृत्तिका  
बहुत सुन्दर हती सो मृत्तिका जलसों भीजी सो श्रीआचार्यजी  
महाप्रभू आप वो मृत्तिका लेके वा मृत्तिका को एक स्वरूप  
निरमाण कीऐ, सो श्रीबालकृष्णजी उनको नाम धरयो । ता  
समें एक वैष्णव सिंहनंद को पास ठाढो हतो । सो वानें श्री-  
आचार्यजी महाप्रभून सों विनती करी जो महाराज मोकों एक  
स्वरूप पधराइ दीजिये । में सेवा करूं तब श्रीआचार्यजी महा-  
प्रभू वो जो श्रीहस्त में श्रीबालकृष्णजी को स्वरूप हुतो सो

श्रीआचार्यजी महाप्रभू आप प्रसन्न होइकें वा वैष्णव कों पधराइ दीये । और जब श्रीआचार्यजी महाप्रभू स्वरूप को निरमाण कीऐ, तब वो वैष्णव देखत हुतो । सो ताहीतें वाकों सन्देह उत्पन्न भयो । तब श्रीआचार्यजी महाप्रभून सों वा वैष्णवनें बिनती करी जो महाराज इन स्वरूप कों स्नान अभ्यंग कैसें करबाउंगो । तब श्रीआचार्यजी महाप्रभू आप श्रीमुखतें कहे जो अरे तू ऐसो सन्देह मति करे । जो तेरो मनोर्थ होइ सो सब करियो । सो श्रीबालकृष्णजी कों वह वैष्णव घर पधराइ कें पाट बैठाऐ । अभ्यंग शृङ्गार भोग सामिग्री सब सिद्ध कीयो । बडो वा वैष्णव कों उत्साह भयो । श्रीठाकुरजी वापर अनुग्रह करें सानुभाव जनावें । जो चाहिये सो मांगि लें और श्रीबालकृष्णजी वाके घर में ऐसें क्रीडा करें । जैसें कोउ प्रकृत बालक करें सो वो ऐसे परम कृपापात्र भगवदी हुते । जिनके भाग्य सों श्रीआचार्यजी महाप्रभू अपने श्रीहस्त सों स्वरूप निरमाण कीऐ, सो वो वैष्णव सेवा भली भांतिसों करे ।

\* वार्ता तृतीय समाप्त \*

तब एक समें श्रीआचार्यजी महाप्रभू श्रीगोकुल पधारे । सो आप श्रीगोकुल में विराजे । और सब भगवदी संग हते । एक दिबस पूरब तें कोउ वैष्णव मिश्री भेट ले आयो । सो आइकें श्रीआचार्यजी महाप्रभून कें आगें धरी, सो मिश्री बहुत हुती । तब श्रीआचार्यजी महाप्रभू दामोदरदासजी कूं कृष्णदास मेघन कों और सब वैष्णवन कों आज्ञा दीनी जो मिश्री बेगि

सिद्ध करो । छोटे छोटे टूक । जैसे श्रीमुख में धरे जाइ । प्रभून कों अरोगत में श्रम न होइ । तब सब वैष्णव मिश्री सम्हारन बैठे । सो कितने कटोकरा मिश्री सिद्ध भई, सो जितनीक सिद्ध भई, सो सब मिश्री श्रीआचार्यजी महाप्रभू श्रीठाकुरजी कों समरपी और बहुत बची सो आप श्रीआचार्यजी महाप्रभू श्रीठाकुरजी कों राजभोग समरपिकें श्रीजमुनाजी स्नान कों पधारे । सो वो मिश्री बची हती । सो सब संग लिवाइके आप पधारे । सो श्रीआचार्यजी महाप्रभू । वो सब मिश्री श्रीजमुनाजी कूं समरपी, सो वो वैष्णव जो मिश्री लायो हुतो । सो वाके चित्त कों खेद भयो जो में तो जानी हती जो बहुत दिना ताई वह मिश्री थोड़ी थोड़ी चलेगी सो श्रीआचार्यजी महाप्रभू तो सब मिश्री जल में पधराइ दीनी । जो श्रीआचार्यजी महाप्रभू करत हैं । सो आछो ही करत होइगे । जो अंगीकार भई सोउ आछी । जो जल में पधराइ दीनी सोउ आछी । ऐसे वो वैष्णव विचारे मनमें, तब श्रीआचार्यजी महाप्रभू तत्काल वाके मन की जानी । श्रीआचार्यजी महाप्रभू तो साक्षात् ईश्वर हैं ।

सो वा वैष्णव कों बुलाए, और वासों श्रीआचार्यजी महाप्रभू आप श्रीमुखतें कहे जो ऐसे सन्देह तोकों काहेकों आयो यह तो सब मिश्री श्रीठाकुरजी अंगीकार कीए तब वो वैष्णव बोले जो महाराज जीव बुद्धि जैसे देखे तैसे मनमें आवे, आप मिश्री सिद्ध करिकें श्रीठाकुरजी कां भाग समरप साउ देख्यो । और श्रीजमुनाजी में पधराइ सोउ देख्यो । तार्ते ऐसे

सन्देह आयो । आप तो साक्षात् ईश्वर हो । हमारें तो श्री-  
ठाकुरजी और सर्वस्व आप ही हो और हमनें तो सब आपको  
समर्प्यो है श्रीठाकुरजी अनुग्रह करेंगे ; सो तो आपके अनुग्रहते  
करेंगे । श्रीठाकुरजी हमको कहा जाने । हम सारिखे तो कोटा-  
निकोटि जीव परे हैं । आपके अनुग्रहते मेरो भागि सिद्ध भयो  
है । ऐसो दैन्य या वैष्णव को देखिके श्रीआचार्यजी महाप्रभून  
को बहुत दया आई ।

भावप्रकाश—काहेते जो आप कृपासिंधु हैं जो वस्तु काहूसों न  
दीनी जाइ सो अनुग्रह करिके श्रीआचार्यजी महाप्रभू वाको दीने काहेते  
जो श्रीआचार्यजी महाप्रभून को नाम । सर्वोत्तम में श्रीगुसाईंजी  
कहे हैं जो—

श्लोक—“ अदेयदानदक्षश्च महोदार चरित्रवान् ” ।

सो ता समें श्रीआचार्यजी महाप्रभू वा वैष्णव सों कही जो  
देखि या तेरी सामिग्री को कहा उपभोग भयो है सो वा वैष्णव  
को श्रीआचार्यजी महाप्रभू कैसे दर्शन करवाए जो श्रीजमुनाष्टक  
में श्रीआचार्यजी महाप्रभू आप वर्णन किये हैं जो—

श्लोक—“ सकलगोपगोपीव्रते ” ।

सो श्रीजमुनाजी सकल गोपन सों और गोपीन सों भरे हैं  
ऐसे दर्शन श्रीआचार्यजी महाप्रभूनें वा वैष्णव को करवाये ।  
ऐसी ठौर बाकी सामिग्री को उपयोग भयो । सो वैष्णव दर्शन  
करिके बहुत प्रसन्न भयो । श्रीआचार्यजी महाप्रभू ऐसो अनुग्रह



वा वैष्णव ऊपर कीए । और श्रीयमुनाजी को स्वरूप प्रगट कीए । जो भगवदी होइ सो श्रीयमुनाजी कों ऐसैं जानियो ताहींतें गोविंद स्वामी श्रीजमुनाजी में पाउ न बोरते श्रीगुसांईजी गोविंदस्वामी कों अनुग्रह करिकें ऐसे दर्सन करवाए सो श्री-आचार्यजी महाप्रभू की ऐसी अनेक वार्ता हैं । और वैरागको स्वरूप प्रगट किये जो संग्रह न राखनों जगतमें यह सिद्ध भयो ।

\* वार्ता चतुर्थ समाप्त \*

एक समें श्रीआचार्यजी महाप्रभू उज्जैन पधारे । सो उहां क्षिप्रानदी है ताके तीर श्रीआचार्यजी महाप्रभू बिराजे हते । सो वह स्थल बहुत सुन्दर हतो सो तहां पास सब भगवदी बैठे हैं । श्रीआचार्यजी महाप्रभू सन्ध्या वंदन आप करत हैं । सो ऐसे में बयारि चली । सो कहूँते एक पीपर को पतौवा उड़तो चल्यो आयो सो श्रीआचार्यजी महाप्रभू आप श्रीहस्त सों वा पतौवा कों उठाइ लियो और आप सन्ध्या कीए हुते ताको जल उहां परयो हतो सो वह धरती भीजी हती सो वामें वा पीपर के पतौवा की डांडी श्रीआचार्यजी महाप्रभू अपुने श्रीहस्त सों रोपी । सो तत्काल बाही में ते नवपल्लव पतौवा निकसन लागे सो देखत देखत तत्काल एक बडो पीपल को वृक्ष भयो । सो इन दैवी जीवन ऊपर अनुग्रह करिकें । अपनी ईश्वरयता प्रगट करी । और जब जगत में अपुनो महात्म्य प्रगट कीनों जो देखो इनमें यह सामर्थ्य हैं । ऐ साक्षात् पूर्णपुरुषोत्तम हैं । सब कोऊ ऐसैं कहे जो यह करज मनुष्य सों न बनि आवे

और श्रीआचार्यजी महाप्रभून की जहां बैठक है । तहां छोंकर को बृत्त है । और उज्जैन में याई पीपर के नीचे आपकी बैठक सिद्ध भई है सो श्रीआचार्यजी महाप्रभू आप उज्जैन पधारे । तब उहां ही विराजे सो श्रीआचार्यजी महाप्रभून के श्रीहस्त को लगायो पीपल नित्य हैं ।

\* वार्ता पंचम समाप्त \*

अब एक समें श्रीआचार्यजी महाप्रभू अडेल में विराजे । सो श्रीआचार्यजी महाप्रभू बडे वैभव सों भगवत्सेवा करें । सो लोग बहुत उहां आइके वसे श्रीठाकुरजी के वैभव सों । सेवक वैष्णव जलघरिया टहलुवा । सो तिनमें श्रीआचार्यजी महाप्रभून के ज्ञाति की एक तैलंग ब्राह्मणी आइ रही । सो श्रीआचार्यजी महाप्रभून के प्रताप सों वाको निर्वाह तहां आछें चले । जो कोउ वैष्णव आवे सो श्रीआचार्यजी महाप्रभून की ज्ञाति जानिकें कछू दे जाइ ! और श्रीआचार्यजी महाप्रभून के घर में प्रस्ताव, विवाह, जनेऊ, छठी, बधाई, जो आवे, तामें वाको सनमान करें । और वाको ऐसो सुभाव है जो । श्रीआचार्यजी महाप्रभून को उत्कर्ष देखके मनमें कुटे । वैष्णव देशतें विदेशतें आवें । सो सब बहू बेटीन कों दंडवत करें । सो देखिकें वह कुटे जो मोकों तो कोउ पूछतहू नांही । यह जानिकें वह ब्राह्मणी अपने मनमें श्रीआचार्यजी महाप्रभून सों द्वेष माळ्यो । परि कछू बनि न आवे । परि मनमें विचारे जो काहू रीतिसों इबकों दुख देउं तो आछो । सो श्रीआचार्यजी महाप्रभून के जलघरिया

श्रीयमुना जल लेवे कों जाते । सो एक दिवस वा ब्राह्मणी ने अपने लोटा को जल गागरि पर डारि दीयो । सो वह जलघरिया कुढ्यो बहुत सो वो तो श्रीआचार्यजी महाप्रभून के सेवक हैं कोउ और दुःख देतो आप सहन करें । परि आप वाकों दुःख न दें । और वो ज्ञात की ब्राह्मणी हुती । तासों श्रीआचार्यजी महाप्रभून सों जाइकेँ जलघरिया ने कही जो महाराज ! देखो आपकी ज्ञाति की ब्राह्मणी है सो हमारी गागरि पर जानिकेँ अपने लोटा को जल डारि दियो है । तब श्रीआचार्यजी महाप्रभू आप कहे जो वासों बोलो मति और गागरि ले जाइकेँ भरिल्याओ सो जलघरिया फेरि स्नान करिकेँ दूसरी गागरि भरिल्यायो । ऐसे ही नित्य जाइ जल भरिल्यावे, परि वा बाई की दृष्टि परे तो एकाध गागरि नित्य छुवावे । सो श्रीआचार्यजी महाप्रभून के आगे वो जलघरिया नित्य पुकारत जाहि । तब श्रीआचार्यजी महाप्रभू आप श्रीमुखते एही कहे जो बोलो मति और गागरि भरिल्याओ काहेते जो श्रीआचार्यजी महाप्रभून कों एही सिद्धान्त है । आप विवेकधैर्याश्रय में लिखे हैं जो ।

श्लोक—“त्रिदुःखसहनं धैर्यमामृते” ।

परि वो जलघरिया बहुत काहे भये, कहा करें कछू बसाइ नहीं और दूसरो कोउ मारग नहीं जो वापेंडे जल ले आवें तब वो जलघरिया ने श्रीआचार्यजी महाप्रभून सों बिनती कीनी जो महाराज यह बाई बहुत दुःख देति हैं । आप तो वाको वरजत

हीं और आपकी आज्ञा बिना हमसों कछू कइयो न जाइ सो महाराज हम कहा करें । भंडार को तो द्रव्य को जान होत है और हमकों न्हानो पडे सो यह बात सुनिकें श्रीआचार्यजी महाप्रभून कों दया आई । और आप कहे जो बाकी वस्तु तुम में आओ तब जलघरिया कहे । जो महाराज वह बाई तो मारो मोंहडो देखे है । तब ऊपर पानी डारे है सो वो हमकों कछू कैसे देइगी । तब श्रीआचार्यजी महाप्रभू कहे जो तुम जाउ सो आपते तुमकों देइगी । ऐसे में जलघरिया श्रीयमुनाजी जल की गागरि भरिकें आवत हतो । और वह बाई अपने घर में पोतना करति हती । सो बाकों सुधि आई जो आज में काहू जलघरिया की गागरि छुवाई नांही । सो उठिकें बाहर आई जो देखे तो जलघरिया तो आगें निकसि गयो । इतने में पोतना लैके गागरि पर मारयो । सो पोतना गागरि सों चिपटि गयो, सो वो जलघरिया वैसेई लिएं लिएं गागरि श्रीआचार्यजी महाप्रभून के आगें धरी और कहे जो देखो महाराज हमकों नित्य वो ऐसो दुःख देत हैं । तब श्रीआचार्यजी महाप्रभू आप आज्ञा दीनी जो । या पोतना धोइके आछो करिल्याउ सो जलघरिया वह पोतना धोइ लायो । सो श्रीआचार्यजी महाप्रभू ताके काकड़ा सिद्ध करवाए सो पिछली रात्रि उन काकड़ान सों, रसोई सब देखी पोती । वा ब्राह्मणी की सत्ता को अंगीकार भयो । और वो ब्राह्मणी ताही समें घर सोइ उठी और बाको ज्ञान भयो जो देखो में कितनों श्रीआचार्यजी महा-

प्रभून को अपराध कियो है । और देखो वो कैसे कृपाल हैं । जो मोसों कञ्चू नहीं कह्यो और वो सर्वसामर्थ्यवान हैं, इनको ही सब गाम हैं जो ए आज्ञा करें तो मोकों इहां ते बाही समें काढि देहिं परि ऐतो साक्षात् ईश्वर हैं । ईश्वर ही इतनों सहनि करें जीव को दोष न देखें होइतो में इनसों जाइके अपराध क्षमा करवाऊँ । तब वो ब्राह्मणी बाही समें श्रीआचार्यजी महाप्रभून सों आइके बहुत प्रणपति कीनी जो महाराज में आपको बहुत अपराध कियो है । सों क्षमा करो में आपको स्वरूप नहीं जान्यो । आप तो साक्षात् पूर्णपुरुषोत्तम हो । अपनो स्वरूप जब आप जीवकों जनावो तब जीव जानें । जीव तो संसार रूपी अंधकूप में परयो है । आप जाको अनुग्रह करिके काढोगे सोई निकसेगो ताते मोकों आप अनुग्रह करिके सेवक करो । सो श्रीआचार्यजी महाप्रभू परम उदार वापर अनुग्रह करिके वाकों अंगीकार किये । ताहीते सूरदासजी गाए हैं जो ।

“ विमुख भरे करुणाया मुखकी जब देखो तब तैसे ” ।

• और श्रीआचार्यजी महाप्रभून को नाम है जो ।

\* रागविहागरो \*

श्रीवल्लभ महासिधु समान ।

सदा सेवत होत सबकों अभय पद को दान ॥ १ ॥

कृपाजल भरिपूर हो जहाँ उठत भाव तरंग ।

रतन चौदह सब पदारथ भक्ति दसविधि संग ॥२॥

पुष्टि मारग बडी नौका तरत नहीं अयास ।  
 ढिंग न आए द्विविध आसुर मरे मीन निरास ॥३॥  
 जहां सेत वंध्यो प्रगट करि सुत विड्वलेश कृपाल ।  
 भयो मारग सुगम सबकों चलत नेंकु न आल ॥४॥  
 पुष्टि रसमय सुधा प्रकटी दई सुर निज दास ।  
 असुर बंधे मनुज माया मोह मुख विधु हास ॥५॥  
 छांडि सागर कौन मूरख भजे छीलर नीर ।  
 रसिक मनतें मिटी इच्छा परसि चरण समीर ॥६॥

भावप्रकाश—या वार्ता में यह सिद्धान्त श्रीआचार्यजी महाप्रभू प्रगट किये जो जीव की सत्ता को श्रीठाकुरजी अंगीकार करें । तब जीवकों मन फिरे यह अङ्गीकार की परिक्षा है । ताहीतें श्रीआचार्यजी महाप्रभू श्रीगुसांईजी जीव की सत्ता को उपयोग श्रीठाकुरजी विपे करवावे । तब तत्काल वाको मन फिरि जाइ । और भक्ति होइ और या जीवको ममता महादोष रूप है । सो दोष निवर्त्त व्हे जाइ सो या जीवमें दोय बड़े दोष हैं । एक अहंता, और ममता, अहंता सो तो में, और ममता सो मेरो, सो में और मेरो, यही दोय बड़े बाधक रूप हैं । सो यह जीव जब श्रीआचार्यजी महाप्रभून के शरण आवे । तब ये दोउ छूटिजाँइ । तब ही जानियें जो यह जीव शरण आयो । यह सरन आपे की परिक्षा है । जीव को यह धर्म हैं जो में और मेरो काहेतें जो यह जीव संसार में परयो है । श्रीठाकुरजी तो भूलि गये हैं । तातें में और मेरो सूके है । ऐसे जीव महा दोषवंत देखिकें । श्रीआचार्यजी महाप्रभून को दया आई सो तिनके लियें आप प्रगट भये, सो जीव की अहंता और ममता दूरि कीनी । नाम देके तो अहंता दूरि कीनी । और ब्रह्मसंबन्ध करवाइके जीव की ममता दूरि कीनी अहंता सो कहा कहत हुतो जो में सो नामते यह सिद्ध भयो जो में तुम्हारो शरण हूँ, रओ ब्रह्मसम्बन्धतें यह सिद्ध भयो, जो कछू है सो तिहारो है । मेरो कछू नहीं, में तुम्हारो दास हूँ । सो नवरत्न में श्रीआचार्यजी महाप्रभू आप

श्रीमुखतें कहे जो—“साक्षितोभवताखिला” साक्षीवत् होइकें रहनों । तो संसार की पीडा याकों वाधित न करे । ताहीतें भगवदी सब श्रीठाकुरजी की सत्ता मानत हैं और आप साक्षात् होइकें रहत हैं ऐसो श्रीआचार्यजी महाप्रभू को मारग है । जाको बडो भाग्य होइगो । सोई सरण आवेगो ।

श्रीआचार्यजी महाप्रभू गृहस्थाश्रम में ज्ञान और वैराग दोऊ अपुने भगवदीन को सिद्ध करि दिये हैं । ज्ञान तो यह जो एक भगवत् सेवाही को परम पुरुषार्थ ही जानत हैं । और गृहस्थाश्रम में । श्रीआचार्यजी महाप्रभू अपने भगवदीन को ऐसो दान कियो है जो घर में स्त्री है, पुत्र भाई हैं, कुटुम्ब हैं, ये श्रीठाकुरजी के चरणारविन्द विना काहू सो स्नेह नांही । एक श्रीठाकुरजी सो स्नेह है । सो प्रतिज्ञ दीसत हैं घर में तो कोऊ मनुष्य जात रहत हैं । कालवसते तो ताहू समें भगवदी को श्रीठाकुरजी की सेवाही की चिंतो होत है । जो मति मेरे श्रीठाकुरजी को अवार होइ । भगवदीन को मन श्रीठाकुरजी की सेवा ही में अहर्निश रहत हैं । ताहीतें संसार को क्लेश भगवदीन को वाधक नांही करत । ताहीतें श्रीआचार्यजी महाप्रभू गृहस्थाश्रम में ज्ञान वैराग दोऊ भगवदीन को सिद्ध करि दिये हैं । यह परम पुरुषार्थ रूप हैं । यह ज्ञान और वैराग्य दोऊ भगवान की प्राप्त के साधन रूप हैं । सो श्रीआचार्यजी महाप्रभू अनेक दैवी जीवन को सुगम करि दिये हैं । ऐसे श्रीआचार्यजी महाप्रभू परम दयाल हैं । अडेल में बिराजे भगवदीन को अनेक प्रकार सो आनन्द को दान करत हैं ।

\* वार्ता छठवीं समाप्त \*

अब श्रीआचार्यजी महाप्रभू एक समें गंगासागर पधारे तब श्रीठाकुरजी ने आज्ञा दीनी जो तुम अब मेरे पास आओ तब श्रीआचार्यजी महाप्रभू आप विचारे जो श्रीठाकुरजी तो आज्ञा कीनी जो तुम मेरे पास आवो । और हमनें तो मनोर्थ

बहुत विचारयो है जो कार्य बहुत करनों हैं। श्रीठाकुरजी की इच्छा तो ऐसी भई है तातें अब कहा करनों। ता ममें श्री-आचार्यजी महाप्रभू तृतीयस्कंध की सुबोधनी समाप्त कीनी। और चतुर्थस्कंध की सुबोधनी को आरंभ करिवे को विचार करत हुते। तैसेमें आज्ञा भई, तब श्रीआचार्यजी महाप्रभू चतुर्थस्कंध, पंचमस्कंध, षष्टमस्कंध, ऐ छै स्कंध छोडिकें दशमस्कंध की सुबोधनी को आरम्भ कीऐ।

भावप्रकाश—यह जानिकें जो दशमस्कंध बडो पदार्थ है। निरोध लीला है। सब को फल है, भगवदीन को विलास है। लीला समुद्र है। और सब स्कन्ध श्रीशुकदेवजी कहे हैं। और राजा परीक्षित सुने हैं। और दशमस्कन्ध श्रीठाकुरजी आप कहे हैं। और श्रीठाकुरजी आप ही सुने हैं दशमस्कन्ध की सुबोधनी के आरम्भ में।

एवंत्रिशम्य भृगुनंदन साधुवादं वैयासकिः स भगवानथ विष्णुरातम् ।  
प्रत्यर्च्य कृष्णचरितं, कलिकष्मषट्कं व्याहर्तुमारभत भागवतप्रधानः॥१॥

या श्लोक की सुबोधनी में श्रीआचार्यजी महाप्रभू आप लिखे हैं जो 'वैयासकिः स भगवानथ विष्णुरातं' जो आप ही श्रीठाकुरजी कहे। और आप ही सुने और दसमस्कन्ध में। जन्म प्रकरण में सब ब्रज की कथा श्रीनन्दराइजी, श्रीयसोदाजी, और सब ब्रज भक्तन की कथा है। सो तिनकों ही श्रीआचार्यजी महाप्रभू मारग प्रगट कियो है सो वह मारग तो ब्रज भक्तन को है। श्रीआचार्यजी महाप्रभू देवी जीवन के लिए प्रगट कियो है। ताहीतें यह विचारकें बीच में षष्टमस्कन्ध छोडिकें दशमस्कन्ध की सुबोधनी करिवे को आप आरम्भ कीऐ।

सो आप कौन प्रकार सुबोधनी कीऐ श्रीआचार्यजी महा-प्रभू आप कहत जांइ और माधवभट्ट काश्मीरी लिखत जांइ।



सो जहां माधवभट्ट न समझें, तहां लेखनि धरि राखें । तब श्रीआचार्यजी महाप्रभू उद्गमों समुझाइकें कहें । तब माधवभट्ट लिखें सो मारग चलत ही ग्रन्थ सिद्ध होइ । भोजन करिकें आप विराजें । तब श्रीआचार्यजी महाप्रभू आप श्रीमुखतें कहें सो ऐसैं कितनेक ग्रन्थ सिद्ध भए ।

\* वार्ता सातवीं समाप्त \*

अब श्रीआचार्यजी महाप्रभू आप श्रीमथुरा पधारे । सो मथुरा में फिरि श्रीठाकुरजी की आज्ञा भई तब श्रीआचार्यजी महाप्रभून कों दूसरी आज्ञा दीनो जो तुम बेगि पधारो । तब श्रीआचार्यजी महाप्रभू अपने मन में विचारे जो श्रीठाकुरजी तो बहुत उतावल करत हैं । और इहां तो अभी कारज रह्यो है, तातें यहू आज्ञा श्रीठाकुरजी की बनि न आवेगी । तातें जैसें बनें तैसें दशमस्कंध निरोध लीला सम्पूर्ण होइ तो आछो याहीतें श्रीआचार्यजी महाप्रभून को नाम है जो ।

“ भक्तकृपार्थकृतकृष्ण आज्ञाद्वयोल्लंघनायनमः ”

सो अपने भगवदी दैवी जीवन ऊपर श्रीआचार्यजी महाप्रभून को ऐसो अनुग्रह है जो श्रीठाकुरजी की दोइ आज्ञा न मानी ।

भावप्रकाश—और याको दूसरो अर्थ और है जो श्रीठाकुरजी रूप और नाम श्रीआचार्यजी महाप्रभून कों प्रगट करनो हैं सो रूप तो श्रीगोवर्द्धननाथजी प्रगट कीए । और नाम तो तब प्रगट कीए होइ जो

श्रीसुवोधनी प्रगट होइ तो । तातें सुवोधनी प्रगट करिवे के लिएं श्री-  
ठाकुरजी की दोइ आज्ञा श्रीआचार्यजी महाप्रभून उलंघन कीनी ।

श्रीठाकुरजी श्रीआचार्यजी महाप्रभून कों वेगि बुलावत हैं ताको  
कारण कहा श्रीठाकुरजी श्रीआचार्यजी महाप्रभून कों आप ही तो आज्ञा  
दीनी जो दैवी जीवन कों उद्धार करो । वो मोतें बहुत दिनन के विछुरे  
हैं । ऐसी दैवी जीवन के उपर श्रीठाकुरजी कों दया आई । सो श्री-  
गुसाईंजी सर्वोत्तम के आरंभ में लिखे हैं । और कहे हैं जो ।

श्लोक—“दययानिज महात्म्यं करिष्यन्प्रकटं हरिः” ।

सो श्रीठाकुरजी दैवी जीवन के ऊपर अनुग्रह करिकें । श्री-  
आचार्यजी महाप्रभून कों भूतल में प्रगट किये । श्रीठाकुरजी की आज्ञातें  
श्रीआचार्यजी महाप्रभू पधारे । अब श्रीठाकुरजी आज्ञा कीए जो वेगि  
पधारो तुम ताको हेत यह है जो श्रीआचार्यजी महाप्रभून को नाम  
श्रीबल्लभ हैं । सो श्रीठाकुरजी कों बहुत प्रिय हैं । ताईतें श्रीआचार्यजी  
महाप्रभून को नाम श्रीसर्वोत्तम में श्रीगुसाईंजी “बल्लभाख्यः” ऐसो नाम  
कह्यो है । तातें श्रीठाकुरजी कों श्रीआचार्यजी महाप्रभू अति बल्लभ हैं  
और श्रीआचार्यजी महाप्रभून कों श्रीठाकुरजी अति प्रिय हैं । परस्पर  
ऐसो अनिरवचनीय स्नेह है । ऐसो जो श्रीआचार्यजी महाप्रभून कों  
स्नेह । श्रीठाकुरजी ऊपर हैं । तो श्रीठाकुरजी कों छोडिकें श्रीआचार्यजी  
महाप्रभू भूतल ऊपर कैसें पधारे ।

याको हेत यह जो स्नेह जो कोउ पदार्थ है ताको यही स्वरूप है  
जो आज्ञा उलंघन न करनी । आपुन कों दुःख होइ सो सब सहन  
करनों, ऐसो स्नेह को रूप है जबतें श्रीआचार्यजी महाप्रभू श्रीठाकुरजी सां  
पहुँचिके विछुरिके भूतल में पधारे हैं । तबतें सदां विरह को अनुभव  
ही श्रीआचार्यजी महाप्रभू करत हैं सो श्रीगुसाईंजी श्रीसर्वोत्तम में  
कहे हैं जो—“विरहानुभवैकार्थं सर्वं त्यागोपदेशकः” तातें श्रीआचार्यजी  
महाप्रभू अहर्निश विरह को अनुभव करत हैं । और श्रीआचार्यजी

महाप्रभू आप तो पूर्ण पुरुषोत्तम हैं । और श्रीगुसांईजी वल्लभाष्टक में लिखे हैं जो—“ वस्तुतः कृष्णएव ” । तार्ते श्रीकृष्णहू श्रीआचार्यर्ज महाप्रभू आप हैं । श्रीगोवर्द्धनधर आप हैं, और पूर्णपुरुषोत्तमहू श्रीआचार्यजी महाप्रभू आप ही हैं ।

“ ठौर ठौर भगवदी गाए हैं जो ” ।

### \* रागगोरी \*

श्री लक्ष्मणनन्दन जै जै जै ।

भक्त हेत प्रगटे पुरुषोत्तम मन बांछित फल निज जन दे ॥ १ ॥

सुख सुखद्रवित सुधारस मथिकें गूढ भाव दसविध करिले ।

मायावाद कलिंद दर्प दल दैवी जीवन दान अमे ॥ २ ॥

परिक्रमा मिस परसि पूतकृत भूतल तीरथ राज सबे ।

बसो निरंतर मेरे हिय में दासगुपाल पदांबुज द्वे ॥ ३ ॥

अब जो काहू कों संदेह होइ तो श्रीआचार्यजी महाप्रभू आप ही श्रीठाकुरजी हैं तो आज्ञा कौन कीये, और कौन पे कीये ताको हेत श्रीशुकदेवजी पंचाध्याई में लिखे हैं ।

श्लोक—अनुग्रहाय भक्तानां मानुषं देहमास्थितः ।

भजते तादृसीक्रीडा याः श्रुत्वा तत्परो भवेत् ॥ १ ॥

तार्ते श्रीआचार्यजी महाप्रभू आप ही अपुने दैवी जीवन ऊपर अनुग्रह कीये । साक्षात् पुरुषोत्तम रूप धरिकें जो श्रीआचार्यजी महाप्रभू भूतल में पधारते तो । सब जगत शरण आवे । सो सब जगत को तो उद्धार श्रीआचार्यजी महाप्रभून कों करनों नांही । श्रीआचार्यजी महाप्रभू तो केवल भगवदी दैवी जीवन के लिए भूतलमें पधारे । सो श्रीआचार्यजी महाप्रभू तो साक्षात् पूर्णपुरुषोत्तम हैं श्रीगोवर्द्धनधर हैं भगवदीन कों ऐसे ही दर्शन देत हैं और सब जगत तो ऐसैं जानत हैं जो ए कोउ बड़े महा-पुरुष हैं, बड़े तेजस्वी हैं, महापरिडत हैं, दिग्विजे कीनी हैं, उनकों

श्रीआचार्यजी महाप्रभून को इतनों ही ज्ञान हैं । ये श्रीठाकुरजी को स्वरूप । श्रीआचार्यजी महाप्रभून को है । सो ज्ञान नांही । सो श्रीगुसांईजी श्रीसर्वोत्तम में लिखे हैं जो—

श्लोक—प्राकृतानुकृतिव्याज मोहितासुरमानुषः ।

“ और भगवदी कीर्त्तन में गाए हैं जो ” ।

“ असुर वंचे मनुज माया मोह मुख मृदुहास ” ।

तातें श्रीआचार्यजी महाप्रभून के मृदुहास सों सब आसुरी जीव तो मोहित होत हैं । और दैवी जीवन कों तो सकल लीलाविसिष्ट के दर्शन होत हैं जैसो जैसो भगवदी मनोर्थ करत हैं । ताही प्रकार सों श्रीआचार्यजी महाप्रभू दर्सन देत हैं ।

\* वार्ता आठवीं समाप्त \*

सो श्रीआचार्यजी महाप्रभू आप अडेल में विराजत हते । दशमस्कंध की सुवोधनी संपूर्ण भई । और एकादसस्कंध के चारि अध्याय की सुवोधनी संपूर्ण भई सो वामें नवयोगीन को प्रसङ्ग है । सो श्रीठाकुरजी आप उद्धव के आगें कहे हैं । सो आठयोगीन के ऊपर तो श्रीसुवोधनी भई और नवमो योगी करिभाजन ताके प्रसङ्ग के सुवोधनी कों श्रीआचार्यजी महाप्रभू विचार किये जो ता समें श्रीआचार्यजी महाप्रभून कों श्रीठाकुरजी की तीसरी आज्ञा भई । सो कैसी आज्ञा श्रीठाकुरजी की भई जो—“ तृतीयालोकगोचरः ” सो श्रीठाकुरजी श्रीआचार्यजी महाप्रभून सों कहे जो । तुम सब जगततें अगोचर रहो । जैसे सब कोई तिहारो दरसन न करे । और जे भगवदी हैं तुम्हारे हैं

तिनकों तो तुम्हारे दरसन नित्य हैं वो एक छिनहूँ दर्सन बिना रहि न सकें वो ऐसे कृपापात्र हैं । सो आगे भगवानदासजी की वार्ता में लिखेंगे अब श्रीआचार्यजी महाप्रभू दरसन नहीं देते ।

भावप्रकाश—ताको हेत कहा । जैसे श्रीठाकुरजी श्रीकृष्णावतार में सब जगत को दर्सन देते । तामें असुरहू दर्सन करते, ये भक्त बिना दर्सन को फल न होइ । सो सूरदासजी कहे हैं जो—“भक्त बिना भगवंत सुदुर्लभ कहत निगम पुकारि” जिनको श्रीठाकुरजी ऊपर स्नेह है, और भक्त हैं, और श्रीठाकुरजी के स्वरूप को ज्ञान है, ते अनावतार दसामें हूँ सदैव दर्सन करत हैं । और भगवान की लीला नित्य है । नित्य ब्रज में विहार करत हैं ।

“ सो भगवदी गाए हैं जो ” ।

“ सदां ब्रज ही में करत बिहार ” ।

और भगवदी श्रीआचार्यजी महाप्रभून के सेवक और सब दैवी जीव तिनकों जब जब आरति होत है । तब ही तब श्रीआचार्यजी महाप्रभू दर्सन देत हैं ।

“ सो गोपालदासजी गाए हैं जो ” ।

“ आरति हरन चरन अंबुज पद बलि बलि दास गोपाल ” ।

श्रीआचार्यजी महाप्रभून की नित्य अखण्ड लीला हैं ।

सो जब श्रीठाकुरजी तीसरी आज्ञा दीनी, तब श्रीआचार्यजी महाप्रभू आप बिचार किये जो कौन रीतिसों पधारनों । तब श्रीआचार्यजी महाप्रभू यह बिचारे जो सन्यास ग्रहण करें । काहेतें जो ब्राह्मण को स्वरूप जो धरे तो ब्राह्मण को च्यारो

आश्रम कों अंगीकार करनों । सो प्रथम श्रीआचार्यजी महाप्रभू ब्रह्मचर्याश्रम कों अंगीकार किये । ता पाछे श्रीठाकुरजी की आज्ञाते विवाह भयो तब श्रीआचार्यजी महाप्रभू गृहस्थाश्रम को अंगीकार किये । सो जब श्रीगोपीनाथजी और श्रीगुसांईजी को प्रागल्भ्य भये । तबलों गृहस्थाश्रम को अंगीकार किये । ता उपरान्त । श्रीआचार्यजी महाप्रभू वानप्रस्थाश्रम को अंगीकार किये । सो श्रीआचार्यजी महाप्रभू ब्रह्मचर्य कीये सोउ अलौकिक कीये जो मनुष्य सों न बनि आवे । ईश्वर सों ही बनि आवे, तैसो ही गृहस्थाश्रम कीये आप साक्षात् पुरुषोत्तम के घर साक्षात् पूर्ण पुरुषोत्तम को प्रागल्भ्य भयो ।

“ सो गोपालदासजी गाये हैं ” ।

पूर्ण ब्रह्म श्रीलक्ष्मण सुत पुरुषोत्तम श्रीविठ्ठलनाथ ।

श्रीगोकुलमां प्रगट पधारचा स्वजन कीधा सनाथ ॥ १ ॥

तैसो ही श्रीआचार्यजी महाप्रभू वानप्रस्थाश्रम कीये जो साक्षात् ईश्वरसों ही बनें । सब पदार्थ विद्यमान हैं । और तिनसों वैराग हैं । और ता उपरान्त श्रीआचार्यजी महाप्रभू सन्यास ग्रहणहू ऐसैं ही कीये जो । तीनों वस्तु त्याग कीये । अन्न जल और संभाषण । सो यह विचारिकें सन्यास ग्रहण की आज्ञा श्रीमहालक्ष्मोजीते मांगी । काहेते जो स्त्री की आज्ञा बिना सन्यास ग्रहण न होइ सो वो तो आज्ञा दीये नांही तब श्रीआचार्यजी महाप्रभू तैसैं ही करत भये । तैसैं कृष्णावतार

में आप कीयो है जो जब पधारिवे को समें भयो, तब च्यारो आडी अग्नि को आव्रत् करि लिए । ताको नाम आव्रताअग्नि हैं । जैसे श्रीआचार्यजी महाप्रभू कृष्ण अवतार में कीये तैसे ही अब कीये । तब श्रीमहालक्ष्मीजी अग्नि को देखिके कहे जो आप निकसो अग्नि को उपद्रव बहुत भयो है, सो श्रीआचार्यजी महाप्रभू को तो इतनों कहवावनों ही हुतो जो निकसो, सो इतनों सुनिके श्रीआचार्यजी महाप्रभू आप सन्यास ग्रहण करिके कासी पधारे ।

### \* वार्ता नववीं समाप्त \*

ताको कारण कहा जो कासी हैं । तहां अभक्तन को वास है । आसुरी जीव बहुत हैं, और श्रीआचार्यजी महाप्रभू । जितनी लीला किये । सो सब ताको कारण हैं । ताते अब श्रीआचार्यजी महाप्रभू । आसुरव्यामोह लीला की इच्छा कीनी हैं । सो आसुरव्यामोह लीला तो तहां होइ जहां आसुर होइ भगवदीन में तो आसुरव्यामोह लीला होइ नहीं काहेते जो श्रीआचार्यजी महाप्रभू भगवदीन को तो नित्य दर्शन देत हैं । पुरुषोत्तमदास सेठ के घर में बैठक हैं । तहां नित्य दैवी जीव दर्शन करत हैं ; श्रीआचार्यजी महाप्रभू आसुर जीव को व्यामोह करत हैं ताको कारण कहा ।

भावप्रकाश—जो श्रीआचार्यजी महाप्रभू आसुरव्यामोह लीला न दिखावे तो वो आसुर कृतार्थ होइ जाइ ताते वो ऐसे जानत हैं जो जैसे और जीव को जन्म और अंतकाल होत हैं कैसें इनहुं को भयो ।

आसुर जीव ऐसों जानत हैं । जैसे श्रीदेवकीजी के घर भगवान प्रगटे फेरि ब्रज में मय लीला करी रेरि विवाहदिक सब कीने पुत्र पौत्र भये तहां उपरान्त प्रभाम लीला श्रीठाकुरजी कीनी । वोहू आसुरव्यामोह लीला है । और भगवदीन कों तो श्रीठाकुरजी सदैव दर्शन देत हैं । अखंड विराजमान हैं ।

“ ताहींतें भगवदी गाए हैं जो ” ।

नित्य लीला नित्य नौतन श्रुति न पामें पार ” ।

तैसें ही श्रीआचार्यजी महाप्रभू नित्य विराजमान हैं । भगवदीन कों सर्वत्र दर्शन देत हैं । श्रीगोवर्द्धननाथजी के पास श्रीआचार्यजी महाप्रभू सदैव दर्शन देत हैं । और अपने घर में श्रीनवनीतप्रियाजी के पास श्रीआचार्यजी महाप्रभू सदैव विराजत हैं । और ब्रज में श्रीआचार्यजी महाप्रभू सदैव विराजत हैं । और श्रीगुसांईजी सर्वोत्तम में लिखें हैं जो—

“ गोवर्द्धनस्थित्युत्साहस्तल्लीलाप्रेमपूरितः ” ।

श्रीगोवर्द्धन में ही सदा प्रसन्न विराजत हैं । और श्रीगोवर्द्धनघर की लीला में जिनकों आसक्ति हैं । और जहां तहां श्रीआचार्यजी महाप्रभू की बैठक है । तहां तहां सदैव भगवदीन कों दर्शन देत हैं ।

\* वार्ता दसवीं समाप्त \*

अब ता उपरान्त श्रीगुसांईजी सकुटुम्ब लेकर कासी पधारे । श्रीआचार्यजी महाप्रभू के दर्शन कों । और भगवदीहू संग होते । तब एक समें श्रीगुसांईजी श्रीआचार्यजी महाप्रभू सों प्रार्थना करी जो हमकूं कहा आज्ञा होत है । सो श्रीआचार्यजा महाप्रभू तो जा समें सन्यास कों अंगीकार कीये तबतें संभाषण



को त्याग कीऐ । सन्यासी कों बोलवो उचित नांही तब श्री-  
आचार्यजी महाप्रभू श्रीगुसाईंजी कों साढे तीन श्लोक सिद्धा  
के लिखिकें दीने जो तुमकों यह कर्तव्य है । सो साढे तीन

श्लोक—यदा वहिमुखा यूयं भविष्यथ कथंचन ।

तदा कालप्रवाहस्था देहचित्तादयोऽप्युत ॥ १ ॥

सर्वथा भक्षयिष्यंति युष्मानिति मतिर्मम ।

न लौकिकः प्रभुः कृष्णो मनुते नैव लौकिकम् ॥२॥

भावस्तत्राप्यस्मदीयः सर्वस्व चैहिकश्चसः ।

परलोकश्च तेनायं सर्वभावेन सर्वथा ॥ ३ ॥

सेव्यः स एव गोपीशो विधास्यत्यखिलं हि नः ।

जो ग्रन्थ श्रीआचार्यजी महाप्रभू पहलें प्रगट किये तिन  
सबको जो सार पदार्थ हतो सो श्रीआचार्यजी महाप्रभू अब  
प्रगट किये सो कहा प्रगट किये यह प्रगट किये जो अपुनो  
स्वरूप हतो सो श्रीआचार्यजी महाप्रभू आप जनाए जो मेरे  
ऊपर विस्वास राखोगे । तो सब कार्य सिद्ध होइगो । काल-  
बाधा न करेगो । और मेरे चरणारविंद की प्राप्ति शीघ्र होइगी ।  
ऐसे श्रीआचार्यजी महाप्रभू या ग्रन्थ में कहे, सो कहिकें श्री-  
आचार्यजी महाप्रभू आप श्रीगङ्गाजी के प्रवाह के भीतर पधारे  
श्रीगुसाईंजी बल्लभाष्टक में आप लिखे हैं जो, “ स्वामिन्  
श्रीबल्लभाग्ने ” श्रीगुसाईंजी श्रीआचार्यजी महाप्रभून को स्वरूप  
अग्नि करिकें कहे हैं ।

भावप्रकाश—सो श्रीआचार्यजी महाप्रभू कैसी अग्नि हैं साक्षान् पुरुषोत्तम के श्रीमुखर्ते जो आधि दैविक अग्नि हैं । सो श्रीआचार्यजी महाप्रभू हैं । सो श्रीआचार्यजी महाप्रभून के सेवक । विष्णुदास द्वार-पाल हुते । सो तिननें यह पद गायो है जो ।

\* रागगोरी \*

बंदेहं तं विमलहुतासं ।

जाते प्रगट प्रदीप श्रीविट्ठल अमरअभूत तिमर भवनासं ॥ १ ॥  
 उठत स्फुलिंग विशद निज सेवक वचनमृदुप्रेर मरुत वलिखासं ।  
 अन्न भजन दावानल चहूँदिस मायावाद मनुज मृगत्रासं ॥ २ ॥  
 पित समीप दूरिजन तापं अनुभव उभय एक गुणभानं ।  
 देवानन जडि अमित समीर वस पुरुषोत्तममुग्नपद्मविकासं ॥ ३ ॥  
 वागीशज्ञ रसज्ञ वरन पुनि अतुल सुभावप्रहत रुचिप्रासं ।  
 अखिलधरा पद परसिपूत कृत ब्रज जमुनां बहरत रुचिरासं ॥ ४ ॥  
 श्रीवल्लभ वल्लभ सुत गिरधर तरभूषणमति गूढ प्रकारं ।  
 श्रीलक्ष्मणकुल विष्णुस्वामीपंथ श्रुति वचमंडल कहे विष्णुदासं ॥ ५ ॥

“ और छीतस्वामी गाए हैं ” ।

\* रागगोरी \*

हरिमुख अनिल सकल सुरफुनि मुख तिन तनधार धर्मधुर लीनी ।  
 लेराख्यो सुरलोक भोगफल निज मरजाद भक्ति भलि कीनी ॥ १ ॥  
 तुवहित भजन उपासन सेवा भलो मति विमल दोष दुख हीनी ।  
 छीतस्वामी गिरधरन श्रीविट्ठल सब सुख निधि आपनेनकां दीनी ॥ २ ॥

ऐसो श्रीआचार्यजी महाप्रभून को आदिदैविक अग्नि को स्वरूप हतो सो वा समे प्रगट कीए जैसे कृष्णावतार में श्रीठाकुरजी तेजोमय रूप धरे । सब ब्रह्मादिक पधराइवे कहे

आए हुते परि वा तेजपुंज के आगें काहू कों कछू खबरि न पडी श्रीठाकुरजी अपने सधाम पधारे । तैसें ही श्रीआचार्यजी महाप्रभू कीऐ श्रीआचार्यजी महाप्रभून की अब ऐसी इच्छा भई है जो अब मेरें सवनकों दर्सन न देनों, सो आप अंतःकरण प्रबोध में लिखे हैं जो “ तृतीयोलोकगोचरः ” अगोचर कहा जो यह श्रीठाकुरजी नें आज्ञा करी जो सब जगत कों दर्शन मति देऊ जैसे कृष्णावतार में सब कोउ दर्शन करत हते । और अब तो जाके ज्ञान भक्ति और भगवद अनुग्रह होइ । सो दर्शन सदैव करें । और श्रीठाकुरजी तो न कहूँ आवत हैं । न कहूँ जात हैं । माया को टेरा जब दूरि करत हैं । तब दर्शन होत हैं । और माया को टेरा आडो आवत हैं । तब दर्सन नांही होत । तातें आविरभाव तिरोभाव सदैव हैं । सो श्रीआचार्यजी महाप्रभून के सेवक अच्युतदास ब्राह्मण कडा-मानिकपुर के । तिनकी वार्ता में लिखे हैं । जो श्रीआचार्यजी महाप्रभून के सङ्ग कासी में वैष्णव हते । तिनमें तें एक वैष्णव कडा मानिकपुर में आए । सो उनकों अच्युतदास सों बहुत स्नेह हतो । सो वो यह जाने जो अच्युतदास सों मिलें तो यह क्लेश निवर्त होइ । यह कैसो क्लेश है जो श्रीआचार्यजी महाप्रभू दुःख के समुद्र में डारि दोने हैं ।

भावप्रकाश—जैसें श्रीठाकुरजी मथुरा पधारे तब ब्रज भक्तन के विरहरूपी क्लेश के समुद्र में डारे तैसें ही श्रीआचार्यजी महाप्रभू अपने भगवदीन कूं ऐसो विरह को दान किये सो काहेतें कीऐ जो । विरह है

सो मुख्य है याहीतें विरह को नाम उतरदल है सो विरह मुख्य है तातें और दुख काहेतें कहत हैं सो याको हेत सूरदासजी कहे हैं जो—

“ हृदयतें यह मदन मूरति छिन न इत उत जात ” ।

और याही की पिछली तुक में कहे हैं जो—

“ सूर ऐसे दर्श कारण मरत लोचन प्यास ” ।

सो नेत्र की प्यास तो श्रीमुख देखे ही सों मिटे ।

“ सो कृष्णदासजी गाए हैं जो ” ।

✽ रागसारंग ✽

गिरधर देखें ही सुख होइ ।

नैनवतन को यही परम फल वंदत द्वेतिहूलोइ ॥ १ ॥

मरकतमणि और नीलकमल को सर्वसु लियो है निचांइ ।

कृष्णदास प्रभू गिरिधर नागर मिलि विरह दुःख खाइ ॥ २ ॥

सो कृष्णदासहू विरह को दुःख कहे हैं ।

तातें यह वैष्णव यह बिचारे जो । अच्युतदास कों मिलिए तो यह दुःख निवर्त होइ । वो बड़े भगवदीय हैं । उन परि श्रीआचार्यजी महाप्रभून कों बडो अनुग्रह है अपनो स्वरूप उनकों पधराइकें दीनो हैं । तातें उनसों मिलें यह विचारिकें कडा मानिकपुर में आए अच्युतदास कों मिले तब अच्युतदास इनकों अंतःकरण बहुत शुष्क देख्यो । और मुख मुरभाइ गयो है । तब अच्युतदास इन वैष्णवन सों पूछे जो । तुम्हारी ऐसी दशा काहेते है ।

✽ वार्ता ग्यारहवीं समाप्त ✽

तब उन कहे जो श्रीआचार्यजी महाप्रभू श्रीठाकुरजी के पास पधारे ।

भावप्रकाश—सो काहेतें कहे जो श्रीआचार्यजी महाप्रभू इनको ऐसैं ही दर्शन दीये । जैसे श्रीभागवत महात्म्य में श्रीठाकुरजी की सब रानी द्वारिकातें ब्रज में आईं सो श्रीठाकुरजी कों बैकुण्ठ पधारे सुनिकें अति खेद भयो । सो सब ब्रज में आईं सो आगें श्रीयमुनाजी के तीर बिखें श्रीकालिन्दीजी को दर्शन भयो । सो वो कालिन्दीजी श्रीयमुनाजी के तीर बिखें बहुत प्रसन्न बैठे हुते । सो उनकों देखिके यह जो सोलह हजार जो भक्त हैं श्रीठाकुरजी की नायिका सों श्रीकालिन्दीजी सों पूछे जो हमारो तुम्हारो सम्बन्ध तो समान हैं श्रीठाकुरजी सब के पति हैं । सो बैकुण्ठ पधारे हैं । और तुम तो प्रसन्न हो । और हमकों तो क्लेश ने बाधा कीयो हैं । ताको हेत कहा । तब श्रीकालिन्दीजी कहे, जो ऐसो श्रीठाकुरजी कबहूँ न करे । यह तो आसुरव्यामोहलीला है । श्रीठाकुरजी तो सदां श्रीयमुनाजी के पुलिन बिखें विहार करत हैं । ताते तुम सब श्रीठाकुरजी के गुन गाब करो तुमकोंहू श्रीठाकुरजी दर्शन देहिंगे । श्रीठाकुरजी तो नित्य लीला करत हैं ।

ताते तैसें ही अच्युतदास इन वैष्णवन सों कहे जो । श्रीआचार्यजी महाप्रभू ऐसी कबहूँ न करे । भगवदीन कों तो नित्य दर्शन देत हैं जिनकों श्रीआचार्यजी महाप्रभू आप अङ्गीकार कियो है सो सदैव लीला सहित श्रीठाकुरजी के श्रीआचार्यजी महाप्रभून के दर्शन नित्य करत हैं ।

“ सो गोपालदासजी गाए हैं जो ” ।

जहां नित्य रास बहु परे रे, मध्य नायक नृत्यत घेरे रे ।

जहाँ रत्न जाटत तट सरिता रे, जहां नव पल्लव भूमिहरतारे ।

जहां रत्न धातु गिरि राजेरे ।  
 वाजिंत्र विविध परे बाजेरे ॥  
 जहां युवति यूथ बहु मांयेरे ।  
 श्रीजी श्यामल वर्ण सुहाये रे ॥  
 एणी परे श्रीगुसांईजी ने जाणारे ।  
 जाणी अहर्निश गाय बखाणारे ॥  
 जे जीव जात होइ कोई रे ।  
 तेने तत्क्षण सर्व सुख होई रे ॥  
 सेवक जन दास तुम्हारो रे ।  
 तेनो रूप बियोग निवारो रे ॥

तार्ते ऐसो श्रीआचार्यजी महाप्रभून को मारग है जो जीव  
 कोउ जाति होइ ताको श्रीआचार्यजी महाप्रभून के श्रीगुसांईजी  
 के चरणारविंद की प्राप्त होइ । और इहलो श्रीआचार्यजी  
 महाप्रभून के सेवक हैं । इनको कहा कहनों तब अच्युतदाम वा  
 वैष्णव को हाथ पकरिकें मन्दिर के किवार खोलि के टेरा  
 सरकायो सो वो वैष्णवने देख्यो तो श्रीआचार्यजी महाप्रभू श्री-  
 सुबोधनीजी को पाठ करत हैं । सो दर्शन करत सब दुःख  
 मिटिगयो । और श्रीआचार्यजी महाप्रभून सों पूछे जो महाराज  
 उहां तो ऐसे दिखाए हो और इहां तो आप ऐसैं विराजत हो ।  
 याक्ये कारण कहा तब श्रीआचार्यजी महाप्रभू आप श्रीमुखते  
 कहे जो तुम ऐसो सन्देह मति करो तुमको तो दर्शन सदैव हैं ।  
 और वह तो हमनें सवन सों टेरा आडो करि दीयो है । अब